

ASO SA: 26 IANUARI 2025 (Aso Sa o Tupulaga)

MATAUPU: OLA MAFUTA

TUSI FAITAU: 1 Ioane 1:1-4

FESOASOANI MO LE TA'ITA'I

O le ola mafuta, e faamatalaina ai le omai faatasi o tino, toto ma aano o gafa tagata e osiosi faatasi aiga, aulotu, Aoga Aso Sa, au talavou, poo soo se kamupani ma faalapopotoga, ma soo se faatasiga lava. O le faamoemoe lava ia, ina ia vaai atu, ma fesootai atu i foliga ma le tino, ma feofoofota'i i le alofa faa-le-Atua, ma ia militino faatasi le fanau a le Atua.

E foliga faapena le faamoemoe o le faatomuaga o le tusi a le toeaina o Ioane. Manatua foi o Ioane lea, o le soo e i ai lona faalupega i le Tusi Paia, o le soo o Iesu, ae o le soo foi e alofaina e Iesu. Aisea? Ona o le tagata sa vavalalata lava lo la sootaga ma Iesu, na aluga i le fatafata o Iesu ma faalogologo i le tata o le fatu o le Alii Faaola.

Afuaga foi lea o le taua ia Ioane o lenei mataupu, ina ia lagona e tagata kerisiano uma, tasi lenei vaega taua o le ola faa-le-faatuatua. O le ola mafuta e feasiasia'i ai tagata uma o le Ekalesia ma feiloai i manuia o le Atua.

Ae o le ola mafuta lea e ala i le ola talitonu ma le faatuatua i la latou tauologologo mai, e ala i le Talalelei a Iesu Keriso, o Le sa o latou militino ma mafuta faatasi, ao i ai o Ia i lana galuega talai, ma le galuega faaola i le ola nei.

Afai la tatou te mafuta faatasi ma i latou i le igoa o Iesu Keriso, ua o tatou mafuta lava lea ma le Tamā i le lagi. O lona uiga i le manatu o Ioane, o le ola mafuta a le au kerisiano, o le ata lava lea o le Atua ma lona malo e faavavau. Ae o le ata foi lena o le olioli atoatoa, aua ua militino faatasi tagata uma.

FAATINOAGA O LE MATAUPU- Talanoa

Fesiligia tupulaga talavou i so latou taofi, poo le a le mafuaaga, ma le uiga o le i ai faatasi i le mafutaga, ma le fonu a le autalavou i lena Aso Sa.

O le faamoemoe lava, ina ia talanoa mai tupulaga i lo latou iloa, i mafuaaga ua mafuta mai ai.

Poo atagia ai i o latou manatu le taua ma le aano moni o le ola mafuta.

AOTELEGA O LE MATAUPU

I le aotelega o lena mataupu, o loo faamanino ai lava e Ioane le taua o le ola mafuta o tagata kerisiano uma o e ua faatuatua ia Iesu Keriso, ae o le atoaga foi lea o le ola olioli o tagata uma.

O le taua foi lea o le ola mafuta ma fefaasoa'i tupulaga talavou, e maua ai lo latou fiafia ma le olioli i le Alii.

.....

ASO SA: 02 FEPUARI 2025

MATAUPU: E MAOPOPO, I LE FEALOFANI

TUSI FAITAU: Kenese 45:16-24

FESOASOANI MO LE TA'ITA'I

O le a tomua lava le tatou mataupu i lenei taeao, i toe upu a le Alii faaola, ao le i afio a'e i le lagi e faalautele ai le taua o le ola fealofani. Fetalai Iesu i ona soo, "Ia outou fealofani, e pei ona ou alofa atu ia te outou." Aisea? E le mafai, le mafai ona taunuu le faamoemoe ma faamanuiaina le taumafaiga, pe afai e feainai ma felotoai, pe afai e femisaa'i ma lē galulue faatasi le soo.

E faapena le lagona o loo ia Iosefa na ala ai lava ona toe tulitatao atu lana fautuaga i ona uso, "aua nei outou femisaa'i i le ala." O le agaga maualuga lava, ina ia taunuu le faamoemoe e pei ona taatia i malae. O lea ua maea ona feiloai ma faalelei si a latou vesiga lea sa i ai i tausaga e tele ua tuanai, lea na iu ai lava ina faatau atu o ia i tagata Mitiana ma oo atu ai i Aikupito. Le vesiga la lea o lea ua uma ona teuteu, ma o lea ua sauni e toe foi le au uso i Kanana.

Peitai, o le foi lea ua o ai le au uso, ua le na ona foi i Kanana, ae ia tapena mai le toeaina ma le aiga e nonofo ma aumau ai i Aikupito. Aumai e ola lelei ma ola manuia ai i le nuu o Kosena lea ua finagalo i ai Farao e foai atu mo i latou. Aisea, faamanuiaga o le tautua ma le auunaga a Iosefa. Ae le gata i lea, ae sei aumai le toeaina sei feiloai i lona atalii ua leva ona tetea.

O le mafuaaga lea o le toe tima'i o Iosefa, sole, aua nei outou femisaa'i i le ala. Silafia e Iosefa, e fai lava si umi ma le mamao o le malaga toe foi. O le malaga e faitau aso, faitau masina, e

leiloa foi pe faitau tausag. E tele foi fita ma faigata o le ala, e le gata i manu feai, o le au faomea, aemaise ai o faigata o le loto, ma le manatu o le tagata lava ia.

O le mea moni, poo le a le tele o faigata o le ala, poo le a foi le feai o manu o le vao, e leai lava se isi faigata e sili atu nai lo le loto o le tagata pe a oo ina faaosoosoina, ma e le taumate, o le popolega lea o Iosefa, auā foi, e ui lava ina foliga mai o loo fealofani ona uso, ma lelei mea uma i le vaaiga lautele, peitai, e leiloa lava le taimi e suia faafuasei ai manatu ma lagona, e leiloa le taimi e ta'a ai le fili, ona faaletonu lea ma le oo ai le faamoemoe e pei ona tuupoina.

FAATINOGA O LE MATAUPU- Faaso

E manaia ae vaevae i kulupu le autalavou atoa, ona tuu lea o le avanoa i tupulaga talavou e saili ai ni manatu lelei, ma fefaasoa'i, mo le faalauteleina o le mataupu. Ona tuu lea o le avanoa i le taitai o kulupu e faailoa o latou lagona ma manatu, pe atagia ai le fealofani ma le felagolagomai o tagata uma i lo latou faamoemoe.

AOTELEGA O LE MATAUPU

O le upu moni, e leai lava se mea e mafai ona faatino pe afai e eseese manatu ma lagona, e leai foi se faamoemoe e taunuu, pe afai e femisaai ma feainai, auā foi, o le taimi lava e manatu ai lea e fai se mea, o le taimi foi lena e tetee ai le isi, ae afai e tasi le loto ma le lagona e tumu i le faamaopoopo ma le fialia e ola felagolagomai, pe fai mai e sii le mauga i le sami, e mafai lava,

auā foi, o loo faia ma le loto malie, o loo faatinoina ma le fiafia, o loo galulue foi ma le fealofani, ae sili ai, o loo faia ma le alofa i le loto e tasi.

.....

ASO SA: 09 FEPUARI 2025

MATAUPU: O LE MALO O LE ATUA?

TUSI FAITAU: Luka 13:18-19

FESOASOANI MO LE TA'ITA'I

E faape'i le malo le Atua? O fea e maua ai le malo o le Atua? O nai fesili ia e mafai ona tatou tuufesili ma faasoa ai, i le malo o le Atua, auā foi, e leai lava se tasi ua vaai i lea malo. E leai foi se isi ua na iloa pe faape'i foliga o lea malo, ae lanu a ona tagatanuu. Ao fea foi e omai ai ia tagata. Afai foi tatou te suesue i le anoanoai o tusitusiga eseese o loo tatou fiafia e faitau i ai, o le upu moni lava, e seasea ona tatou maua i ai se tala faatatau i le malo le Atua

O le mea moni, tatou te le maua, auā foi, e le o se malo faa-le-lalolagi le malo o le Atua, ae o le malo faa-le-lagi

I le feagaiga fou, o mea lava e masani ai le soifuaga ma le olaga o le tagata Eperu, o mea ia o loo faaaogaina e Iesu e faamalamalama ai le malo o le Atua i le tagata faalogologo. Ese le faigofie o le gagana o loo faaaogaina e le Alii e faailoa mai ai le malo le Atua i le lalolagi.

I le tusi a Luka, o loo faailoa mai lea i le tagata le malo le Atua. “E faatusaina le malo le Atua ini a? Ou te faatusaina ini a? O le fesili o loo manaomia se tali, peitai, ua leai. Lea la ua toe tali lava e Iesu. “E tusa ia ma le fua o le sinapi, ua ave e le tasi tagata, ma lafo i lona fanua; ua tupu, ua avea ma laau; ua momoe foi manu felelei i ona la.

O le fesili, “Aisea ua faatusaina ai le malo le Atua i le fua o le sinapi ae le faatusaina i se isi fatu laau.

Ioe, ua faatusaina le malo le Atua i le fua o le sinapi, le fatu laitiiti ae tupu mai ai le laau tele ma le mafala. E faapena le malo le Atua, na amata mai se amataga itiiti ma le faatauavaa, peitai, ina ua tupu le fatu ma ua ola, ua avea ma laau tele e sulufai i ai le tagata mafatia, e mapu i ai le tagata puapuagatia, e to’ a iai le sa o le tagata ua afatia i le tele ma le anoanoai o afa o le ola nei. Auā foi, o le malo le Atua o le malo e maua ai le filemu moni. Le malo e fou ai mea uma. O le malo foi e maua ai le olioli loloto ma le fiafia e faavavau. O le malo e leai se faanoanoa poo se loimata maligi, e le maua ai se tagi poo se tiga, e le maua ai se atuatuvaale ma se popole. E le maua ai se tagata solomuli gofie ma se tagata faavaivai. E le feitagai foi pe femisaai ona tagatanuu, ae galulue faatasi, e feoeoeai ma fetausiai. E fai mea lelei ma fai mea sili aua se viiga o lē Ona le malo. O ai lea? O le Atua. O le malo o loo nofo tupu ai le Atua. O lona uiga, e ola fealofani ma ola felagolagomai tagata uma, e le toe faia ai se tasi ma fili o se isi, ae ola faatasi o le uso ma le uo. A lea fai mai ai Isaia. O le malo e aai faatasi ai le luko ma le tamai mamoe, e aina au o saito e le leona e pei o le povi; e aai faatasi foi le povi fafine ma le urosa. E taalo foi le tama e lei tea ma le susu i le lua o le asipi, o le tama foi ua tea ma le susu e

tuu e ia lona lima i le lua o le gata uogo ae leai se mea e tupu ai. Aua latou te le faia se mea leaga, latou te le faaumatia foi se mea i le mauga paia o le Atua; aua foi, e tumu le lalolagi uma i lona malamalama.

FAATINOGA O LE MATAUPU

Tuu le avanoa mo tupulaga e faaali ai manatu e uiga i le mataupu. Poo lea so latou silafia e uiga i le Malo o le Atua.

AOTELEGA O LE MATAUPU

I le aotelega o lenei mataupu, o lea o tatou mautinoa ai le tali o le ata o le malo o le Atua. E ui ina o tatou iloa ma aoaina i tatou i la le faatuatua, o le malo o le Atua o le malo faa-le-lagi lea, ae tatou te le faatali sei oo mai le oti ona tatou o lea i le malo le Atua, e leai. E mafai lava ona tatou ola i le malo o le Atua i le soifuaga ma le olaga nei. Mafai faapefea? Pea tatou maua le filemu o le Atua. Le filemu loloto e maua pe a papa'i ma oo mai lona Agaga Paia. Le Agaga na te faafaigofieina mea faigata. E faamalosi i le ua loto vaivai. E faafiafia i le ua faanoanoa. E faamalulu i le loto ua maa'a. E faafealofaniina le feitagai ma le fefulituai. E faalaulelei ma faamafolafola mea ua tau patupatu ma maupuepue i le soifua ma le ola o le tagata.

.....

ASO SA:

16 FEPUARI 2025

MATAUPU: AUA LE FAI MEA TUU

TUSI FAITAU: Jeremia 11:1-8

FESOASOANI MO LE MATAUPU

Tasi lenei o vaivaiga poo faafitauli o loo maua ai le tagata soifua, o le fai mea tuu. Se aua le popole, o lea lava e telē le taimi. Ia a fai uma nei, ao a mea a fai taeao. Ae fai mai le muagagana faa-peretania, *“time waits for no man, tomorrow may never come.”* E le faatali le taimi i se tagata, a misi lava le pasi ua misi lava. E taumate foi i le ete, pe tatou te maua le aso a taeao pe leai. O lona uiga, e le o se mea lelei le fai mea tuu, auā foi, e aliali ai le lē faamaoni o le tagata i ona faiva ma ona tiute tau ave i lea aso ma le aso.

E pei e faapena le agaga o loo aumai e le tusi a Jeremia, o loo ua faapupula mai e le perofeta le ola le faamaoni o le Isaraelu i lona va feagai ai ma le Atua. Ao le lē faamaoni lea, o loo ua fai nei ma agasala e le mafai ona aveesea, sei vagana lava ua salamo ma fo’i i le Atua. O le leaga lea o le fai mea tuu, auā ua faatuatuanai ma faagalo ai e le tagata lona Atua ma le alofa tele na Ia faia mo le nuu, ae ua faasaga e afisi le tupua laau ma le tupua maa.

O le vaega la lenei o le tusi, e peiseai o loo faasea ai le Atua, ona o le fai mea tuu, ma le lē faamaoni o le nuu i le feagaiga na latou osia ma Ia i le mauga o Sinai. Le feagaiga lea na faafesagai ai le Atua ma le Isaraelu, ua Ia faamanatu atu foi ia tei latou le mea ese na ia faia ia Aikupito, faapea foi lona aveina ae oi latou mai le olaga pologa ma faanofo i le

saolotoga. Ua Ia faailoa atu foi ia tei latou, ia tausī i faatonuga ma poloaiga uma ua ia fetalai atu ai, auā afai latou te faia ia mea, e avea i latou ma oloa taua a le Alii, e sili i nuu uma. E fai foi i latou ma malo o ositaulaga, ma nuu paia mo le Atua. O le a le tali a le nuu? “Matou te faia lava mea uma ua fetalai mai ai le Alii.”

Le feagaiga la lea o loo ua tulituli au pu nei e le Atua lona faatinoina, auā foi, ua ese lava le ioe, ioe o le a fai, ae e leai lava ma se mea ua faatinoina. Ioe, ua fia selau tausaga talu ona nofoia Kanana, ua fia foi augatupulaga e fai mai ma mavae atu, o lea lava e faatali le Atua, ae fai mea tuu lava le tagata. Ao le fesili, O le a le faigata ua mafua ai ona le faataunuuina le faatonuga ma le maliliega sa faia?

O le tali, “Ua galo, ua faataatia se’ia i ai se aso. Ua fai mea tuu le tagata, aisea? Le lalolagi matagofie ma ona tuinanauga ua avaga ai le tofa ma le faautautaga, ma ua faapena ai ona faatuatuanai i le feagaiga na osia ma le Atua. Ioe, na ona seei lava o le Israelu i le suamalie o le olaga saoloto, ma ua tali taoto foi le gase o malolo i le anoanoai o faamanuiaga ua na maua, faapea loa, Ah! O le sao la lea. O le a la leisi mea e toe popole ai, fai loa le ivi a le tama a le loomatua latou. Taatia nisi gasu sei fai mulimuli, avane le feagaiga lena e teu sei laga mai taeao. Ioe, e pei e foliga faapena le lagona o le Israelu, ina ua ola i se olaga saoloto.

Talofa i le Atua, lona naunautaiga ma lona faamoemoega mo Israelu i le lumanai ina ia avea i latou ma ave feau o le Talalelei, a ua ā nei? Ia a avefeau, o lea lava e fiu e faatali, a ua fai mea tuu le tagata.

FAATINOVA O LE MATAUPU

Tuu pea le avanoa i tupulaga e faaali ai so latou manatu, sei faasoa o latou lagona i le mataupu, poo se faafitauli, poo se mea lelei lea mea o le fai mea tuu.

AOTELEGA O LE MATAUPU

O le feau la a Ieremia e pei ona i ai le mataupu, o le toe faamanatu lea i tagata le mea lea o loo galo ia tei latou. Le maliliega sa faia ma augatamā ua mavae atu, lea lava e taatia i paga e lei oo i ai se finagalo. Leitioa faaseā le Atua. Ae afai la e faaseā le Atua, sala ina faaseā, afai foi e sa’i, ua tatau, auā foi, o lea lava e faataaloga i vai i le manatu o le Isaraelu le tautoga na fai i le Atua, o lea lava ua manatu e taatia ai pea sei uma mea o loo manao i ai. Ae talofa, ua avea le fai mea tuu o le tagata ma ala o le oo mai o le toasa o le Atua. “Ia malaia le tagata o le na te le faalogo i upu o lenei feagaiga, na ou poloai atu ai io outou tamā i le aso na ou aumai ai i latou mai le nuu o Aikupito.”

E foliga mai o loo faapea atu le Atua, Isaraelu, ua tele lou faalogogata, ua tele lou le usitai, a lea ua e talitane i atua faapaupau, ua e ifo i le tupua maa ma le tupua laau, a ua e lē faamaoni i le tautoga na faia,.

Na ona tumu lava ma ua tau masuasua le agasala, faatafea ma faaunuua i Papelonia. Le fai mea tuu lava lea o le Isaraelu ma le manatu o loo tele pea le taimi e foi ai i le Atua, ae talofa, ua misi le avanoa. O le vaivaiga lea o le fai mea tuu, e toe manatua ane lava, a ua le aoga.

.....

ASO SA: 23 FEPUARI 2025

MATAUPU: O LE LOTO ALOFA

TUSI FAITAU: Filemoni 1:8-25

FESOASOANI MO LE TA'ITA'I

O Filemoni, o le tagatanuu ma le faipisinisi i totonu o Kolose, o se tagata iloga lona tulaga, ma tauoloa i totonu o le sosaiete. E maoae lona tamaoaiga, e fai ana auauna ma ana pologa. Ae o ia foi o se kerisiano. E i ai le talitonuga faapea, o le talaiga a Paulo lea na fai i Efeso, o iina na liliuina ai Filemoni e avea ma kerisiano.

O le tusi la lenei a Paulo ia Filemoni, o se tusi e uiga ese lava mai le tele o ana tusitusiga, aua foi, e le o se tusi e faamanatu mai ai ni aoaoga faamataupu silisili, e pei o le tele o ana tusitusiga.

O lona uiga, o se tusi faatauanau a le aposetolo, ina ia lagona e Filemoni le alofa faa-le-Atua, Le alofa e mafai ai ona liua le ita ma le fia tauimasui i le faamagalo ma le faagalo. O le upu moni lava, e le o pogisa i le manatu o Paulo le tulaga faigata o loo i ai le finagalo toatamai o Filemoni, aua foi, e le logomalie ia te ia le mea ua faia e Onesemo.

O le tu ma le aga a atunuu i sasae, o le pologa lava ia, e faitauina faatasi ma mea totino a le matai. E le lagona sona leo, e le faaalua sona manatu, aua foi, ua faoa ma ua aveeseina lana

aiatatau ina ua avea ma pologa. E le taumate o le mafuaaga lea o le sola ese o Onesemo, ua fiu i le olaga pologa, ua musu e ola saisaitia, ma ua le lava puapuagatia. Ioe, ua fia maua e le tagata se saolotoga. Peitai, o le sola ese mai o se pologa mai lona matai, o se agasala matuia tele lea, o lona tau lava, o le oti. Atonu o le ala lea o le agai o Onesemo i Roma, ina ia omia faatasi ma le anoanoai o tagata, ma lilo atu ai i le vaai. O lona uiga, o le faamoemoe o Onesemo, ia fai le taulaga i Roma ma nofoaga e leiloa ai, peitai, ua le leiloa i Roma, ae na maua ai o ia e le alofa tunoa o le Atua. O le a le tala? Liua e fai ma kerisiano. Aisea? Aua ua ia molimauina le silisili ese o le alofa o le Atua i lona lava olaga faatauvaa.

Le alofa lea o loo tulituli matagau nei e le aposetolo e ala i lana tusi ia Filemoni. *“O lenei, e ui lava ina ua ou faamalosi e poloai atu ia te oe ona o Keriso i mea e tatau, ae ou te aioi atu ia te oe ona o lo’u atalii o Onesemo, o le na fanaua e au, ao noanoatia au. Sa le aoga o ia ia te oe, ao lenei e aoga tele ia te oe atoa ma au. Ou te faafoi atu ia te ia; ina e talia mai o ia, o lo’u lava tino ia”*

O le upu moni lava, e le itiiti se suiga ua maitauina e Paulo ia Onesemo talu ona la mafuta. Ua le o toe iai le Onesemo tuai e pei ona silafia ma iloa ai o ia e Filemoni, a ua avea nei ma Onesemo fou, ina ua fanaufouina o ia e ala i le Agaga Paia. I le manatu o le aposetolo, e le taua ia te ia poo ai e sao ao ai e sese, ua ia le manatu foi i le tuanai, a ua vaai i le taimi nei ma le lumanai, ae o loo maualuga pea i lona manatu le tulaga tutusa o tagata uma ia Keriso.

Ai lava na manatu le aposetolo e taofi mau ia Onesemo aua e aoga ia te ia i le galuega, peitai, o le faaeteetega o loo iai, ina nei ona taofi faamalosi ia Onesemo, ae feteenai ai ma Filemoni,

i le ma lea, o le faasinoga lava a le tulafono faa-Roma, o Onesemo, o le pologa ma le mea totino a Filemoni. O lona uiga, e tatau lava ona faafoi le pologa i lona matai.

O le ala lea o le talosaga, *“Na ou loto ina ia taofi pea o ia ma te nonofo ma au, ina ia fai ma o’u sui, na te auauna ia te au i ou noanoataga ona o le Talalelei. Ae ou te le fia faia se mea e tasi, pe a le to mai sau pule. Ina nei pei o se mea ua faatauanauiina lou agalelei mai, a ia faia ma le loto.”*

E taua foi a le uia lelei o ala o mea, ae uia foi i le agaga ma alofa faa-le-Atua e pei ona i ai le talosaga a le aposetolo.

FAATINOGA O LE MATAUPU

Manaia ae tofi mai sui o le autalavou e faatino le tala, ina ia manino atili ai le uiga moni o le mataupu o lenei aso sa. O le alofa e lagona i le loto, o le alofa lava lea faa-le-Atua. E le gata o le malamalama ai o le mataupu, ae lagona ai foi e tupulaga talavou le taua o le lagona o le mataupu i lenei aso sa.

AOTELEGA O LE MATAUPU

I le aotelega o le mataupu, e moni a e pule pea le matai i lana pologa, peitai, o le pito laau a le tagata alofa ma le tagata kerisiano, o le fautua ma timai ina ia faamuamua pea le faasinoga a Keriso e pei ona ia faia mo le lalolagi. O le a lea faasinoga? Faamuamua le alofa, ia faavae mea uma i le alofa faa-le-Atua. O le upu moni lava, e le o fia faaaogaina e le aposetolo le mafanafana o le la mafutaga ma Filemoni e fao malo ai ia Onesemo. A ua tuu pea le avanoa e fai ai le filifiliga

a le tagata. Pau lana e fai, o le a faamoemoe lea i le mana o le Agaga o le Atua na te faasusulu atu lona malamalama e faamalamalamaina ai le loto ua pogisa, e faafilemuina le loto tuga ma le fia tauimasui, e faagalo ai le ita ma le inoino, ae faatotogo ae le moemoe fou o le alofa e lagona i le loto, e mafai ai e le tagata ona faamagalo ma faagalo e pei ona finagalo ai le Atua. I a faapena foi ona lagona e tatou tupulaga talavou le taua o lea mataupu ma lea foi tala i lo tatou soifuaga o loo tatou ola ai nei.

.....

ASO SA: 02 MATI 2025

MATAUPU: FILIFILIGA

TUSI FAITAU: 1 Tupu 1:5-10

FESOASOANI MO LE TA'ITA'I

O le ata o le tagata ua fai lana filifiliga, mo ia lava. Ua nofo lava Atonia ma fai mai, o ia o le a nofo-ia le nofoaiga a lona Tamā o Tavita, ma o le a avea ia ma tupu o Isaraelu. Ae e i ai le manatu e sa'o fo'i Atonia pe a tuu i tu ma aga faa-Isaraelu, auā o ia o le ulu-matua, ma e tatau ona maua uma e ia tofi ma tamāoaiga a lona Tamā.

Ae na sēsē Atonia i le auala na fai ai. Ua ia saili fesoasoani i 'au tau tuai a Tavita, ae le'i se'i saili i le Atua le filifiliga tonu, a ua ia taumafai ai e faoā le nofoaiga Tupu. Peita'i, o lona

faamaualuga ma lona mimita...o lona faatoilaloina fo'i lena. E iloa i le 'aiga sa fai ma ana 'au tau, ua valaaulia uma ana uo, ae le'i valaaulia-ina lona uso ma lona Tamā.

Faapea Atonia o ana galuega ma le osiga o taulaga i manu, e faamau-ina ai lona avea ma Tupu o Isaraelu. O ana faatinoga ma ana filifiliga, o le faamalieina lea o ona lava mana'o.Maimā-u ē pe ana toe mafaufau lelei Atonia i ana filifiliga na fai. Se'i toe manatunatu, poo ai mo'i e ana le nofoaiga faa-Tupu a Isaraelu. O le Atua lava Ia, o loo i ai le Pule aoao ma le malosi uma lava, na te faaeaina, ma faatoilaloina.

Sa nofo lava Atonia ma faaeaea lona ia tulaga faa-Tupu, ae na oo ai lava ina toatuli i luma o Solomona, le Tupu ua filifilia e le Atua.

Ua ia nofo ma u'u mau le fata faitaulaga. O le fata fai-aulaga i na ona po. Sa sasa'a ai le toto e faailoa ai le taulaga ua osia ina ua salamō, ma sulu ai le tagata agasala mo se fesoasoani.

O le Agaga maualalo lea sa manaomia e Atonia mai le amataga. E ui lava i le matuiā o le mea na faia e Atonia, na faasao lava lona ola, ina ia toe afua se taeao fou.O foliga alofa ia o le Atua, o loo faatalitali mai, ina ia toe foi ia te ia, ma le loto salamō, ma toe faaeaea ia i latou.

O le eseesega na o Solomona ma Atonia. Mai lava i le amataga o le mataupu lenei, e le'i tautala lava Solomona, vaga-na le faaiuga o le tala.

E le'i mimita foi Solomona ma tau-mafai e faoa le nofoaiga o le Tupu, ae na tautua ma le leai o se leo. E le'i avea le tele o tala a lona Tamā, ma le vāvāō o Isaraelu atoa...e faaalua ai ni ona lagona. Ae na alu lava Solomona ma le loto maualalo ma le

filemu, ina ia mafai ai ona ia lagona-ina le musu-musuga o le Atua.

E oo foi ia Tavita, ua silafia lelei e ia, ua filifilia e le Atua Solomona e fai ma Tupu, e pei ona fai mai ai upu nei:

“Ia faafetaia le Alii le Atua o Isaraelu, o le ua foa’i-ina mai i le aso nei o le tasi e tietie i lo’u nofoāli’i, o loo vaai atu i ai o’u mata”

E malamalama foi Tavita, auā o ia foi e lei filifilia ona o tu ma aga faa-Isaraelu, auā o ia o le ui’i...ae na filifilia o ia, auā ua silafia e le Atua lona loto.

FAATINOGA O LE MATAUPU

Tuu pea le avanoa i tupulaga e faamalamalama ai le taua o le filifiliga fai.

AOTELEGA O LE MATAUPU

I le aotelega o lenei mataupu, o loo manino ai lava le filifiliga e fai i le malosi o le fia iloa, ma le faasiliaupule i saofaiga i totonu o aiga, nuu ma e oo a foi i le ekalesia, o loo tupu ai foi. O lona uiga, o se feau taua lea ma le lelei ina ia aoaoina ma tapena ai le ola o le talavou i le taua o lana filifiliga e faia i le taimi nei, aua ona o le malosi ma le atamai, ae ia faia faatasi ma le fesoasoani mai o le agaga o le Atua, ona lelei ai lea, faapei o Tavita ma Solomona.

.....

ASO SA:

09 MATI 2025

MATAUPU: O AI LO'U TUAOI?

TUSI FAITAU: Mataio 22:34-46

FESOASOANI MO LE TA'ITA'I

O ai lo'u tuaoi? O le tali faigofie lava, O le tagata o loo i ou autafa. Ma o le tali sao lava lea aua foi, o le tuaoi, o le laina e vase i le va o le tasi ma le isi, poo le laina e tosi i le ogatotonu e faailoga ai le mea e gata ai le fanua o le tasi ae amata ai le fanua o le isi. O tuaoi foi ia e le mafai, le mafai ona sopoia e se tasi aua foi, o le taimi lava e sopo tuaoi ai le tagata, vevesi loa ma le mea. E le gata la i tuaoi ia o fanua, ae e i ai foi tuaoi faale-tagata lava ia poo personal spaces tatou te le mananao e sopoia mai e seisi. O tuaoi e le faigofie ona talepeina.

Peitai, ua avea tuaoi nei ua faia e tagata ma ala ua punitia ai le vaai a le tagata i tala atu o lona lava siosiomaga. Ma o le faafitauli lea o loo tupu nei i totonu o le nuu o le Atua, ua avea tulaga ma tofi, ua avea foi le tamaoaiga ma le manuia, ua pei o ni pa sima ua le mafai ai ona faatino se galuega alofa ma se fesoasoani mo e ua mafatia ma puapuagatia. O mea uma foi ua faia, ua faia lava mo lona lava lelei, ae ua le faia mo se manuia ma se lelei mo isi.

Peitai, o le afio mai o Keriso ma a'oa'o atu, o se mea na matua faateia ai le toatele o tagata aemaise lava i taitai o le lotu, auā foi, o aoaoga a Iesu, e foliga e fete'enai ma faasinoga a le tulafono.

O le tala lea na tatou faitauina, o le maea ai lea o le faafesagaiga a Iesu ma le au satukaio e uiga i le mataupu o le

toetu o e ua oti. Le fesagaiga lea na matua faamalamalama ai e le Alii, le pogisa o le au Satukaio i le mataupu o le toetu. O le le magagana la o le satukaio, atonu o le mafuaaga lea o le fesili o le a'oa'o tulafono, o le fesili tofotofo sei vaai pe mafai e le Alii ona tali mai ia te ia. "Le aoao e, o le fea o poloaiga oi le tulafono ua sili?

E le taumate o se uiga le lelei na afua ai ona fesili le a'oa'o tulafono, pe a manatu i le va o le au satukaio ma le au faresaio, peitai, e le taua le va lea, ae ua faatauaina e Iesu le fesili sei faailoa atu ai nisi o mea o loo vaivai tele ai le soifua ma le ola o le tagata i lona va feagai ai ma le Atua.

O le tali la a le Alii, e tali lava i luga o le tulafono. Le tulafono o loo faamauina i le Teuterenome, "Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa." Le va feagai ai lea o le tagata ma lona Atua, e le faatuaomia ai e le Atua lona alofa mai, ae faasafua e aofia ai le lalolagi ma tagata uma. le tulafono muamua lea, ae fai mai Iesu, o le tulafono e lua e faamautuina ai mea uma, "ia e alofa i le lua te tuaoi ia pei o oe lava ia te oe." O le tulafono faa-auro lea o le alofa. Alofa i le Atua, alofa i le tuaoi.

O lona uiga, e le mafai ona moni ma faamaoni le alofa, e le mafai foi ona atoatoa pe afai e fai leisi ae faataatia leisi. Talofa i le a'oa'o tulafono faafiapoto, e sau ma si ona tamai iloa, ma le manatu na te mafaia ona tofotofo i le Alii, ae ua a nei? Ua na o le faalologo lava ma le ofo i le maoae o le tali mai a le Alii.

FAATINOVA O LE MATAUPU

Faamalosiava lava le tuu o le avanoa i tupulaga e faasoa ai o latou lagona e uiga i le tatou mataupu.

AOTELEGA O LE MATAUPU

I le aotelega o le mataupu i lenei Aso Sa, poo le a lo tatou faimai tatou te alolofa i le Atua, ae e ita i lou uso, poo soo se tasi lava o lou tuaoi i le va tagata, ona o tulaga ma le tamaoaiga ua tele. Talofa, ua e leiloa lou tuaoi i le manatu faakerisiano, ma aoaoga a Iesu Keriso. Ia e alofa atu i le Atua ma lou tagata atoa..... ia faapena foi i lou tuaoi.

.....

ASO SA: 16 MATI 2025

**MATAUPU: E FAAPE’Ī AMIOGA E TATAU MA LE
KERISIANO?**

TUSI FAITAU: Kolose 3:18-4:1

FESOASOANI MO LE TA’ITA’I

O le faa-kerisiano, o le soifuaga o aso uma, o le olaga i taimi uma. Poo le a lau mea e fai, o fea foi e te agai i ai, e te fealuai lava, ao oe o le kerisiano, pe e te taalo, pe e te aoga, pe e te

faigaluega, poo le a lava, ia manatua, o oe, o a'u, oi tatou uma, o tagata kerisiano.

I le manatu la o le aposetolo o Paulo i le Ekalesia i Kolose. O ni nai ana fautuaga ma timaiga, i amioga e tatau ma le kerisiano, o ana lapataiga e faatatau i le olaga e tatau ona ola ai e ua ta'ua o tagata o le Atua, auā foi, o lea lava e iloa e Paulo, o loo agai pea manatu ma lagona o tagata i tu ma agaifanua sa masani ai. O lona uiga, e le faigofie le mataupu lea e tautala i ai Paulo. A faigofie faapefea, o le tu ma le aganuu a le Iutaia lea ua lu'i e le aposetolo. Peitai, e ui ina faigata ae na le mafai ai ona tuua le agaga faufautua o Paulo. Lea e amata mai ai i totonu o le siosiomaga o aiga, i matua ma fanau. "O outou fafine, ia outou usiusitai atu ia outou lava tane, pei ona tatau i le Alii. O outou tane, ia outou alolofa atu ia outou avā, aua foi nei faaonoono ia te i latou."

O le upu o loo faaaogaina e le Tusi Paia palagi o le submit, Wives, submit to your husbands as to the Lord. Atonu la o le a le afaina pe afai tatou te suia le upu usiusitai, i le upu gaua'i. O outou fafine, ia outou gaua'i atu ia outou lava tane, pei ona tatau i le Alii." Poo le a le suiga ao le a foi le faaliliuga o le upu, pau lava le agaga o le aposetolo, ina ia mafai ona ola fesootai le tamā ma le tinā i totonu o le aiga, aua nei avea le tamā ma pule, aua foi nei avea le tinā ma pologa, a ia ola fealofani, ia i ai le alofa e faapalepale ai le tamā i le tina, e faapena foi ona i ai le alofa e gauai ai le tinā i le tamā i mea e lelei ae le o mea leaga, auā foi o le finagalo lea o le Atua.

E faapena foi le tulaga o le fanau, i le va nonofo ai ma matua, e taua le faalogo ma usitai. Ioe, poo le a le maoae o le tulaga e oo i ai le atamai o le tamaitiiti, e sili lava mea e iloa e matua, auā

foi, ua uma ona ui mai ai, ma e leai foi se matua e manao e a'oa'o sana fanau i mea e leaga ai, nao mea e lelei ai. Ao matua foi, aua tou te faatiga ia outou fanau, be positive, a ote ma faatonu le tama poo le teine, constructive language e faaaoga, sole, suga, o le mea lea e faapea ma faapea, ae le o le destructive language, se matua e valea tele. Ioe, e taua I le manatu o Paulo le lelei o aiga, auā foi, a lelei aiga, o le a faapena ona lelei le nuu, o le a faapena foi ona manuia ai ma ola le galuega a le Atua.

FAATINOGA O LE MATAUPU

Faatalanoa le Tusi Paia, ma fefaasoa'i i nisi o aoaoga, mai i le Feagaiga Tuai ma le Feagaiga Fou, o aoaoga e uiga i amioga e tatau mo le tagata kerisiano. Ina ia faalautele ai le tatou mataupu i lenei Aso Sa.

AOTELEGA O LE MATAUPU

O loo manino a aoaoga a le aposetolo e uiga i tu ma aga e tatau ma onomea mo le tagata kerisiano. Amata mai lava i ulu o aiga, seia oo i fanau, ma tagata uma, ina ia manino ma malamalama i le taua o le iloa lelei ma le mautinoa, o amioga, poo tu ma aga a le tagata kerisiano.

.....

ASO SA: 23 MATI 2025

MATAUPU: O LE LOTO FAA-KERISO

TUSI FAITAU: 2 Korinito 4:16-5:7

FESOASOANI MO LE TA'ITA'I

O le manulauti lea o le faamalosi a Paulo i le Ekalesia i Korinito. O le faamalosi a le aposetolo ina ia aua nei loto vaivai. O lona uiga ia toa le loto....ma ia u'u mau i le faatuatua tainane le lofia i faigata ma fita o le ola talitonu i le Talalelei. E tolu ni itu fia fa'amamafaina o lo'o foliga e aga'i i ai le faamalosi a le aposetolo.

- **Muamua** – 'Aua le loto vaivai....aua e ui ina uma ma vaivai le tagata i fafo, ae faafouina pea le itu i totonu...o le loto lea'

O loo tautala le aposetolo i le tino faaletagata e le tumau..... Ae o le tino e faasolo ina matua ma i'u ina pala.

Peita'i o le vaaiga i fafo....ua na o se ata o le ituaiga ola sa feagai ma le tagata. O le gasologa o le olaga i ona tulaga uma...mai le fanau mai, seia tagata matua.....ma o'o mai le vaivai. Ae o le **loto** o le tagata...lea e talitonu le aposetolo e mafai ai ona faafouina pea. Faafouina aua o le nofoaga lea e afio ai le agaga o le Atua.....e una'iina le vaivai o le tino....ma faamalosiau i le mafaufau.

Fai mai le faamanatu a le aposetolo ia Korinito.....e ui ina o'o le tino vaaia i lea itu....ae o le loto i totonu o lo'o faafouina

pea....O le loto o lo’o faafouina i le faamoemoe fou o le tagata talitonu.....Le loto lea ua ia Iesu, e ui ina vaivai le tino i fafo.....ae malosi pea totonu.

Na faia e le Atua i tatou e tofu le tagata ma lona nafa ma le faasinomaga. A’o lona faamoemoe sili....Ia iloa ona ola talitonu ma faatuatua. Le ola lea o lo’o avatu ai le faamalosi a le aposetolo.....e faamalosia ai le loto ma le agaga....e ui i se vaivai e o’o i ai le tino ma foliga vaaia. Le malosi fou lea e puna mai totonu.....aua ua fa’afouina e le Atua mo le tagata e talitonu moni i lana faaolataga.

- **Lua** – ‘Aua le loto vaivai.... aua i totonu o puapuaga, e vave mavae, e saunia ai le mamafa o le mamalu faavavau, e silisili ese.

Lea ua tu’u feagai e Paulo le mamalu e maua e le tagata e tali tigā. O tigā o lo’o feagai ma le au-Kerisiano.....e uma ma mavae. A’o le tau e maua e le tagata e tumau le loto ma le agaga e ui i puapuaga....e matua silisili atu...ma e faavavau. O loo faaogaina e Paulo le upu ‘mamafa’, pei e tau le fetui i le faalogo, pe a o faatasi ma le mamalu. Peita’i, o lea ua ave le mamafa i le mamalu, ina ia faatusa ai le puapuaga feagai ai ma se mea faigofie. Faigofie aua ua i ai le loto faaKeriso.....ua pei ai ona puapuaga o se mea mama....pe a faatusa i le mamalu e maua mai le Atua.....O le mamalu e maua foi e le tagata ua talitonu moni. O lona uiga.....o le loto e talia ai ma le talitonu o puapuaga e mavae.....ma uma....ona ‘ae’ae ai lea o le tagata faatuatua...i le mamalu o le Atua e faavavau.

- **Tolu** – ‘Aua le loto vaivai.....aua e mafai ai ona iloa e mata faaleagaga.. mea e lē vaaia i la le tino.

O le faamamafa atoa lea o le augani a Paulo mo lana fanau fa’ale-āgaga i Korinito.... Ina ia aua nei gata le silasila tau o mata faaletino.....’ae ia iloa foi mea e o latou mata faaleagaga....Auā o le ‘auga lea o le silasila faale-Kerisiano.....ua uma ona faailo i ai e Iesu le malo o le Atua ma le ola e faavavau....Afai la e moni le talitonu i le faaolataga....ona le tauaso lea o le vaaia fa’ale-agaga...i mea tau le ola e faavavau. E faafouina ai le silasila ma inoino ai mata i mea e tupu ai le agasala...E faigofie ai ona o tatou iloa....o le poto ma le malosi ua tatou maua.....e lē sō tatou lea.....a’o mealofa foa’i fua mai e le Atua....ina ia o tatou iloa ai ona toe ola vivii atu ia te Ia. Ia lē na o le taimi ua o’o mai ai puapuaga ia i tatou....ae o taimi uma o le ola. O le ala lea o le faamanatu a Paulo mo Korinto.....ina ia aua nei loto vaivai....aua o le tagata ua ia Keriso....o le tagata fou.....ua pupula ma iloa mea e le vaaia.....ina ua matala mata faaleagaga o le loto.

FAATINOGA O LE MATAUPU

Faatalanoa le mataupu ma lona taua, i le fesootaiga ma le olaga o loo ola ai tupulaga i onapo nei. Poo le mea ea o loto ia Keriso, poo i ai seisi mea o le olaga nei o loo nanau i ai le loto o tupulaga?

AOTELEGA O LE MATAUPU

Tele o upu ma timaiga e agiga pea i la tatou faalogo....Faamalosi, onosai, 'aua le faavaivai ma faalogologo tiga, o ou mama na....

O upu e u'unaina ai le tagata..... E fa'alototele ma fa'amalosi loto....ina ia tau lau o le faamoemoe. O le faamoemoe ua tuua ai Ekalesia, nuu, aiga, uo ma ē masani, aemaise matua.... ona o lou ma lo'u fia molimau i le talalelei ia Iesu Keriso.

O nisi taimi ua tele isi leo... Leo e tau sau ai le musu ma le fiu gofie.....E vaivai ai le mafaufau ma le tino. A'o le loto moni faa-Keriso, e mama ai le avega.....aua o loo faatali mo i tatou...le mamafa o le mamalu o le Atua...ua uma ona saunia e Iesu

O le tuualalo a le aposetolo o Paulo..... 'aua ne'i vaivai ai le loto. Aua o le loto e afio ai le filemu o le Atua... O le loto lea e mafai ona pulea le mafaufau ma le tino.... E mafai ai ona tete'e atu i tiga ma faigata o le olaga...ae tulimatai le sini o le faamoemoe.

O le loto e ui ina vaivai le tino ma le mafaufau.....ae taumafai pea.....aua e silasila ma alofa mai le Atua i le tagata e vaivai taumafai... Le tagata e loto maulalo ma tautino.....o le Atua e ana mea uma. O le Atua e ona le malosi ma le atamai ina ia mafai ai ona toe faafoi atu lona viiga. O le loto lena Faa-Keriso

.....

ASO SA: 30 MATI 2025

MATAUPU: ALUESE MAI LE LEAGA

TUSI FAITAU: Esekielu 22:23-31

FESOASOANI MO LE TA'ITA'I

O le tala faasolopito o le nuu Isaraelu, o le tala faasolopito foi lea o le faaolataga a le Atua, auā foi, o le valaauina ma le filifilia o Isaraelu e fai ma nuu o le Atua, o le valaauina ma le filifiliga o loo i ai faatasi ma le finagalo o le Atua, ina ia fai i latou ma ala e ui mai ai lana faaolataga i le lalolagi ma le fanau a tagata. O lona uiga la, e ao lava i le Isaraelu ona amatamea i mea lelei, e ao i le Eperu ona fai ia ma taiala i amioga lelei ma uiga matagofie e tusa ma le finagalo o le Atua.

Peitai, ua le o lea. Ua le fai o ia ma faataitaiga lelei i le lalolagi, a ua fai ma taiala o le leaga ma le matagā. Ua ai ulu tuanai taisi, ua maua ula futifuti. A lea ua fai lava le mea e loto iai le tama a le olomatua. Peitai, o le alofa ole Atua e le mafai lea ona tea ese male tagata, poo le a le piopa, ao le a foi le leaga e oo iai le tagata, e alofa mai pea le Atua. Lona alofa lea na ia muai auina mai ai perofeta latou te talai atu le salamo, liliu mai le leaga o loo latou faia ona faaolaina lea oi latou, ae afai e leai, o lona iuga lava, o le oti ma le faatafunaina e oo mai.

E faapena le agaga lea o loo tautala ai le perofeta o Esekielu i le mataupu lenei e 22. E i ai le talitonuga faapea, o le vaitau tonu lea o le nofoaiga a le tupu amio leaga ma le amio valea o Manase. Manatua foi, o Manase, o le atalii o Esekia le atalii o Aasa. O Aasa, o le tupu lea na matua maoae ma ogaoga ana mea leaga na faia ao avea o ia ma tupu o le malo Iuta. O lona uiga, o ia lea na ia ofoina atu lona atalii e osi ai lana taulaga i

atua faapaupau. O ia foi lea na ia tapunia faitotoa o le malumalu ae osi taulaga i atua faapaupau i luga o atumauga ma mea maualuluga.

Peitai, o le tulai mai o Esekia le atalii o Aasa e tauave le nofoa o le malo Iuta, na ia faia ai se suiga i totonu o le nuu, ua ia toe tatalaina le faitotoa o le malumalu, ua ia faatonuina foi le au ositaulaga ma le au sa Levi e toe faatino tapuaiga i le Atua, ia pepese ma vivii i viiga o le Atua i totonu o sauniga taitasi e faatinoina, ma ia toe foi i le ositaulaga i le Atua e pei ona sa masani ai i aso ua mavae.

Ua le gata la i lea, a ua ia talepeina tupua laau ma tupua maa sa tutu solo i totonu o le malo e aofia ai ma le tupua o Asaira. O le gata apamemea foi lea sa fai ma faaola i le nuu pe a utia seisi e se gata i le vaitaimi o Mose, na matua ninii lava, aua foi, ua leva ona uma le aoga o lea mea, ao lea lava e fai iai valea o le Isaraelu. O lona uiga, na matua ogaoga le toe fuatainaina o le itu faale agaga o le malo Iuta ina ua tulai mai Esekia. Ua le gata la i lea, ae na faapena foi ona matua maoae ai ma le tulaga tau le tamaoaiga ma le manuia o le malo.

Ae talofa, e lei umi lea lelei, auā foi, o le taimi lava na moeiini ai mata o Esekia ae soloai ane lona atalii o Manase i le nofoalii, o le taimi foi lea na toe foi ai le olaga o le malo i le leaga ma le mataga e pei ona i ai i le vaitau o Aasa. O le mea e ofo ai, ona e iai le talitonuga faapea, o le sefulu lua o tausaga o Manase na nofo lua ai ma lona tama i le nofoalii o le malo Iuta. O lona uiga, o mea uma na faia e Esekia, na fai lava ma le mautinoa, o le a faapena ona mulimuli ma tausisia e lona atalii. Ae talofa, matua ese lava le alafua ma le faasinoga a Esekia, ese le alavaa

lea ua agai iai le atalii. O lona uiga, ua le solisoli mulivae ile tamā, ae ua faataitai i le ala o le tamā o lona tamā.

Fai mai le molimau a le tusi o Tupu e lua mataupu e luasefulu tasi, ua na toe faia mea maualuluga sa faaumatia e Esekia lona tama, ua faia foi fata faitaulaga o Paala, toe fausia le tupua o Asaira, ua ifo foi i au uma o le lagi, ma auau iai. Ua ia faia foi fata faitaulaga i le fale o le Alii. Ua ia faia foi fata faitaulaga mo au uma oa le lagi ilotoa uma e lua o le fale o le Alii, ua ia faau ane lona atalii i le afi, ua iite foi i ao o le lagi, ma fai togafiti faataulaitu, ua saili foi i aitu vavalo, ma taulaitu. O le tupua foi o Asaira ua ia faatuina i le fale e tuu ai le suafa o le Alii e faavavau.

O lona uiga, e ogaoga ma mata'utia mea leaga na faia e Manase i lona tulai mai i le nofoa o le malo Iuta. Auā foi, e le gata ina ia faia ia mea, a ua faapena foi ona ia faatonu le nuu ina ia latou faia le amio leaga. A lea fai mai, ua fouvale perofeta, ua latou faaumatia tagata, ua latou fao i oloa ma mea taua, ua latou faatoateleina foi fafine ua oti a latou tane. O faitaulaga ua latou soli le tulafono a le Atua, ma ua latou faaleaga foi i ana mea paia. O amioga ia atoa ai ma le tele ma le anoanoai o mea leaga ua faia e le nuu ua afua ai le aoai atu o le perofeta o Esekielu.

Auā foi, ua matuā ogaoga le faaletonu o le nuu i lona va feagai ai ma le Atua, ma o le upu moni lava, e laki pe a iai se avanoa e mafai ona faasaoina ai i latou, peitai, e le mafai ona mavae le alofa tulituliloa ma le alofa saili mai o le Atua.

FAATINOGA O LE MATAUPU- Talanoa

Tuu le avanoa i tupulaga e talatala ai le ato ponapona o manatu faasoa e uiga i le taua o lenei mataupu i le olaga o le talavou, ma le soifuaga e tatau ona ola ai.

AOTELEGA O LE MATAUPU

O le valaau la a le perofeta o Esekielu, o le valaau alofa lea a le Atua i lona nuu. Salamō, liliu ma fulitua i le leaga, ona faasaoina lea o i latou, ae a leai, e matuā iloga ona mafatia ma tigaina i le faasalaga ma le faamasinoga e oo mai. O lona uiga, e lē fo’i fua le toasa o le Atua, e ao lava ina taunuu, auā foi, ua fiu e saili i totonu o le nuu se tagata e sao ma tonu le amio ua leai lava. Peitai, e mafai ona faasaoina ma faaolaina le tagata ma le nuu, pe afai e lagona le salamo moni, faamaulalo ma faatoese i le Atua, ona o le leaga ua faia, fulitua ma liliu, faasaga i le Atua ma le faamaoni. A o le faamanatu foi lea mo i tatou tupulaga. Aluese mai le leaga o le lalolagi, ona faasaoina lea o le ola.

.....

ASO SA: 06 APERILA 2025

MATAUPU: FA’AMAE’A OU FAIVA

TUSI FAITAU: 2 Timoteo 4:1-8

FESOASOANI MO LE TA’ITA’I

O le vaega o le tusi lea na tatou faitauina mai le Feagaiga Fou, o nisi ia o upu faamafanafana, o upu faalaeiau, o le faalototele a le aposetolo, ae le gata i lea, ao fautuaga ma timaiga a Paulo i lona atalii faa-le-agaga o Timoteo, e tusa ma le galuega lea ua aga atu nei iai le taulealea talavaou. Ao le fesili la, O ai Timoteo? O Timoteo, o se tamaitiiti e ese lava le auau ma le naunau i ai o le manatu o le aposetolo, auā foi, ua loaloa tausaga o maitauina e Paulo le ola tuputupu ae o le tama lenei. Ma e foliga mai o se tagata ua matua ma malosi lona faatuatua i le Atua e ala i le fiafia e faalogologo i aoaoga a le Alii. Ma o fua ia o le galuega tele sa feagai ma le loomatua o Loi faapea Eunike lona tina. Le galuega o le tapueina ma le faafaafaileleina o le ola faale faatuatua o le tama, ina ia tupu ma ola ae, avea o ia ma tagata faatuatua, tagata talitonu atoa ai ma le alofa faamaoni i le Atua. E pei o uiga ia ma le olaga o le tama lenei, na afua ai ona alofagia e Paulo ma ia manatu ai e faaoga le taulealea i le galuega a le Atua.

O tusi la e lua a Paulo ia Timoteo, o tusi na tusia e le aposetolo mai totonu o le potu taofia i le fale puipui i Roma, ao avea ai Timoteo ma faifeau o le aulotu ma le ekalesia i Efeso. E iai le talitonuga faapea, ua afua ona tusia e le aposetolo tusi nei, ona ua ia maua tala, ua amata ona faavaivai le faifeau talavou i le faatinoina o lana galuega. Peitai, e le o mailoa pe aisea, o loo manatu nisi, ona o le alofa o Timoteo ia Paulo ma mafatiaga ua oo ia te ia, ae le gata i lea, ao le faamalumalu mai o le tele o faafitauli o le galuega tala'i ua tau solomuli ai le ola faatuatua o Timoteo.

O le tusi atu la a Paulo, o le tusi faamafanafana, o le tusi faalototele ia Timoteo ina ia tumau i le faatuatua, faalagolago i

le mana fesoasoani o le Atua, ma ia ola i le mafanafana o le Keriso toetu, ona maua lea e ia o le malosi e faatini ai le tausinioga e pei ona filifilia ma valaauina ai o ia e le Atua. *“O lenei, ou te matua fai atu ia te oe i luma o le Atua ma le Alii o Keriso Iesu, o le na te faamasinoina o e ola atoa ma e ua oti, ia e talai atu le upu, ia e faamalosi i ona aso e taugalemu ai, ma ona aso e le taugalemu ai, ia e faatonu atu, ia e aoai atu, ia e apoapoai atu ma le onosai uma atoa ma le aoao atu.”*

O upu o le alofa moni, o le gagana o timaiga, ae o fautuaga foi mo le loto ia malosi. I le manatu o Paulo, e leai lava se mea e popole ai fua le mafaufau o Timoteo i lona i ai i le falepuipui, atoa ai ma mea ua tutupu mai, auā foi, e le mafai lava ona alo ese le galuega mai fita ma faigata o le valaauina. Pau le mea taua, o le faatino ma faaauau le galuega e pei ona finagalo ai le Atua. O lona uiga, fai pea le galuega talai, fai le galuega faamafanafana, faalototele i taimi o tiga ma puapuaga. Aoai ma faatonu i mea e lelei ai atoa ma mea e leaga ai. Apoapoai i mea e manuia ai atoa ma mea e malaia ai, ia aoaoina foi tagata ina ia latou iloa le alofa tunoa ma le agalelei tausii mai o le Atua ia tei tatou.

“Ao o oe, ia e faautauta i mea uma lava, ia e onosai i mea e tiga ai, ia e fai le galuega a le folafola le talalelei, ia e matua faaiiina lau faiva.”

FAATINOGA O LE MATAUPU

Tuu le avanoa i tupulaga e tatala le uiga o lenei manatu autu i so latou manatu, ma feaasoaa’i ai lagona ina ia faalautele ai le

mataupu ina ia o'oo'o i o latou loto le tāua o fa'amae'a lelei o soo se galuega e fai.

AOTELEGA O LE MATAUPU

I le aotelega o lenei mataupu, malamalama lelei Paulo ile galuega ma mea ia o loo atugalu ai le taofi o Timoteo, aua foi, o le galuega na ia galue ai. O le galuega na ofo ai lona soifua mo le Atua. Afai tatou te vaai faale mafaufau i le faatinoina o le galuega faamisiona a Paulo, se e ofo a le loto, aua foi, e le o ia o se tagata malosi, peitai, e ui a ina ma'i ma le atoatoa le malosi, ae na filiga lava e faatino le galuega. E ui foi ina fai ma faamaamulu nisi na latou galulue faatasi, ae tumau lava Paulo, e taumafai pea, finau ma le faamaoni, tauivi ma le filiga, e ui foi ina tulitauta ma teena i nisi o nuu na asiasi iai, faafalepuipuiina i nisi o aai, ae lei solomuli foi ai lana molimau.

O le a le tala? Anonoai le tele o tagata ua faaliliuina mai talitonuga faapaupau i le olaga ua faakerisianoina. Le masino le tele o ekalesia ma aulotu ua faatutuina ma faavaeina. Aisea? Aua sa tumau i le faatuatua, sa faalagolago i le mana fesoasoani o le Atua, ma sa malu foi ma ola i le paolo ma le mafanafana o le alofa o le Keriso toetu. Pau a lea o le auala na maua ai e Paulo le malosi e faatino ai lana galuega seia oo i le iuga. A lea fai mai lana tautinoga. *“Ua ou tau le taua lelei, ua iu ia te au le tausinioga, ua ou taofi i le faatuatua, o lenei, ua teuina mo au le pale o le amiotonu.”* E ese le manaia o le tau i e maua e le tagata e faamaea ma faauma ona faiva alofilima.

.....

ASO SA: 13 APERILA 2025

MATAUPU: O LE TAGI TIGĀ

TUSI FAITAU: 1 Samuelu 1:1-16

FESOASOANI MO LE TA'ITA'I

O le vaega lenei o le tusi sa faitauina, o le tatalo ma le tagi atu a le tagata i lona Atua mo se fesoasoani. Ae o le tala i le tamaloa o Elekana ma ana ava e toalua, o Penina ma Hana. O Penina e iai lana fanau, ao Hana, e lei faamanuiaina. Ua avea la le tulaga lea ma mea ua pei e amusia ai Hana i totonu o lo latou aiga, aua foi o le talitonuga lava faa-Isaraelu, o le fanau o tofi lea mai le Alii, o e ua fananau mai, o le tau'i lea mai ia te ia. O lona uiga, o i latou ia e tauaveina ma faaaauuina le igoa o se aiga. o le leai la o se fanau a Hana, ua manatu ai tagata, e le o iai se faamanuiaga a le Atua ia te ia. Ua tuulafoaiina o ia e le Atua.

Le faafitauli lea ua fai nei ma avega mamafa i le mafaufau, ma le loto o lenei tina, auā foi, e lagona le maasiasi i le va ma Penina, ae le gata i lea, e tatau ona lagona le popole i le va ma Elekana ina nei motusia lona alofa ia te ia.

E le taumate na saili fesoasoani solo lenei tina i se auala e foia ai lona faafitauli, peita, ua siliga tali i seu se fofo. Ua le mafai e fomai ma taulasea o le nuu ona togafiti lona gasegase. Ua leai se isi e fesoasoani i ona puapuaga. Talofa i lenei tinā, ua matua

uma lava lona faamoemoe. Ua leai lava seisi sulufaga, na’o le Atua lava.

A lea ua tatalo faatauana, ua tagi atu ile Atua ma le loto mafatia, *“Ia e foai mai i lau auauna fafine se tama tane, ona ou foai atu lea o ia i le Alii i aso uma o lona ola, e le oo foi se tafi i lona ulu”* o le natura lea o le tagata, e vave tele ona tauto ma ofo atu se mea, pe afai o loo iai se mea e manao foi iai. A lea ua tautino lava le solo a le tamaloa. Le Atua, a e foai mai ia te au se tama tane, o le a faapena ona ou toe faafoi atu e auauna ia te oe. le tautoga faa-naseri lea ua faia e le tina, aisea? O le naunau lava ina ia faamalieina lona manao. Le naunau lava ina mafai ona lagonaina le mafanafana o le sootaga vavalalata o matua ma fanau.

Upu fia faataua *“A o le fafine, ua tiga lona loto, ua ole atu le Alii, ma ua tagi tele”* O le tagi o le tina loto momomo, o le faatauana a le tagata ua tumu ile loto tiga, o le tatalo a le tagata ua mautinoa, na’o le Atua lava e maua ai le mapusaga. O le a le tali a le Atua i le tagata e tatalo ma le loto atoa? Tasi le tausaga ae sapaapai i ona lima le tamatane ua foaiina mai e le Atua. O le Atua tali manao. O le Atua e faafofoga i manaoga o lana fanau, e faapena foi ona tali faaaliali mai iai. A lea ua fanau le tama o Samuelu. Samuelu lea na faatonuina e le Atua na te faauuina le tupu muamua o Isaraelu

FAATINOGA O LE MATAUPU

Tuu le avanoa mo tupulaga e faasoa ai ni mea o tutupu i le soifua ma le ola, ma lona fesootaiga ma le tatou mataupu i

lenei asosa, atonu e maua ai se fesoasoani mo lona lava faafitauli.

AOTELEGA O LE MATAUPU

I le aotelega o lenei mataupu, o lea ua faamanatu mai le tala lenei, i le ala tonu e ui e le tagata faatuatua, poo tatou foi tupulaga talavou i taimi tatou te taia ai i faaosoosoga ma tiga o le ola nei, ua na’o le Atua lava tatou te sulu iai. O le tagi tigā o le tinā i le Atua, ona o tiga o le maasiasi ma ola faalumaina i le vaaiga a tagata o le sosaiete. O le tagi foi lenei tatou te tuuatu i le Atua pe a o tatou mafatia. E le pine, e faamanuia mai lava le Atua.

.....

ASO SA: 20 APERILA 2025

**MATAUPU: O LE MATAGOFIE O LE TU’UGAMAU
TU’UFUA**

TUSI FAITAU: Luka 24:1-12

FESOASOANI MO LE TA’ITA’I

O le upu moni lava ma le upu tautino, e matua leai, leai lava se matagofie e maua i totonu o se fanua maliu poo se fanua tanu, afai e matagofie lona teuteuina i le vaai atu i fafo, ao totonu, ua na o le pogisa ma le matagā o lo’o i ai. E matuā leai foi se matagofie e maua i lea laueleele, auā foi, o le fanua e fesooteai

ma faanoanoaga, o le laueleele o le loimata maligi ma le loto faavauvau, o le nofoaga e manatua ai tiga ae maise, o le loto ua nutimomoia. Ioe, e leai lava se faamoemoe e maua se fiafia poo se olioli i se tuugamau,

O le talitonuga sa i manatu ma lagona o tagata o le Feagaiga Tuai. A oo mai le oti, o le iuga lea, e leai lava seisi faamoemoe mo le tagata i tua atu o le oti. E le mafai ona toe ola mai ai. Ioe, o le mutaaga o mea uma, o le taunuuga o le ola sa ola ai i le lalolagi. Atonu o le mafuaaga lea o le tuu fesili o le toaina o Iopu. "Afai e oti le tagata, e toe ola mai ea o ia?" E foliga mai i le fesili, e le o taliaina e Iopu lea talitonuga, e masalosalo pea le manatu o le tagata, e tataua lava ona i ai seisi mea e sili atu nai lo le ola. E tataua ona i ai se faamoemoe o le tagata i tala atu o le oti. A lea e iloa, a ta i lalo le laau e iai le avanoa e toe ola mai ai. Aisea la e le faapea ai le tagata?

E lei faigofie ona taliaina e tagata le aoaoga a Keriso e uiga i lona toetu mai nai e ua oti. Auā foi, o le taaviliga o le lalolagi ma le gasologa o mea o le foafoaga, o le tofi lava ia o le tagata, o le sau i le lalolagi, faatino ona tiute, a uma, fo'i i le tuugamau. Ioe, o le tuugamau o le nofoaga tumau lea e le toe iai lava seisi mea e faia ai. Peitai, na matua faamaonia le sao ma le moni o ia aoaoga uma, ina ua maliu le Alii ma toetu ma i le aso tolu.

O le tu ma le aganuu a Iutaia i mea nei o maliu, e le mafai ona tanuina se tagata, ae lei muamua uuina lona tino i se suau'u manogi, e matua fai faalelei, aui i le ie ona teu ai lea, peitai, e lei oo le tulaga lea i le Alii ona ua vave le taimi o le Sapatī. O le mafuaaga lea o le usupo o nei tina. O lona uiga, e le'i uma lo latou faamoemoe ina ua tuu Iesu i le tuugamau, e leai, a lea fai

mai le molimau a le tusitala, ua ala usu i le taeao e ave mea manogi e teuteu ai le tino o le Alii. Atonu na manatu fafine nei o loo i ai pea le Alii i le tuugamau, o le upu moni foi ma le faamaoni, e lei tau lava se manatu poo se lagona, e vaai i se mea ofoofogia ma le matautia, e lei manatu foi, e omai e sui i totonu o le tuugamau mea e masani ai le soifua ma le ola o le tagata. Pau lava le lagona o loo iai, Talofa e, ua uma le ola o le Alii.

O le a le molimau a le tusitala? Faateia le tagata i le mea fou ua vaai i ai. Se a le mea tou te sailia ai le ua soifua i e oti? E le o iinei o ia, a ua tu. O lona uiga, e sese lava le mea o loo tatou saili i ai le Alii, ua saili i le tuugamau, ua saili i le nofoaga pogisa ma le matagā, ao Iesu, e le o se Iesu o le tuugamau, e le se Iesu o le pogisa, e leai, o le Iesu o le ola, o le Iesu o le malamalama. O lona uiga, e le mafai lava ona maua Iesu i se tuugamau, ae e maua i le mea o loo iai le ola.

Le tala fiafia lena na omai ma fafine, lo latou faamoemoe e fai se galuega lelei mulimuli mo le Alii ma faamavae atu ai, peitai, ua le o se faamavaega, ao se amataga o se faamoemoe lelei ma le matagofie mo le lalolagi Kerisiano, o e ua faatuatua ma talitonu i le Alii. Upu a le agelu, *“Sea le mea tou te sailia ai le ua soifua i e oti?”* Le mea fou lea ua tupu i le lalolagi, le tagata na tuu i le tuugamau, le tagata ua leai se ola, ua na’o le faasasao lava, a ua ā nei? *“e le o iinei o ia a ua tu.”* E le mafai ona fiafia se tagata ola i se mea pogisa ma le mataga, e faapena foi le Alii, e lei toe soifua ona nofo ai lea i le tuugamau, a ua toetu ma alu ese. Ua alu i fafo. Aisea? a lea ua tatala le tuugamau, ua toilalo le oti, ua matala le avanoa e toe foi ai le tagata agasala i le Atua.

FAATINOVA O LE MATAUPU

O le avanoa mo tupulaga talavou e aumai ai so latou taofi e uiga i le mataupu o lenei asosa.

AOTELEGA O LE MATAUPU

Le matagofie lea o le tuugamau tuufua, le ata manino lea o le manumalo aiai o Iesu mai le oti ma le tuugamau. A lea na fesili ai lava. “Le oti e, o fea lou tui, le tuugamau e, o fea lou manumalo? Ioe, le oti ma le tuugamau sa fai ma fili i le tagata ola, e fefe ma matau iai, peitai, ua avea le maliu o Iesu Keriso, ua fai ma ala o le suia o le tuugamau mai lona tulaga leaga ma le mataga, avea nei ma mea matagofie, ma mea suamalie e taulai iai le vaai, e faamoemoe iai le soifua ma le ola o le tagata faatuatua. O le faitotoa lea e ui atu ai i le malologa e tumua i le ola e faavavau ua maea saunia e le Atua, mo i latou o e ui mai i le puapuaga tele.

.....

ASO SA: 27 APERILA 2025

MATAUPU: IA OLA MAFUTA MA KERISO

TUSI FAITAU: Ioane 15:1-11

FESOASOANI MO LE TA’ITA’I

O le faataoto la lea na faitauina, e le o se tala na soona faia e le Alii e aunoa ma se mafuaaga tatau, e le o se fagogo foi e faanofo filemu ai tagata uma, e leai, o le tala na faia ma le silafia e le Alii o le olaga o loo ola ai le Iutaia, le olaga femoumouai, le olaga e le tumau i se mea e tasi, ae e feosoosofai solo, e fua lana mea e fai agai i le taimi ma le mea o loo tupu ai. Le olaga lea o loo taumafai le Alii e tape ese mai le Iutaia, ae faailoa atu i le tagata, le manuia ma le lelei e maua i le ola mafuta i le Atua, atoa ai foi ma le tulaga pagatia e oo iai pe a aluese ma le Atua.

“O au nei o le vine, o la outou. O le tumau ia te au, ma au ia te ia, o ia lava e fua tele mai, aua e le mafaia e outou ona faia o se mea e tasi, pe a au leai.

O lona uiga, e le mafai ona ola lelei ma fua tele mai se lala vine, pe afai e le pipii i le vine, auā foi, o le vine na te fafagaina le lala, o le vine na te sapalaia le ola agai le lala, e ala lea i meaai na te mimiti maia mai le eleele.

O lona uiga, o le ola sololelei, ma le ola maloloina, e maua lea i le mau i le vine. Peitai, e iai lala e fiu lava le vine e unai atu iai le meaai lelei, ae fai ifo lava le malosi ma iu ina mate. O lala la ia, fai mai Iesu, o lala e le fua mai, o lala e leai se aoga, na ona faatele ai fua o le avega a le vine. Pau a le mea e fai iai, o le aveese lea ma susunuina i le afi. Ao le lala e fua tele mai, e teuteu faalelei e le faifaatoaga, e tausi ma faapelepele iai, ina ia fua mai ai atili.

GALUEGA FAATINO

Tatala le avanoa i tupulaga e fefaasoai ai i le taua o lenei mataupu, ina ia malamalama ai i le taua o le ola mafuta ia Keriso i aso uma e le aunoa.

AOTELEGA O LE MATAUPU

I le aotelega i le manatu o lenei mataupu mo tupulaga, Ia faaitete i tatou tupulaga talavou i le ola tau mamao ese ma le Alii faaola. Auā o le ala lena i le malaia ma fano ai lava le soifua ma le ola i le faafanoga e faavavau. Ae a ola mafuta ma pipii pea le soifua ma le ola auauna i le Atua, ona ola lava lea, i manuia o le Atua e faavavau

.....

ASO SA: 04 ME 2025

MATĀ'UPU: TAUTUANĀ LE TAPUA'IGA

TUSI FAITAU: Ioane 21: 1-14

FESOASOANI MO LE TA'ITA'I:

Fai mai le talitonuga fa'a-Samoa, so'o se faiva e si'i i le tai, e tatau lava ona i ai le tapua'iga, e ta'ua o le 'AU TALIUTA. A'o faiva fo'i e tapua'ia, o faiva ia e manuia. O le fa'amoemoe fo'i la lea o le 'au faifaiva, IA TAUTUANĀ LE TAPUA'IGA. Ia fo'i

lava ma se i'a mo le tapua'iga o lo 'o fa'atali mai. Ia 'aia lava ne'i fo'i fua.

O le tala fa'atauiina mo lenei Aso Sa, o le fāgotaga a Simona Peteru ma nisi so'o. E le 'i avea le atamamai fa'a-faifaiva o Simona Peteru ma isi tautai o le gataifale, ma ala na latou mauagofie ai ni i'a mai le vai i Tiperia. O le mea mautinoa lava, *'e le 'i maua se i'a e tasi i lea po.'* Fai mai le tala, fa'ato'a mau lava lo latou faiva, ma tau toso a latou upega, ina ua usita'i i le fa'atonuga a Iesu. O le fa'atonuga o lo 'o i ai le mana e taunu'u ai, O le fa'atonuga na fai ma le mautinoa, e lē fo'i fua le faiva. *"Inā lafo ia le upega i le itū taumatau o le va'a, ona outou maua ai lea."*(*fuai'upu 6*). O le fa'amoemoe o lenei fetalaiga a le Ali'i, se 'i toe fa'amanatu atu i le 'au faifaiva, ia tautuanā le tapua'iga. Ia 'aia lava ne'i fo'i fua i uta. Ia fo'i lava ma se i'a mo le Taliuta.

E fo'i ane la le faiva a le au so'o ma le fiafia tele, o lo 'o i ai le afi malala i le matāfaga, o lo 'o tunu ai i'a ma le areto e le tapua'iga. O le taumafataga o lo 'o tapena e le Taliuta o Iesu mo le 'au fāgogota. E ui lava i lea fa'atali a le tapua'iga, ae na ia fetalai lava i le au so'o, *'Au mai ia nisi i'a ua outou maua nei.'*(*fuai'upu 10*). Fai mai le tala a Ioane, ua alu fiafia Simona Peteru ua ia toso ane le upega o i'a ma avatu i'a i le Tunu I'a.

AOTELEGA:

Tupulaga talavou, tele fe'au ma galuega, o vala'auina ese'ese, o nisi fo'i i a'oa'oga maualuluga o lo 'o feagai ma tatou. 'Aua ne'i galo iā i tatou le tapua'iga a nai o tatou mātua ma 'aiga, o nai o tatou mātua fa'aleagaga, aulotu ma nu'u. E lē o

tu'uaunoaina i tatou i a latou tatalo i le ao ma le po, ina ia manuia o tatou faiva. Manatua, na manuia faiva o le 'au so'o, ona ua usita'i ma mulimuli i le fa'atonuga a Iesu. E manuia fo'i a tatou taumafaiga, pe'afai tatou te fa'amoemoe ma fa'alagolago i le Atua. 'Aua ne'i fo'i fua a tatou sa'iliga, ae ia fo'i lava ma se i'a auā le tapua'iga. Manaia le faiva o le 'au so'o, na fo'i ma i'a, a'o i'a aupito sili ona lelei ma lapopo'a na foa'i mo le tapua'iga.

FA'ATINOGA: *Fa'atino le tala.*

E fautuaina ina ia fa'atino le tala, e lē gata ina ia iloa ai o lo 'o malamalama le Autalavou i le tala, ae ia saga fa'amausalī atili ai fo'i lo latou malamalama pe'a fa'atino ma tautatala ai.

Autu o le Tala: IA MANATUA LE TAPUA'IGA

Fa'amanatu: 'Aua ne'i fo'i fua lou faiva, ia fo'i lava ma se i'a mo le tapua'iga.

.....

ASO SA: 11 ME 2025
(ASO SA O TINĀ)

MATĀ'UPU: TINA: SU'E FA'ATAPITO

TUSI FAITAU: Luka 15: 8-10

FESOASOANI MO LE TA'ITA'I:

O le tala mo lenei Aso Sa o Tinā, o le tala i le **tupe na leiloa**. Ae o le itū'aiga su'e lea na su'e ai e lenei tinā lea tupe: **SU'E FA'ATAPITO**. O lona uiga, sa matuā fa'ato'aga lava ona su'e. Ai lava ua ave uma ana meāfale i fafo, e o'o lava i fala po'o a lava na fola ai le fale ua la'u uma i fafo, ae se'i salu ma sa'ili le tupe. O le su'e e fa'aauau pea, se'iloga lava na te maua. E māfua ona su'e fa'apea, ona e i ai le tāua o lenei tupe i le tinā. Tasi lea uiga lelei o nai o tatou tinā, o le ola sa'ili, finau ma galue malosi, mo se manuia o lana fānau ma lona 'aiga.

O le tusi a Luka, o lo 'o ia fa'amatalaina ai Iesu, **o Ia o le Alo o le Atua, na afio mai mo tagata uma. E lē na 'o tagata Iutaia, ae fa'apea fo'i i tagata nu'u ese**. A'o itū'aiga tagata la nei, **e tā'ua o le tagata ua leiloloa**. Tagata ua leiloloa i le agasala. Tagata ua leiloloa i tu'inanauga o le olaga. Tagata ua leiloloa i le manatu ane ua na 'o ia lava, ma isi lava mau tagata leiloa. O le mafua'aga lea e tulaga ese ai Luka mai lona fa'aaogaina o isi Fa'ata'oto a Iesu, e lē tā'ua e isi fai-Evagelia, ona o lana fa'amamafa, **o le tāua o le afio mai o Iesu mo le tagata leiloa**.

E pei la o le tala i le tinā na leiloa se tupe o ana tupe e 10. Na ia matuā su'e lava fa'atapito ina ia maua. E tolu (3) lava mea tāua o lo 'o tā'ua i le tusi faitau, e iloa ai le su'e fa'atapito o lenei tinā.

1. **Ua ia tutu le mōlī**. O le ata manino, o le pogisa o lo 'o leiloa ai le tupe. Le tagata ua ola i le pogisa ona o le agasala. A'o le malamalama o le Atua, e susulu atu ma maua ai.

2. **Ua ia tafitafi le fale.** Tafitafi ese ni otaota o lo 'o faigata ai ona iloa le tupe. O le fa'ailoga o le 'ave'ese o mea lē aogā, o lo 'o fai ma mafua'aga ua agasala ai le tagata.
3. **Ua ia matuā sa'ili.** O le sa'iliga e lē uma, seiloga lava na te maua. O le itū'aiga sa'ili lea o lo 'o sa'ili mai ai le Atua i le tagata ua leiloa, se'iloga lava e salamō ma fo'i atu ia te ia. Fai mai le tala, ona fai lea o le faigā'ai ma ona tuā'oi e fiafia ai, ona o le tupe na leiloa ua maua.

AOTELEGA:

O le tala fa'a-fa'atusa o lo 'o fa'amatalaina ai le tāua o le sa'ili atu o le Atua i le tagata leiloa. Ae o lo 'o iloa ai fo'i i'i, o nei mea na leiloa, e tofu lava ma lona aogā na faia ai e le Atua. E tele itū'aiga leiloa, ae i ai uma o latou avanoa i le Fa'aolataga ua saunia e Keriso. Tatou Autalavou, o tatou o isi tupe leiloloa ona o lo tatou fa'amaualuluga, fa'asausili, fiafia i tu'inanauga o le olaga, le amio leaga ma le agasala. O le tala lelei mo i tatou, o lo 'o su'e fa'atapito lava i tatou e le Atua. O lona malamalama e susulu mai i le pogisa o lo 'o tatou i ai, 'ave'ese mea leaga ua tatou vaivai ai, ma matuā sa'ili mai ina ia maua i tatou, ona ia fiafia ai lea.

FA'ATINOGA: *Tauvagā Pese fa'atatau lava mo Tinā*

- Vaevae le Autalavou i vāsega se 2.
- Pese ta'ito'atasi-Solo (*ali'i po'o se tama'ita'i*)
- Pese ta'ito'alua-Duet (*ali'i ma le tama'ita'i*)

- Pese acapella-leai ni mea fai fā'ili. Ft: piano, kitara ma isi. (*ali'i ma tama'ita'i*)

Fa'amanatu: Salamō mai le leaga, ma fo'i i le Atua.

.....

ASO SA: 18 ME 2025

MATĀ'UPU: SUAMALIE NAI LO LE MELI

TUSI FAITAU: Salamo 19: 1-14

FESOASOANI MO LE TA'ITA'I:

Ua tatou iloa uma lava, o le meli o se taumafa e silisili lona suamalie i le tofo. Ai fo'i o le mafua'aga lea e fa'atusaina ai le naunau ma le fiafia o le tagata i se mea, i le suamalie o le meli i le itū lelei, ma le itū lē lelei. A'o lea foliga mai i le tatou matā'upu o lenei Aso Sa, ua i ai se isi mea ua sili atu lona suamalie nai lo le meli.

O le tagata Isara'elu lava ia, e sili atu le suamalie o le ola tapua'i i le Atua, nai lo le sa'iliga o le tamao'aiga ma isi mea. Peita'i, ua i ai isi ua suamalie atu le ifo i tupua ma le amioleaga. E mafua mai lea fa'afitauli, ona ua fesiligia e le tagata le natura masani o mea o le foafoaga. Ua va'ai a'e i le lagi, ona iloa lea o le la, masina ma fetū, ma lo latou aogā i le ola o le tagata. Ona manatu ane lea o le tagata, e leai se isi na

foafoaina nei mea. O mea lava na tutupu latou ia. Ona avea lea o le la, masina ma fetū, ma atua ua tapua'i i ai.

O le mafua'aga tonu lava lea na tūsia ai lenei Salamo, **se'i fa'asa'o ai le tagata ua fa'apea ifo i lona loto, e leai se Atua.**

Fai mai le fai-Salamo, *'Ua tala mai e le lagi le mamalu o le Atua; ua fa'aalia fo'i e le vanimonimo le galuega a ona 'a'ao.'* I le manatu o le fai-Salamo, o mea ia o le foafoaga, la, masina ma fetū, o lo 'o fa'aalia mai ai le silisili 'ese ma le mata'utia o le Atua na faia nei mea uma, auā o Ia o le Atua Foafoa. E leai ni o latou leo, a'o lo latou tāua i le s'ios'iomaga, ua lava lea e fa'aalia ai le mana ma le malosi o le Atua.

(Fuai'upu 7-10) o lo 'o fa'amatalaina ai e le fai-Salamo le matagofie o Afioga a le Atua. Se'i toe avatu i le tagata ua suamalie ia te ia le agasala, ina ia sili atu ona suamalie ia te ia le usita'i ma tausii poloa'iga a le Atua.

AOTELEGA:

E lua (2) lava mea tāua o lo 'o aumai i lenei Salamo. (1) Ia sili atu ona suamalie i le tagata le ola tapua'i i le Atua, nai lo o se isi mea o lenei lalolagi. (2) Ia sili atu ona suamalie i le tagata Afioga a le Atua, nai lo se isi mea. O lona uiga, Ia sili atu i le tagata ona fiafia i le Atua, nai lo se isi lava mea. A'o le fa'afitauli lea i nei aso i tupulaga, ua sili atu le fiafia i mea fa'afiafia o lenei ola, nai lo o le Atua. E iloa le sa'o o lea manatu, ua to'atele tupulaga ua le toe fiafia e auai i ni Sauniga Lotu. Ua fa'asolo atoa le inu 'ava oona i le Aso Sa. Ua sili atu le matamata i lakapi nai lo le fa'amuamua o le lotu.

GALUEGA FA'ATINO:

Ia fa'asoa le Autalavou, po 'o a ni mea e sili ona latou fiafia i ai, e 'ese mai i le mafuta i le Atua. Ae ia fa'aiu le fa'asoa, ia latou iloa, ia sili atu lo latou fiafia i le Atua, nai lo mea o lo 'o latou fiafia i ai.

Fa'amanatu: Ia sili atu ia te oe lou mafuta i le Atua, nai lo le lalolagi nei.

.....

ASO SA: 25 ME 2025

MATĀ'UPU: ULĪ I LALO O LE LAULAU

TUSI FAITAU: Mataio 15: 21-28

FESOASOANI MO LE TA'ITA'I:

O le tala mo lenei Aso Sa, o le tala i le fafine Kanana, o le fafine nu'u 'ese, na sa'ili ia Iesu mo se fesoasoani mo lana tama teine o lo 'o ulufia e le tēmoni. Ae 'ese le mamafa o 'upu na lafo e Iesu i si lea tinā. Se tasi la lenei o ana fetalaiga ua fa'amamafaina e le tatou matā'upu o lenei Aso Sa. *"E lē tatau ona 'ave le mea e 'ai a le fanau, ma lafo i ulī."* (fuai'upu 26). I le manatu lava ia fa'aletagata, pe foliga mai i le fetalaiga a Iesu, ua manatu fa'apito mo na 'o ona lava tagata. Ua ia ta'ua ai ona tagata, tagata Iutaia, **o le fanau**, ae fa'aigoa tagata nu'u 'ese, **o ulī** po'o maile (tulou). Ae lē o lea le 'a'ano moni o le fetalaiga a

le Ali'i o Iesu. Na te lē 'i so'ona lafoa fo'i lea upu 'ulī' po'o maile, i tagata nu'u ese. E tolu (3) lava nai mafaufauga fa'aleagaga i le fa'aaogaina e Iesu o le upu 'ulī.

1. **O le upu ulī o lo'o fa'aaogaina e Iesu, o le fagafao (puppy) po'o le tama'i maile (tulou).** E tausi ma fa'apelepele. E fafaga ma fa'ainu. O lona uiga, e ui lava o tagata nu'u 'ese, ae lē mafai ai lava ona la'aloa ai le tausiga a le Atua. O tagata nu'u 'ese, e aofia ai fo'i i le Fa'aolataga a le Atua.
2. **E moni lava o le ulī i lalo o le laulau, a'o le ulī lava a le Matai.** E i ai lona pi'itaga ma lona so'otaga i le matai. E lē te'ite'i fo'i nofonofo i lalo o le laulau a le matai. O lona uiga, po'o tagata lava o nu'u 'ese, e i ai lava lo latou feso'ota'iga i le Atua.
3. **O le 'ulī i lalo o le laulau, o le fa'ailoga o le tagata tautua, o le ola 'au'auna.** Ua ia iloa lelei lona va feagai ai ma lona matai. Po'o a lava fa'amanuiaga na te maua, tele pe itiiti, e talia lava ma le agaga fa'afetai. O lona uiga, o tagata nu'u 'ese, o isi ia 'au'auna a le Atua.

AOTELEGA:

Le tatou Autalavou i lenei afiafi, o le fe'au lea o lo 'o momoli mai e le tatou matā'upu i lenei Aso Sa. E tutusa tagata uma i le Atua. Po'o le a lava lou itū'aiga talavou, paie, fe'alo'alofa'i, faitogafiti, pepelo, ma isi, e tausi lava oe e le Atua. Na te puiptui ma lave'ai oe. 'Ae 'auna ne'i galo, o lo tatou vala'auina lea. E lē o le nofonofo fa'asamasamanoa i lalo o le laulau, ae ia

fai le faiva o le tautua ma 'au'auna atu. Ia iloa lelei le va feagai ai ma isi tagata. O a fo'i manuia ua tatou maua mai ai, ia tatou talia ma le fa'afetai. Pei ona fai mai le fafine Kanana, 'po'o momoi mea lava e pa'u'u i lalo o le laulau, ua lava lea mo ia.'

FA'ATINOGA: Su'esu'ega i le Evagelia a Mataio

O le tasi lea fa'amamafa o le Evagelia a Mataio: O le Fa'aolataga mo tagata uma, ae lē mo na 'o Iutaia. O le fesili, 'O A NI TALA MAI LE TUSI A MATAIO TATOU TE ILOA AI LEA MANATU?'

1. O le Gafa. (*Mataio 1*). O lo 'o aofia ai ma tagata nu'u 'ese i le gafa.
2. O le fanau mai o Iesu (*Mataio 2*). Na talia e Makoi mai Sasa'e o tagata o nu'u 'ese, ae lē taliaina e Herota le Tupu o Iutaia.
3. Fa'amalologa o le lepela (*Mataio 8: 1-4*).
4. Tala i le maliu o Iesu.

Nofoaga na fa'asatauroina ai Iesu. O le maupu'epu'e i tua o pa o Ierusalem, ae lē o totonu o Ierusalem.

Saeluaina o le Ie Puipui o le malumalu (*Mataio 27: 51*). O le fa'aailoga, ua lē toe i ai ni tuā'oi o lē isi tagata ma lē isi tagata. Ua tutusa tagata uma.

Ta'utinoga a le Ta'ita'i o le to'aselau (*Mataio 27: 54*). O le fitafita Roma e lē o se Iutaia, ae na ta'utino, 'E moni, o le Alo lava leni o le Atua.'

- Vaevae le Autalavou. Ia ta'ito'atolu i le vāega, ona fai lea o a latou su'esu'ega.
- A ma'ea ona tu'u lea o le avanoa i vāega ta'itasi mo le latou su'esu'ega po'o taliina le fesili ua tu'uina atu i luga.

Fa'amanatu: E tausi ma lave'ai i tatou e le Atua. O le a sau tali atu i lenā alofa?

.....

ASO SA: 01 IUNI 2025

MATĀ'UPU: O I TATOU O LUPE FA'ALELE A LE ATUA

TUSI FAITAU: Kenese 8: 6-12

FA'ATINOGA O LE MATĀ'UPU:

- Vaevae le Autalavou i vāega se lua (2). Vāega 1: o Ali'i; Vāega 2: o Tama'ita'i.
- Fa'aaogaina o le Gagana Fa'a-fa'atusa (*metaphorical language*), ina ia a'oa'oina po'o a ni fe'au tāua o lo 'o momoli mai le tusi faitau.
 - (1) Fa'aleleina o le oreva.
 - (2) Fa'aleleina o le lupe.

FESOASOANI MO LE TA'ITA'I:

O le tusi faitau o le tatou matā'upu i lenei Aso Sa, o le tala iā Noa ma lona va'a, ina ua tau fa'ai'ui'u le lolo. O lo 'o tā'ua i lenei tala, e lua (2) manu felele na fa'alele e Noa e sa'ili ai po ua matūtū le fogā'ele'ele.

1. **O le overa.** O le manulele muamua lea na fa'alele e Noa, peita'i e lē 'i toe fo'i ane iā Noa i le va'a.
2. **O le lupe.** O le manulele lona lua lea na fa'alele e Noa, peita'i na toe fo'i ane i le va'a ina ua leai se mea e mapu ai ona vae, ma iloa ai o lo 'o i ai lava le vai i le fogā'ele'ele. Ae fo'i atu, o lo 'o fa'aloaloa mai lima o Noa e talia lona toe fo'i atu mo se mapusaga. Ona fa'atali lea o Noa mo aso e 7 ona ia toe fa'alele lea o le lupe. Fai mai le tala, **ua fo'i ane ma le lau olive mata i lona gutu**, o le fa'ailoga ua toe ola le si'osi'omaga. Ona toe fa'atali fo'i lea mo nisi aso se 7, ua toe fa'alele le lupe, ma ua lē toe fo'i ane i le va'a. O le fa'ailoga mo Noa ma lona 'aiga, ua tatau ona ulufafo mai le va'a, ua mātū le vai i le fogā'ele'ele.

AOTELEGA:

I le gagana fa'a-fa'atusa (*metaphorical language*), e mafai ai ona tatou maua ni a'oa'oga tāua mai i le fa'aleleina o nei manufelele e lua. **O le oreva**, ua fa'atusaina i ai le tagata ua maua loa manuia ona galo lea o le Atua. **O le lupe**, (1) a leai loa se mea e mapu i ai ona o fa'afitauli, ia toe fo'i lava i le Atua. E talileleia e le Atua lou toe fo'i atu. (2) Ia fo'i ma se lau olive mata, e fai ma fa'ailoga ua e maua manuia. 'Aua ne'i fo'i

ma se lau ua mago, po 'o le leai fo'i o se mea, o le fa'ailoga o le ola so'ona fai ma le fa'ataugā o manuia mai i le Atua. 'Aua ne'i pei i tatou o le oreva, na maua loa manuia, galo le fa'apogai o manuia i le ola, ae ia tatou pei o le lupe.

Fa'amanatu: Ia manatua le Atua i taimi faigata, ia fo'i ma se lau olive mata i lou matai.

.....

ASO SA: 08 IUNI 2025

MATĀ'UPU: O LE OLA FA'AFOLIGA

TUSI FAITAU: Mataio 23: 1-12

FESOASOANI MO LE TA'ITA'I:

O le tusi faitau o lenei Aso Sa, o le a'oa'o atu o Iesu i le motu o tagata, ia 'aua ne'i o latou fa'apei o ta'ita'i o le lotu Iutaia, le 'au Faresaio ma le 'au Tusi'upu. O ni ta'ita'i ua fai ma fa'aa'oa'oga leaga i tagata. E na ona amo solo o le tofi i le lotu, a'o amio ua matuā leaga faia lava. O se tasi la lea o uiga o le 'au Faresaio ma 'au Tusi'upu o lo 'o faitioina e Iesu, **o le ola fa'afoliga.**

O le ola fa'afoliga, o le faia lea o ni mea e lelei atu i le va'ai mai fafo, ae o totonu, o lo 'o afifi mai ai mea leaga ma mafua'aga sesē. O le fa'alialia vale ma le fa'atinoina o ana galuega, ma e mana'o lava e iloa mai e tagata ana mea lelei o lo 'o fai. E lua

(2) lava fa'atinoga o lo 'o faia e ta'ita'i nei o le lotu Iutaia e iloa ai lo latou ola fa'afoliga.

- 1. O le fa'alautele o a latou filateri.** O le filateri, o le pa'u o le manu ua tusia ai tulafono a Mose, ona fusi lea i le lima po'o le muāulu, ina ia iloa mamao mai e tagata, o ia e usita'i i tūlāfono a le Atua. O lona uiga, ua manana'o le 'au Faresaio ma le 'au Tusi'upu, ia matuā iloa mamao mai e tagata, o latou o tagata ua tausi le tūlāfono, o latou o tagata amiotonu ma amiolelei, e iloa i le olaola ma le matamata tetele atu o mata'itusi o le tūlāfono i o latou lima po'o muāulu fo'i.
- 2. Ua latou fa'atelē i tu'upao o latou ofu.** O tu'upao, a fa'afaigofie, e tai pei ni taga lapopo'a e i autafa o ofu tele talaloa e 'o'ofu ai tagata mamalu nei pei o Faresaio ma Tusi'upu. O se fa'ailoga fo'i e iloa ai o tagata pa'ia. O lona uiga, ua latou su'i fa'a'u'umi i tu'upao o latou ofu talaloa, ina ia iloa mamao mai ai i latou e le motu o tagata, o latou o tagata pa'ia.

Aepeita'i, ua lē tusa lava lea ma a latou amio. Ua sili musa ia i latou le fa'atinoina o le amioleaga. E taulamua i faiga pi'pi'o ma le amiolētonu. E fa'afoliga o lo 'o tausi le tūlāfono, ae o lo 'o solomua ia te i latou le soli o tūlāfono. E fa'afoliga o ni tagata pa'ia, o e mau tofi i le lotu, a'o amio ua feololo mai ai Satani.

AOTELEGA:

Tasi lea vaivaiga ta'atele i tupulaga talavou i nei aso, ua tele le ola fa'afoliga. E galue i le va'aiga a tagata, a'o le sifi i le lē fa'amaoni. E tō'aga i le ā'oga Autalavou, fealua'i ma le tusi pa'ia, manaia le papa'e o ofu, a'e lē lelei le amio. E lē o le tauloto o mau o le Tusi Pa'ia o le mea sa'o lenā, ae o le tauloto ma taumafai e ola ai. Afai tatou te tautatala i le alofa, ia tatou taulāmua ona alofa atu. 'Aua ne'i o tatou fa'apei o ta'ita'i o le lotu Iutaia, pei ona a'oa'o mai ai Iesu.

GALUEGA FA'ATINO: *Tusigāsolo*

Ulutala: E leaga le ola fa'afoliga.

- Ia ta'ito'alua i le vāega.
- Tusi se solo, 4 fuai'upu ae ta'i 8 laina.
- A ma'ea ona auaua'i lea i luga o sui ta'itasi mai vāega e lauina solo.

Fa'amanatu: 'Aua le ola fa'afoliga.

.....

ASO SA: 15 IUNI 2025 (*Finauga-Debate*)

MATĀ'UPU: 'ESE'ESEGA O LE SOIFUA MA OLA I SAMOA, MA LE SOIFUA MA OLA AI I ATUNU'U MAMAO

O le tatou matā'upu o lenei Aso Sa, o le FINAUGA, e fa'atatau i le Autū ua filifilia. Ua maitauina le to'atele o tagata Samoa ua aumau i atunu'u mamao. O le fa'amoemoe lava, o le sa'iliga manuia auā mātua ma 'aiga i Samoa. E leai se fa'amoemoe o lenei Finauga, e fa'aleaogāina ai le nonofo i Samoa po 'o atunu'u mamao fo'i. A'o le 'auga, ia fa'atusatusa po 'o a 'ese'esega o le nonofo ai i Samoa, ma le nonofo ai i atunu'u mamao.

FA'ATINOGA O LE FINAUGA:

- Vaevae le Autalavou i vāega se 2.
 - (1) Itū Lagolago
 - (2) Itū Tete'e
- Ia ta'ito'atolu mai i le Itū.
- Ia i ai se Fa'amasino, e fa'amasinoina le Finauga. Ft: O le Faife'au
- Ia fa'asoa lelei e lau susuga i le Ta'ita'i le fa'aaliga o manatu o itū e 2.
- Ta'i 6 minute a le sui e to'atasi e fa'aali ai lona finagalo.
- Logo 1, toe tasi le minute, logo 2, ua ma'ea le taimi.
- Filifili ta'ita'i o Itū e 2, o ia lea e amataina, ma faia le aotelega o latou manatu.
- O le Aotelega, e 4 minute.

AUTU: E sili atu lava le soifua ma ola i Samoa nei, nai lō o le soifua ma ola i atunu'u mamao.

FESOASOANI MO LE FINAUGA:

Ia atagia i lenei Finauga, a'afiaga o le soifua i Samoa ma atunu'u mamao.

Itū Lagolago: E sili atu lava le soifua ma ola i Samoa.

1. O le fa'asinomaga, o le tofi, o le tupu'aga.
2. Malamalama lelei i le si'osi'omaga.
3. Mamulu mea uma i le fa'amolemole.
4. A'oa'oina ai le fa'aaloalo, amio pulea, le va fealoa'i ma isi.
5. O lou fanua, o lou fale, e lē totogia.
6. Mamalu Faigānu'u. (*ma isi mafuaa'a o silafia e le Autalavou*)

Itū Tete'e: E sili lava le soifua ma ola i atunu'u mamao.

1. Lelei le tamao'aiga.
2. Tele avanoa faigaluega.
3. Lelei itū tau a'oa'oga.
4. Lelei itū tau i le soifua mālōlōina.
5. Maua fa'amanuiaga tau tupe pei o Penefiti.

(*ma isi mafua'aga o silafia e le Autalavou*)

Fa'amanatu: Ia fa'aaoga tataua le ola po 'o fea lava o soifua ai.

.....

ASO SA: 22 IUNI 2025

MATĀ'UPU: TAOFI MAU

TUSI FAITAU: Fa'aaliga 2: 12-17

FESOASOANI MO LE TA'ITA'I:

O le tusi faitau o lenei Aso Sa, o le tusi i le Ekalesia o i Perekamo. O Perekamo, o le nofoaga tutotonu o pulega a Roma i Asia ititi. E i ai fo'i le malumalu tele e ta'ua o le malumalu o Seu, le atua o tagata Eleni. Ae lē gata i lea, o le tele o isi mau atua, ae tofu lava ma le malumalu. O se tasi fo'i o 'a'ai, ua fai lava a latou faigāmālō i lalo o le fa'amalumaluga o pulega a Roma. Atonu o le mafua'aga lea ua fa'aigoaina ai e Keriso Perekamo, 'O LE NOFOALI'I O SATANI'. O le nofoaga o le ti'apolo.

O le tusi la ia Perekamo, o le fa'amalosia'u i le 'au kerisiano, ina ia taofi mau pea i le fa'atuatua ia Iesu Keriso, ona o se Ekalesia ua si'omia lona talitonuga fa'a-kerisiano e le mau talitonuga fa'apaupau ma le ifo i tupua. E lua (2) lava mea ua taofi mau ai le 'au fa'atuatua, ae ua lē taofi mau i le fa'atuatua ia Iesu Keriso.

- 1. Ua i ai tagata o le ekalesia ua taofi mau i a'oa'oga a Pala'amo.** O lo 'o tā'ua i le tusi o Numera 22, o Pala'amo o se perofeta sa avea ma fautua o le tupu o Moapi i auala e mafai ai ona fa'ato'ilaloina le fanauga a Isara'elu. Sa tele tupe na totogi ai o ia. A'o lana fautuaga na ave i le tupu, *'e tatau ona fa'atosina tagata Moapi ina ia fai'āiga ma tagata Isara'elu, ae o le mea lea matuā fa'asā lava e le Atua.'* Iloa lelei e Pala'amo o le a mafai ai ona tosina mai tamāloloa isara'elu ma ifo ai i tupua Moapi. O le iuga, sa to'atāma'i le Atua ma fasiotia i latou.

2. **Ua i ai tagata i totonu o le ekalesia i Perekamo, ua latou taofi mau i a'oa'oga a le 'au Nikalaitai.** O le Nikalaitai, o le 'au Kikolao. O le upu Nikolao, e fausia mai i ni upu Eleni se 2. O le *Nikos* e fa'auigaina o le fa'aumatia po 'o le fa'amalosia. O le upu lona 2 *laos*, e fa'auigaina o tagata. O lona uiga, o le 'au Nikalaitai, o tagata latou te taotaomia isi tagata. O tagata ia o lo 'o taulāmua i le lagolagoina o faiga a Roma ma ana pulega sauā ma le lē alofa.

O nei a'oa'oga, o lo 'o fa'asesēina tagata i tapu'aiga fa'apaupau, le ifo i tupua, fa'apea le olaga fa'atalitane ma le faita'aga.

AOTELEGA:

Ua tatou iloa uma lava le tau i o le tagata e taofi mau i a'oa'oga sesē, o le oti. A'o le tagata e taofi mau i le fa'atuatua ia Iesu Keriso, e ave i ai le manai lilo, e ave i ai le ma'a sinasina. A'o lea ma'a e tusia ai le igoa fou, ae na o le tagata na te taofi mau i lona fa'atuatua, na te iloa le igoa lea. Ae o le uiga o leni ma'a, o le tagata ua manumālō i le fa'amasinoga a le Atua. Po 'o le fa'aailoga o le tagata ua 'ave i ai le fa'afetai ma le fa'amanuia a le Atua.

GALUEGA FA'ATINO:

O tusi nei i Ekalesia e 7 e aofia ai ma le tusi i Perekamo, e i ai lona mamamu po'o lona pattern e faigofie ai ona tatou malamalama pe 'a faitau i ai.

- Vaevae le Autalavou i vāega se 2, ona sa’ili lea po ‘o le a lea Pattern.
- 1. E amata i le fa’afetai ma le fa’amālō i se mea lelei ua faia e le ekalesia.
- 2. Ona fa’ailoa lea o se mea ua fa’aletonu ai.
- 3. Ona avatu lea o le fe’au, e tāua le fa’alogo ma usita’i.
- 4. Ona fa’ailoa lea o le tau e maua.
- 5. E fa’ai’u lava i le toe fa’amalosi mai o le fe’au o le fa’alogo (*O lē ua i ai taliga inā fa’alogo ia*).

Fa’amanatu: Ia e taofi mau i lou talitonuga fa’a-kerisiano.

.....

ASO SA: 29 IUNI 2025

MATĀ’UPU: E LĒ O SE MANU’A MAI FAFO, A’O LE MANU’A LAVA MAI FALE

TUSI FAITAU: Opetiaia 1

FA’ATINOGA O LE MATĀ’UPU:

- Ia fa’atalatalanoa le Autalavou, po ‘o le a le uiga o lea fuaitau: *E lē o se manu’a mai fafo, a’o le manu’a lava mai fale.*
- Fa’afeso’ota’i i le tusi faitau.
- O a ni a’oa’oga?

FESOASOANI MO LE TA'ITA'I:

O le galuega fa'a-perofeta a Opetaiia, o lo 'o fa'asino tonu lea i tagata Etoma. O Etoma e tupuga mai ia Esau. A'o Esau o le uso o Iakopo, lea e tupuga mai ai Isara'elu ma Iuta. O le perofetaga la a Opetaiia, o le fa'ailoa atu o le to'asa o le Atua ia Etoma, ona o lo latou 'au'au fa'atasi ma nu'u 'ese e pei o Papelonia e fa'ato'ilalo ma fa'atafunaina le 'a'ai o Ierusalema i le tausaga TLM 587. A'o le fa'asalaga ua finagalo le Atua e tu'u ia Etoma, o le tūlāfono fa'a-Feagaiga Tuai, *'Mata i le mata ma le nifo i le nifo.'* O le tūlāfono o lo 'o fa'atāuaina ai le tutusa o le fa'asalaga ma le solitūlāfono. Afai ua fa'aleagaina le mata, o lona uiga, o le mata fo'i e tatau ona fa'aleagaina. (*Esoto 21: 23-25; Levitiko 24: 19-20.*) A'o le fa'asalaga ua folafolaina mo Etoma, o mea ua tatau ona o lo latou taulamalama i lo latou uso o Iuta. *"Auā ua latalata le aso o le Ali'i i nu'u uma; e faia ia te oe mea na e faia; e toe iu atu ia te oe mea na e faia."* Fuai'upu 15.

O le feso'ota'iga lea o le matā'upu ma le tusi faitau. O le fa'amanu'alia ai o Isara'elu, e lē o ni tagata o nu'u 'ese. O lona lava uso o Etoma ua toe agaleaga ia te ia. O si ona lima lava na pa'ia ai si ona mata. O le matuiā lea o le agasala na faia e Etoma. O le toto, ivi ma 'a'ano, ae ua sili ona ia mana'o ia fa'ao'o le leaga ia Ierusalema.

AOTELEGA:

Tasi lea vaivaiga i le tele o tupulaga talavou i lenei vaitau, o le ola taulamalama. E sa'ili lava se mea e leaga ai lē isi uso. E galulue fa'atasi ma feofeo'i fa'atasi, ae su'e lava se mea e

leaga ai lē isi. O le alofa tunoa o le Atua, ua tasi ai i tatou uma. E moni lava e 'ese'ese fa'asinomaga ma tupua'a e pei o le vāvā mamao o Sasa'e ma Sisifo, ae ua tasi i tatou uma iā Keriso. O lona uiga, ia fealofani ma fealolofaa'i, ae 'aua le ola taulamalama e pei ona faia e Etoma ia Isara'elu lona uso moni.

Fa'amanatu: E leaga le ola taulamalama.

.....

ASO SA: 06 IULAI 2025

MATĀ'UPU: MO'OMIA PEA LE TA'ITA'IGA A LE ATUA

TUSI FAITAU: Salamo 131

FA'ATINOGA O LE MATĀ'UPU:

➤ Fa'atalatalanoa le matā'upu.

O le fasi fuaitau lea o lo 'o fa'amamafaina i le matā'upu o lenei Aso Sa:

“UA TUSA A'U MA LE TAMA UA TE'A MA SUSU”

- Fa'amatala lona uiga i le soifuaga ua tatou masani ai.
- Aisea ua saunoa ai fa'apea le Tupu?
- O le a le feso'ota'iga ma le tusi faitau atoa?

FESOASOANI MO LE TA'ITA'I:

O le Salamo 131, o se pese na lagiina e Tavita ina ua se'ei i le nofoāli'i e fai ma Tupu o Isara'elu, ina ua mavae atu Saulo. A'o lenei Salamo, o lo 'o fa'aulutalaina fa'apea: 'LOTO MAULALO'. O se ta'utinoga a Tavita ina ua ia iloa lelei, o le mafua'aga tele lea na fa'aletonu ai le ta'ita'iga a Saulo, O LE FA'AMAUALUGA. Na te lē 'i lagonaina lona fa'atauva'a a'o fai ma Tupu. O le fa'ailoga lea, e lē iloa ona fa'amaulalo lona loto. E lē gata i le va ma isi tagata, aemaise lo la va ma le Atua. Ta'utino Tavita, *"Le Ali'i e, ua ou lē loto fa'amauualuga, ua lē fa'asiasia ou mata, ou te lē masani ma mea fa'asilisili ma mea ua sili ona faigata ia te au. E moni, na ou fifilemu ma ou fa'alologo, fa'apei o le tama ua te'a ma le susu o lona tinā, ua tusa a'u ma le tama ua te'a ma le susu."*

E fa'atāuaina i le tatou matā'upu o lenei Aso Sa, le vāega mulimuli o le ta'utinoga a Tavita, *'ua tusa a'u ma le tama ua te'a ma le susu o lona tinā.'* E te'a loa se pepe mai le susu o lona tinā, o le fa'ailoga e iloa ai, ua fa'asolo ina matua le tamaitiiti. E ui lava la ina te'a ma le susu, ae lē mafai lava ona ola na 'o ia. E na te mo'omia pea le tausiga a mātua. E fa'amoemoe ma fa'alagolago pea lona ola i ona mātua. E foliga fa'apea le uiga o upu a Tavita. E ui ua fai o ia ma Tupu; ua ia te ia le pule; a'o lona lea mo'omo'oga, **e na te mo'omia pea le ta'ita'iga a le**

Atua. Po 'o le a lava lona poto ma lona iloa, e fa'amoemoe pea lana ta'ita'iga i fesoasoani mai o le Atua. O le ata manino lea o le tagata loto maulalo.

AOTELEGA:

O le fa'afitauli lea o lo 'o mafi ai tupulaga i nei aso. Ua maua le malosi ma le ola, ua maua le poto ma le iloa, ona manatu ane lea, o ia lava ma le lalolagi lenei. Ua manatu ua matua, ua lē toe taliaina ni fautuaga a mātua ma ē matutua. Ae ua fai lava le mea ua loto i ai. O uiga na e iloa ai le tagata fa'amauualuga. A'o lea ua a'oa'o mai le ta'utinoga a Tavita, po 'o le a lava le mauualuga ua ai le soifua ma le ola, e tāua lava le fa'amoemoe i le ta'ita'iga a le Atua.

Fa'amanatu: Fa'amoemoe ma fa'alagolago i le Atua.

.....

ASO SA: 13 IULAI 2025

MATĀ'UPU: E LATA 'ĀLĀFAU

TUSI FAITAU: Luka 24: 28-43

FA'ATINOGA O LE MATĀ'UPU:

Galulue ta'ito'alua.

- Fa'amatala po 'o le a le uiga moni o lea fuaitau ua fai ma tatou matā'upu.
- Fa'amatala le feso'ota'iga ma le tusi faitau, po 'o gafea o atagia ai le uiga o le fuaitau.
- O a ni a'oa'oga o maua mai ai?
- A ma'ea ia auaua'i luga vāega ta'itasi, e fa'amatala le la taumafaiga.
- Fa'afeso'ota'i e lau susuga i le Ta'ita'i.

FESOASOANI MO LE TA'ITA'I:

'E lata 'ālāfau'. O tatou 'ālāfau e lē mafai ona tatou va'aia, a'o le mea mautnoa lava, o lo 'o i lalo ifo lava o tatou mata. E masani lava la ona fa'amatalaina ai le mafuta mai o le Atua ia i tatou. Auā o lo tatou Atua, o le Atua e lē va'aia, a'o lea lava lo tatou talitonuga, o lo 'o mafutaina pea i tatou e le Atua.

O le ata atoa fo'i lea o lo 'o atagia i le tusi faitau o le tatou matā'upu. O le fa'aauiaina o le tala i mea na tutupu i so'o na malaga i Emau. O le mamao o Ierusalem ma Emau, o lo 'o fa'amauiaina e 7 maila. Ae fai mai le tala a Luka, e taunu'u lelei le malaga, e lē 'i iloa e nei so'o o Iesu o lo 'o latou savavali fa'atasi i le ala. A'o lea fa'ato'a manino o lā'ua mata, ina ua tofitofi e Iesu le areto ma tufatufa atu. **Aisea ua la lē iloa ai Iesu?** Na iloa lava i le latou felafolafoa'iga, lo lā'ua lē mautonu ona o le tala e uiga i le Toe Tu o Iesu. Tasi ia o mea ua tatou lē iloa ai le fa'atasi mai o le Atua, o le ola lē talitonu. Se'iloga lava e va'ai le tagata i ni vāvega tetele ma le ofoofogia, ona fa'atoa talitonu lea.

A’o lo tatou talitonuga fa’a-kerisiano, o lo tatou Atua, o le Atua auai mai ia i tatou. Na te mafutaina lava i tatou i taimi ma aso uma. E ui lava ina tatou lē va’aia o Ia, ae ua lava ma totoe le malosi ma le ola, le tamao’aiga i le tino, mafaufau ma le agaga, fa’apea fo’i mea o le si’osi’omaga, tatou te iloa ai, o lo ‘o ia te i tatou le Atua. E lē mafai ona ia tu’ulafoa’ina i tatou.

AOTELEGA:

E tele lava ina tatou le talitonuina le auai mai o le Atua, aemaise lava i taimi o puapuaga ma faigata tatou te feagai, a’o itū aso ia, e sili ona fa’alatalata mai ai le Atua, ma tatou lagonaina ai le mafanafana o lona pa’i mai. Ia tatou ola ma le mautinoa, o lo ‘o tatou mafuta fa’atasi ma lo tatou Atua. E pei a ona lata ‘ālāfau. Pe sou le vasa, o lo ‘o tatou faimalaga fa’atasi ma lo tatou Ali’i. A tatou mafatia, o lo ‘o tatou mafatia fa’atasi lava ma Iesu. A tatou fiafia fo’i, o lo ‘o tatou fiafia fa’atasi fo’i ma Iesu.

Fa’amanatu: Ia lagonaina le mafuta fa’atasi ma le Atua.

.....

ASO SA: 20 IULAI 2025

**MATĀ’UPU: E MANATUA OE I AU GALUEGA
LELEI**

TUSI FAITAU: 2 Samuelu 1: 24-27

FESOASOANI MO LE TA'ITA'I:

O le tusi faitau o lenei Aso Sa, o lo 'o atagia ai le manatua o se tagata ona o ni ana galuega lelei. E lē mafai ona galo. E manatua pea. A'o le manatua lea, ua avea ma ala e fai ai na galuega lelei ma fa'ata'ita'iga lelei i lē isi tagata.

Ina ua maliliu Saulo ma lona atali'i o Ionatana i le taua, na fa'apea ai Tavita ia Isara'elu, ia fa'anoanoa ma fetagisi. Ona o nei tagata sa matuā iloga lo latou sao i le manuia o Isara'elu. Lea lava fo'i ua maliliu, ae na maliliu lava i le taua. O le fa'ailoga manino, o le tagata sa'ilimālō. Lea la ua toe fa'amanatu ai e Tavita ia Isara'elu galuega lelei na faia e Saulo mo i latou. Fai mai, na ia fa'aofu ia te i latou i le ie mūmū, atoa ma mea fa'afiafia; na ia teuteua o outou ofu i auro e matagofie. O mea taugatā ma le anagatā, ae na fa'alā'ei ai e Saulo Isara'elu. E o'o lava i taimi o taua, na 'o lagona o le fefe ma le popole e maua ai, ae fai mai, na lagona lava e le nu'u le fafia ona o le ta'ita'iga lelei a Saulo. *'Aue! Ua maliliu toa i le taua'*. O le uiga o upu ia a Tavita, e leai lava se isi e tutusa o la loto ma Saulo. E moni lava sa i ai vaivaiga o Saulo, a'o uiga lava ia o le tagata sa'ilimālō.

E o'o lava i lona atali'i o Ionatana, na manatuaina lava e Tavita, ona o le mafanafana o le la mafutaga fa'aleuō. E manatua ona o lona lavea'ina o Tavita mai le ita o lona tama o Saulo. Na afua i lona alofa moni. Lea la ua fai mai ai Tavita, *sa ma'eu lava lou alofa ia te a'u*.

Ona toe fa'ai'u fo'i lea o le tala a Tavita i le fa'apea ane: *'Aue! Ua maliliu toa, ua maumau auupega o le taua.'* Ua leai se isi e toe fa'aaogaina auupega o le taua. O upu o lo 'o momoli mai ai le

tāua ma le tulaga 'ese o nei tagata i le tautuaina o le nu'u. A'o le fa'amoemoe lea, ia 'aua ne'i maumau auupega, ae ia i ai nisi e toe fa'aauaina lona fa'aaogaina.

AOTELEGA:

O lo tatou manatuaina o ni galuega lelei a nisi, o se fa'ata'ita'iga lelei fo'i lea mo i tatou. Ia tatou fa'aauauina ona fai le lelei, e manatuaina ai fo'i i tatou. E manatu ai o tatou taimi. O lo tatou fa'aauauina lava lenā ona fa'aaogaina o auupega. E lē tatau ona maumau, auā o lea e to'atele tagata o lo 'o totoe. E lelei lava le manatua o i tatou ona o ni galuega lelei na tatou faia, ae leaga le manatuaina ona o ni leaga na tatou faia.

GALUEGA FA'ATINO:

- Galulue i ni vāega se 2.
- Fesili Autu: O a ni alagā'upu, po 'o ni muāgagana fa'a-Samoa, e fetau lelei ma le tatou matā'upu?
- Fa'amatala lona uiga ma lona feso'otaiga i le tusi faitau.

Fa'ata'ita'iga: **E pe le afi, ae ola pea le magālafu.** O le magālafu o malala ola e tanu i le lefulefu mo le isi taimi e fa'aola ai le afi. E moni lava la e pe le afi, ae o lo 'o ola pea malala nei mo le toe fa'aolaina o le afi. E fa'apēnā se tagata lelei. E mavae atu, ae manatua pea i ona uiga lelei.

Fa'amanatu: O manatua fa'aapefea lou talavou?

.....

ASO SA: 27 IULAI 2025 (*Su'esu'ega i le Tusi Pa'ia*)

MATĀ'UPU: TALALELEI I LUGA O TAU'AU TALAVOU

FA'ATINOGA O LE MATĀ'UPU:

- Galulue i vāega se 2.
- Fai se sa'ili'iliga i le Tusi Pa'ia, i ni talavou e ta'uaogāina le ola.

FESOASOANI MO LE MATĀ'UPU:

O le fa'amoemoe lava o lenei matā'upu, ia fa'amanatu pea i tupulaga talavou, ia fa'aaoga tatau le malosi ma le ola, i le tautuaina o le Talalelei, nai lo le maumau i lenei lalolagi. O lo latou fa'alupega, O LE MALOSI. O lona uiga o se aiga, nu'u ma se aulotu ola, o lo 'o tau'aveina e ni talavou malolosi. O le ola ta'uaogāina lea.

O nisi nei o talavou i le Tusi Pa'ia, ta'uaogāina le ola:

1. Tavita. Na ia fa'ato'ilaloina le toa o Filisitia. Na te lē 'i fa'amoemoe i sona malosi, a'o le Atua.
2. Iosefa. Na mafai ona ia tete'e atu i fa'aosoosoga a le avā a Potifara. Na fa'aaogaina e le Atua, e lavea'i lona 'āiga mai le oge, e ui na agaleaga ia te ia.
3. Eseta. Fa'aaogaina lona tulaga o ia o le Masiofo a le Tupu o Peresia, e lavea'ina mai ai ona tagata Sa Iutā.

4. Tito. Tofia e Paulo e va'aia le aulotu i Kereta ona o lona fa'amaoni.

5. Timoteo. Ia fa'asa'o a'oa'oga sese.

(ma isi o lo 'o silafia e le Autalavou)

Fa'ata'ita'iga: O Tito. (*Tito 1:5*) O Tito o se talavou nu'u ese. E leai ma sona pi'itaga ia Iutaia. E le pei o Timoteo, o lona tinā le Iutaia, a'o lona tama le Eleni. Sa mulimuli ia Paulo i ana malaga fa'a-misionare, ma liliuina ai o ia e avea ma Kerisiano. O le ofoina lava lea o lona ola mo le Atua. Ina ua finau Paulo ma le 'Au Toeaina i Ierusalema, e uiga i le fa'akerisianoina o tagata nu'u ese, o le talavou lenei o Tito, na 'ave e Paulo e fai ma fa'amaoniga, o le tatau ona avea nu'u ese ma tagata kerisiano, tusa lava pe le uia ala o le tūlāfono (*peritomeina*). O le tusi a Paulo ia Tito, na ia toe fa'amanatuina ai le mafua'aga na ia tu'uina ai o ia e va'aia le ekalesia i Kereta. Ua talitonuina, ua fa'atuatuaina, ua fa'amoemoeina ona o lona fa'amaoni. E 2 lava fa'amanuiaga o lona fa'amaoni. (1) Ia fa'atonuina mea o totoe. (2) Ia tofia toeaina i lea 'a'ai ma lea 'a'ai. A'o le fa'atonuina ma le tofia, o tiute ia o le tagata ua fai ma Ta'ita'i. O lona uiga, o le tagata fa'amaoni, e fa'aeaina.

Fa'amanatu: Fa'aaoga tatau le malosi mo le galuega a le Atua.

.....

ASO SA: 03 AOKUSO 2025

MATĀ'UPU: E LĒ FALALA FUA LE NIU

TUSI FAITAU: Esoto 15: 1-18

FESOASOANI MO LE TA'ITA'I:

'E lē falala fua le niu.' E mafua ona falala, ona ua feula e le agi o le matagi. O lona uiga, e i ai le mafua'aga o mea uma. E fa'apēnā le pese a Isara'elu ua fai ma faitauga o lenei Aso Sa. E lē 'i nonofo nonofo Isara'elu, pepese e aunoa ma se mafua'aga tatau. Le nu'u sa taumate lo latou saogalēmū mai le matamataita o Farao ma Aikupito. Fai mai le tala, sa nonofo Isara'elu i le lau'ele'ele o Peairota, ua lē iloa le mea o le 'a fai. Ua lumāfale i le Sami o le ata o le oti, ae ua tuāfale fo'i ia Farao ma le to'atele o au fitafita. A'o lea lava na fa'aalia le alofa lavea'i o le Atua, e ala i le vaeluaina o le Sami 'Ula'ula ae savavali ma le saogalēmū i lē isi itū. 'Ae lē gata fo'i i lea, ua ia toe fa'afo'isia le sami i le mea sa i ai, ua fa'aumatia ai le Farao ma ana 'au.

O le afuaga lea o le pese fa'afetai a Isara'elu i lo latou Atua. Auā ua latou talitonu, o le Atua lava ua na fa'aeaina i latou. O mea sa latou manatu e lē mafai ona tutupu ona o le natura o mea o le si'osi'omaga, a'o lea lava na fa'aalia ai le silisili 'ese o le Atua. O mea na lilo i le manatu fa'aletagata, ae na aliali ona o le Atua. Amata lava le pese fa'afetai a Isara'elu i le fa'apea: *'Ou te pese i le Ali'i, 'auā ua matuā manumālō o Ia. O le Ali'i o lo'u malosi Ia, ma la'u pese, ua fai fo'i o Ia mo'u olataga; o lo'u Atua lenei, ou te fa'ane'ene'e i ai; o le Atua o lo'u Tamā, ou te vivi'i lava ia te Ia.'* O le mafua'aga lea na pese ai Isara'elu, ona o le malosi o

le Atua. O le malosi na ia lē fa’amaasiaina ai lona nu’u, a ua ia fa’aeaina.

AOTELEGA:

E i ai le mafua’aga o mea uma. A fua i le tausiga a le Atua i lo tatou ola, o le mea moni lava, e lē tatau ona mapu ona tatou pepese fa’afetai i le Atua. Ua tele lona alofa ma lona agalelei. Ua leai lava se mea ua tatou matitiva ai. Ia tatou ta’utno lo tatou fa’atuatua i le Atua. A’o le fa’afitauli, tatou te fialia e tali manuia, ae augatā le taofi e fa’afō’i le fa’afetai. O lou talituālimaina lava lea o manuia o le Atua ua fa’asafua mai. O lo tatou fa’agaloina foi lea o le Atua.

GALUEGA FA’ATINO: *Pese Fatu – Fa’afetai*

- Vaevae le Autalavou i vāega se 2.
- Fatu se Pese Fa’afetai, e atagia ai le fa’afetai i le Atua i lana tausiga alofa.

Fa’amanatu: Ia lagona le loto fa’afetai i le Atua.

.....

ASO SA: 10 AOKUSO 2025 (*Finauga –Debate*)

MATĀ’UPU: TAUTUA A ALI’I MA TAMA’ITAI

E lē fesiligia le telē o le sao tāua o le tautua a ali'i ma tama'ita'i i le atia'eina o aiga, nu'u, ekalesia, so 'o se fa'alapotopotoga, le mālō ma le atunu'u. O lona uiga, e leai se fa'amoemoe o lenei Finauga, e fa'aleaogaina ai le tautua a itū e lua. Ae se 'i o tatou mata'ituina pea, le 'ese'esega o le fa'atinoina o tautua; po 'o fea le tuā'oi o nei tautua; afai fo'i ua fa'aletonu se fa'atinoina o le tautua, o le tāua lea o lenei Finauga, ina ia fa'amalosia pea ma fa'atino i le lelei.

AUTU: Ua sili atu le tautua a tama'ita'i nai lo ali'i.

FA'ATINOAGA O LE FINAUGA:

- Vaevae le Autalavou i vāega se 2; Ali'i ma Tama'ita'i
- Itu Lagolago: Tama'ita'i
- Itu Tete'e: Ali'i
- Taito'atolu mai i le vaega.
- Filifili se Fa'amasino.
- Ia lava mau e lagolagoina ai le finauga.

FESOASOANI MO LE FINAUGA:

Itu Lagolago:

1. Tapena fa'a-fafine to'aga. O le natura o le tama'ita'i e fa'ato'aga ona fai ona tiute; e fai mea mae'ae'a. O lona uiga, o tiute e fa'atino ma le fa'amaoni.
2. E au le inailau a tama'itai.
3. O le to'atele o Fa'auluuluga o Matagaluega a le Mālō ma kamupani o tama'ta'i.

4. O le matagofie o teuga o falesa ma fale, e fa'amoemoe i tama'ita'i.

(ma isi mafua'aga o lo 'o silafia e le Autalavou)

Itu Tete'e:

1. O le mamafa o le faiva fa'a-tautua e fa'atinoina e ali'i.
2. Telē lo latou sao i le tamao'aiga o Samoa. Ft: Galuega fa'avaitaimi, o le to'atele lava o ali'i. I le tulaga i tupe lafo mai, tasi lea vāega o lo 'o tele ai tupe a le mālō.
3. To'atele atu nofoa o ali'i i totonu o le Palemene nai lo tama'ita'i.
4. To'atele o Palemia o Samoa, o ali'i talu ina Tuto'atasi. O lea fa'ato'a palemia se tama'ita'i.

(ma isi mafua'aga o lo 'o silafia e le Autalavou)

Fa'amanatu: Ia tautua ma le fa'amaoni.

.....

ASO SA: 17 AOKUSO 2025

MATĀ'UPU: O LE UPU E LĒ NA ONA FA'ALOGO I AI, A E IA OLAINA

TUSI FAITAU: Iakopo 1: 13 – 27

FESOASOANI MO LE TA'ITA'I:

E toatele tagata Kerisiano ua fiasia e fai le mau folafolaga maoa'e, a ua toe soli ma fa'aleaoga o latou lava folafolaga, ona o le fa'aletonu o amio. Ua ta'uta'u atu le maua'a o le fa'atuatua, ma le avea ma tagata o le Atua, a e ua latou taofiofi mamau i le lalolagi ma ona tamaoiga. Ua popoto foi e tautatala i upu logomālie e fia fa'alologologo ai tagata. Peita'i, ua feteena'i o latou galuega ma uiga fa'aalia, ma a'oa'oga o le Talalelei.

O le ituaiga fa'afitauli lea ua fa'afetaui e Iakopo e ala i lana tusi. Ua ia aoao mai, e le na o lo tatou talatalanoa i le fa'atuatua Kerisiano, ae ao ona tatou olaina, ma savavali ai. O le pine moni o le fa'atuatua, o le suia lea o le olaga o le tagata. O le fua o le fa'atuatua moni, o le tele o galuega lelei.

O le auga foi lea o le tusi a Iakopo, lea o loo fa'avae ai ana fautuaga uma, e uiga i le olaga fa'aKerisiano – o lona uiga, ma ala e fa'atino ai.

E pei ona tatou faitauina i lenei aso Sa.

O mafaufauga lava fa'aTama o le uluai Ekalesia, o a'oa'oga fa'aToeaina e tu'u sa'o mai, e leai se pagupagu, a e fagatonu i le fa'afitauli o lo o ia talanoa i ai. Lea ua ia fautua mai i le ova o le tautala a e laitiiti le fa'alologologo. O le uiga o le ola fa'afoliga. Ua a'oa'o mai Iakopo ina ia tia'i ese mea uma e leaga i le olaga, ae *“talia ma le fa'amaulalo”* le feau o le fa'aolataga ua maua, *“le upu ua totoina”* – le upu ua na fanau ai i tatou uma, auā ua na o lea le laveaiina mo tagata uma. E tāua le fa'alogo i Afioga Paia a le Atua, ae sili atu le tāua ona usitai i ai, ma fa'atino.

E uiga ese ma le mau fa'apea, e maua le sa'olotoga i le tulafono; Peitai, o le tulafono o le Atua lea tatou te iloa ai lo tatou natura agasala, ma maua ai le avanoa tatou te saili

fa'amagologa ai i le Atua. Ua laveiina tagata Kerisiano ona o le alofa tunoa o le Atua, ua fa'asaolotoina foi latou mai le pule o le agasala, ona o le fa'aolataga.

E mafai lava ona saofia mai faiga pi'opi'o ma le eleelea o lenei lalolagi, e ala i le taofimau i ala o le amiotonu na fa'asino mai e Iesu. 'Aua nei piitia ala o le lalolagi ua fa'avae lea i luga o le tupe, o le malosi ma le fiafiaga.

E leai se uiga o le fa'atuatua moni pe afai e seetia gofie pe seetia soo i ala o le lalolagi.

GALUEGA FA'ATINO: Talanoa

Ua tatou iloa le tāua o le upu, o upu mai le Tusi Paia, o upu a le atunuu. Fa'atalanoaina ma le autalavou, le fuaitau e fa'apea, "E malu le aganuu i le Talalelei, e malu foi le Talalelei i le aganuu." Pe fa'amata o sa'o lea fuaitau, a e afai o sa'o pe fa'apefea? E tāua le fa'asoa mai o le tofā o mātua ma le au faigaluega, ina ia malamalama e tupulaga le aoga ma le uiga o le va'ava'alua o le tu ma aga fa'aSamoa ma Afioga Paia a le Atua.

AOTELEGA:

E tāua lava lo tatou fa'afeso'ota'i i Afioga Paia a le Atua i taimi uma, o le fa'asinoga moni lea o le amiotonu a le Atua mo i tatou.

O le sulu i o tatou vae, ma le malamalama i o tatou ala i lo tatou savaliga fa'alefa'atuatua.

O le galuega o le Atua lea tatou te o mai e fa'atino i aso taitasi. Ia tuu uma i ai lo tatou malosi, ia fai lava lo tatou fai mea lelei e gata i ai le mafai. Ma ia tatou fa'amaoni i lo tatou valaauina. O le olaga lava ma le faiga fa'alelalolagi, e tosina ma fa'aosoosoina ai i tatou.

A o le fa'amalosi'au a le Toeaina o Iakopo, ia tatou lava papale i le fa'atuatua e ala i ona Afioga Paia ina ia mafai ona tatou fa'atinoina o o tatou tiute fa'aleKerisiano, ma filigā i le Tulafono. O le anaana lava i le upu, o le anaana lava lea i le galuega.

.....

ASO SA: 24 AOKUSO 2025

MATĀ'UPU: TOFOTOFOINA E MITI

TUSI FAITAU: Teuteronome 13: 1-5

FESOASOANI MO LE TA'ITA'I:

O le miti, a faamatalaina, o se manatu po o ni mafaufauga e tutupu i le mafaufau o se tagata, i le taimi a o moe o ia. Ma e manatu e leai lava se isi o tatou e le'i o'o i lea tulaga o le miti. O miti manaia, ma miti e fa'alē-manaia. O miti e maua ai le fiafia, ma miti e maua ai le faanoanoa. E moe moe lava le isi, 'ata. A e ala mai foi le isi, ua matua masūsū lava lana tagi. A o le talitonuga lautele lava ia, o miti ua na o ni mafaufauga, ae le moni. A e peita'i, e i ai foi miti e uma ane, ua taunuu lava

le mafaufauga sa vaaia i le miti. O miti la ia, fai mai isi o miti mo'i. Ma o le fa'aaliga moni lea o le mea o le a tupu i le olaga o lea tagata. O mea la faapea, e tofotofoina ai lava le isi tagata e sui lona olaga tuai, ae mulimuli i le mea na vaaia i le miti.

Atonu o se manatu faapea o lo o popole i ai le toeaina o Mose, i le vaega o Teuteronome ua faitauina. Ina nei avea ni miti ma itu e ta'ita'i eseina ai le nuu o Isaraelu mai lo latou Atua. O lea ua taunuu le malaga a le nuu, i le eleele laugatasi o Moapi, ua toe lava o se aga ona tu vae lea i laueleele i Kanana. A o le tusi lenei o Teuteronome, o lo o faamauina ai toe upu a Mose i le nuu, ina ia tausi i poloaiga a le Atua; ia 'aua lava nei latou o ese ma le Atua.

A o le agaga maualuga, ia nofo fale ia Satuiama'a i loto ma finagalo o le nuu, e lē fa'aluaina le Atua silisili ese. Le Atua na, na aumaia i latou mai le mea sa nofo pologa ai i Aikupito. O le Atua na ta'ita'i la latou faigamalaga umi i le vao.

Lea ua toe nei o se aga ona ulufale lea i le nuu folafolaina. A i ai foi ni faigata e feagai ma latou, o le Atua lava lea e tasi, na te puipui ma laveai i latou mai le puapuaga. O le ute la o le feau a le toeaina, Isaraelu, ia outou tumau i le Atua. Po o le a lava ni mea e tutupu i totonu o Kanana, ia tumau outou i le Atua na ia aumaia outou.

E o'o mai la i le vaega o le tusi faitau, ua laga mai e Mose le isi vaivaiga o le nuu o Isaraelu. O tagata e femoumou a'i o latou uiga. E avaga gofie la latou tofā i mea o le olaga nei. E tosina gofie la latou fa'autautaga i mailei a le fili. Silasila foi, alu Mose i luga o le mauga o Sinai e aumai tulafono. Lea faatoa uma lava na fa'asaoina e le Atua le nuu mai le sami ulaula. Ae

foi mai Mose, ua ifo atu le nuu i le fa'atusa o le tama'i povi auro.

Uiga ia o le nuu, e malamalama lelei ai Mose. Ma o lea e popole si toeaina, pe a fa'aapefea le mea nei. Lea o le a ō na o latou i Kanana, e tele fa'aosoosoga, tele foi mea e tofotofoina ai le ola fa'atuatua o le nuu i lo latou Atua. Lea la e o'o mai i le tatou tusi faitau, ua lapata'i ai Mose i le isi mea tāua lea.

O totonu o Kanana, e i ai tagata o le a latou faapea mai, o latou o perofeta a le Atua. O le a latou tu'u atu foi ni fa'ailoga, ma fa'amatala atu ni miti ia te outou. A taunuu la fa'ailoga ia, ona latou fa'apea mai lea, Ina tatou mulimuli atu ia i atua ese, o e na outou le iloa, ma ia tatou auauna i ai.

A e fai mai Mose, i le fuaiupu e 3, *“aua nei e faalogo i upu a lea perofeta, poo lena faimiti; aua e tofotofoina ai outou e le Alii lo outou Atua.”*

E foliga mai, e lē fetaui le fa'atonuga a Mose. Auā o lea e fai mai i luga i le fuaiupu 1, o le a outou fa'alogi i tala a perofeta ma faimiti, i fa'ailoga ma vavega o le a tuu mai ia te outou. A e o'o mai i le fuaiupu lea e 3, fai mai, *“aua nei e faalogo i lea perofeta, poo lena faimiti.”* O le a ea la le sa'o; faalogo pe le faalogo?

E tāua le fa'asologa lea. Auā a fua i le siosiomaga o tatou ola ai nei, e tāua le fa'alogi. Ona fetuuna'i lea e le mafaufau, pe usitai pe leai. E manatu foi, o le fa'asologa foi lea o lo o manatu i ai Mose. Auā o le faalogo lea e i le fuaiupu e 3, e uiga tutusa lava ma le usita'i i le gagana Eperu. O lona uiga, e mafai ona tatou fa'alogi i ai, ae 'aua le usitai fua i ai.

A o le fesili, e fa'aapefea na iloa ni miti sa'o mai miti pepelo? E fa'aapefea na iloa o se miti lea mai le Atua, a o le miti lea mai ia

Satani? Fai mai Mose, a fai mai na tagata, “Ina tatou mulimuli atu ia i atua ese.” O iina tou te iloa ai le miti pepelo. Auā o le mulimuli atu i atua ese, o le o ese lava lea mai le Atua silisili ese. So’ o se miti lava la fai mai tou te o e fai se mea leaga, o le miti lena mai ia satani. Auā e loto ia i le leaga. A o miti e fai mai tou te o e fai le lelei, o miti na mai le Atua. Auā o le Atua, o le lelei lava Ia. E na o mea lelei foi e finagalo i ai.

O lona uiga, e tāua miti i o tatou olaga. Ae ‘aua ne’i fa’aseseina ai i tatou i nei miti. Auā o miti, e tofotofina ai lo tatou fa’ atuatusia i lo tatou Atua, pe tatou te alolofa moni ia te Ia ma faia lona finagalo, pe leai foi.

GALUEGA FA’ATINO: Talanoa

Faatalanoaga, o a ni miti o tupulaga talavou ua latou vaai i ai? A o a foi ni o latou miti mo le lumana’i? Faatalanoa pe lelei po o tatau foi ona toe timati le uega ina ia faasino le ala tonu mo le fanau.

AOTELEGA:

O le faamanatu mai o le mataupu o lenei aso Sa. E i ai taimi e tutū mai ai perofeta ma tagata faimiti. O lona uiga, e i ai taimi e oo mai ai ni faaosoosoga i lo tatou ola. E tuu mai foi ni faailoga ma ni vavega ia i tatou, e faaono tosina atu ai o tatou mafaufau. Auā e faafofo tatou e na miti, ma na faailoga ma na vavega. Ae pau lava lenei. Vaavaai poo fea e agai i ai na miti. Pe agai e saga faamautuina lo tatou faatuatusia i lo tatou Atua,

pe se miti e taumafai ai e faatau lau tofā ma sou vaivai, ina ia o tatou o ese atu ma le Atua, ae tatou mulimuli atu i atua ese.

O mea na e fetaia'i ma i tatou tagata malaga. La tatou folauga i lenei tausaga, e le lagi lelei ai pea aso uma. E i ai taimi e malu ai, e i ai foi taimi e fesouaina ai la tatou faigamalaga. Taimi ia e tutū mai ai perofeta ia ma taumafai e ta'ita'i tatou i atua ese.

Lea ua lapata'i mai le feau o lenei mataupu, "aua nei e usitai i lea perofeta, po'o lenei fai miti." A ia fesootai i le Atua e faamalamalama mai le uiga o na miti. Afai o ni miti lelei o loo auala mai ai lona finagalo, ia faailoa mai ae sei o tatou mulimuli i ai. E pei ona faia e Iosefa. Ae afai o ni miti e ta'ita'i atu ai i tatou ia tatou mulimuli atu i atua ese, ia faailoa mai foi e lona agaga ia i tatou le mea e ao ona fai. Ae faapefea ona tatou fesootai i le Atua?

Tatalo. Fai mai Mose, faalogo i lona siufofoga. Ia fetalai o Ia i o tatou loto ma o tatou agaga, a ia tatou naunau atu ia te Ia, e ala i le tatalo. O le aupega lea e fesoasoani i le faamatalaina o miti e oo mai i le tagata.

O le au faamatala miti i le Feagaiga Tuai, e i ai Iosefa, ma Tanielu, na faatoga i le Atua e faamatala mai uiga o miti na feagai ma i la'ua. Lea foi e fai mai Mose, ia outou faalogo i le siufofoga o le Atua. O lona siufofoga, e fetalai i o tatou agaga, pe a tatou faatoga atu ia te Ia. Tatou faamalolosi e tatalo i le Atua, pe a tutupu faigata i la tatou faigamalaga, ona tatou faalogo lea i lona siufofoga fetalai mai i o tatou loto.

.....

ASO SA:

31 AOKUSO 2025

MATĀ'UPU: O LE ALOFA E TŪ I LE NOA

TUSI FAITAU: Filemoni *f.* 8-20

FESOASOANI MO LE TA'ITA'I:

E talitonu le taofi, e lē tau fa'amatalaina le uiga o le alofa, auā e uiga lasi, ma e tofu foi a le tagata ma lana fa'auigaina. E leai lava foi se tasi e lē lagonaina le alofa, mai le tele o ituaiga alofa ua tatou masani ai. O le alofa fa'a-mātua, e te alofa ai i lau fanau. O le alofa fa'a-āva, e te alofa ai i lau pele, po o lou toalua. O le alofa i so'o se tagata, i uo ma e masani, aemaise o aiga. O le alofa foi i lou siosiomaga, i meaola (tulou) ma meatotō po o laau. A e fa'asilisili ai lava, lou alofa i le Atua.

O se fesili fa'atupu manatu pe a fua i le mataupu o lenei aso, po o i ai se alofa e uiga ese nai alofa ua tatou masani ai? Auā, a fa'apea e i ai se alofa e tulaga ese, mai i le alofa o lo o tatou masani i ai, o le a la le ituaiga alofa lea? Ae a mafaufau foi i le alofa fa'a-le-tagata, ona fesiligia foi lea, po o i ai ni vaivaiga o le alofa fa'a-le-tagata?

E moni, e i ai le vaivaiga o le alofa fa'a-le-tagata. Ona o le alofa e femoumoua'i, o le taimi ua alofa, o le taimi ua leai se alofa, ae ua ita.

Atonu, o le mafuaaga lea o le augani a Paulo ia Filemoni i le tusi na tatou faitauina i lenei afiafi. O Filemoni o le sui o le ekalesia i Kolose, o se uo foi a Paulo, o se tagata tau-oloa, sa i ai ana fanua ma ana pologa e pei o Onesemo. Ae ua tuua e Onesemo lona matai ma sola atu i Roma, lea na mafuta ai ma

Paulo, ma fanaufouina o ia ina ua ia talia le Talalelei ma fa'atuatua ia Keriso.

Lea e mafua ai ona tusi atu Paulo ia Filemoni. Ua le gata ina ia fa'ailoa atu ai, o Onesemo ua fanaufouina, ma ua ia fuafua e toe auina atu ia te ia, e le gata i lona tulaga fa'a-pologa e pei ona sa i ai, a o se uso foi ia Filemoni. Fa'atasi ai ma le tuualalo a Paulo ia Filemoni, ina ia toe talia ma fa'amagalo lona "uso."

Atonu o le mafuaaga lea o lo o amata ai le fa'atoga a Paulo, i le fuaiupu e 3, *"Ia ia te outou le alofa tunoa ma le manuia mai le Atua lo tatou Tamā, atoa ma le Alii o Iesu Keriso."*

Ua toe fa'amanatu atu Paulo ia Filemoni, le afuaga o mea lelei uma ua na ia faia mo le Atua ma lana Ekalesia. Lea na fa'afetai atu ai Paulo ia Filemoni, ona o lona fa'atuatua ma lona alofa ia Keriso, ua galue ma mafuta fa'atasi ai pea le ekalesia ma tala'i le Talalelei.

O le uiga lea o le vaega muamua o le fuaiupu e 3. E o gatasi lava le alofa tunoa o le Atua ma ana fa'amanuiaga. O le alofa e puna mai ai manuia mo le tagata. O lona uiga, a leai se alofa o le Atua, e leai foi se manuia.

Peitai, o le uiga tonu lea o le upu "tunoa" o lo o fa'amatalaina ai le alofa o le Atua. O le alofa e tū i le noa. A fa'amatala le uiga o le noa, o se mea e te autilo i ai, ae e te fiu e vaai le mea e gata ai. O lona uiga, o le *alofa tunoa* o le Atua, e leai sona gata'aga, e tu mai i le mea e fiu e vaai se mea e gata ai. O le alofa e lē fa'atua'oia, e mutiutivale, e tulituliloa, e fa'avavau, fa'avavu lava. O le alofa fa'a-le-Atua lea, e tulaga ese lava mai i so o se alofa fa'a-le-tagata.

Ma o lo o fa'amanatu atu ai Paulo ia Filemoni, o le alofa tonu lava lea na ia faia ai ana galuega lelei e atia'e ai le ekalesia ma

manuia ai i latou i Kolose. A o le alofa foi lea e ao ona ia toe tali leleia ai lona uso o Onesemo. Atonu o le popolega lea o Paulo, ina ne'i galo iā Filemoni le alofa lea o le Atua pe a toe foi atu Onesemo, leaga ai lona loto, ma ia fa'ao'o ai se sala i lona uso. Ona fa'a-lē-aogaina atoa lea o ana galuega lelei na tau atia'e ai le ekalesia i Kolose.

A o le uiga foi lea o le vaega lona lua o le fuaiupu e 3. Auā ua atoatoa lava le fa'amagaloina o a tatou agasala i le alofa na fa'atino e lo tatou Alii Fa'aola o Keriso. O le alofa tunoa o le Atua, e aofia ai foi ma le alofa fa'amagalalo. Po o a lava o vaivaiga i nai o tatou uso-a-tagata ma so tatou fa'atauvaā, o le alofa lava e toe fa'aleleia, su'i ma fonofono ai fa'aletonu o mafutaga.

Ua manatu Paulo, o le atoaga lea o le olaga fa'aKerisiano. Ina ia le gata ina galulue malosi ma alofa e atia'e le Ekalesia ia manuia. Ae ia maua foi le tofā fa'a-le-Atua alofa, e fetai'i ai ma fa'afitauli o le soifuaga.

I le aotelega o le tusi a Paulo ia Filemoni, e mafai foi ona fa'atusatusa i le mafutaga a Filemoni ma Onesemo, ma le Atua ma lona tagata. Auā e tulaga ese lava le alofa o le Atua mo lana tagata. E fa'apei ona laveaina e Paulo le tagata pologa, ua fa'apena foi ona laveiina e Keriso i tatou, o e sa nofo pologa i le agasala. Fa'apei ona toe tuufa'atasia Onesemo ma Filemoni, ua fa'apena foi ona toe tuufa'atasia tatou ma le Atua iā Keriso Iesu. Fa'apei o Paulo ina ua ia ofo e totogi le aitalafu a le pologa, sa fa'apena foi ona totogi e Keriso la tatou aitalafu i le agasala.

GALUEGA FA'ATINO: Talanoa

Ia vaevae le autalavou i ni vaega e ta'ito'alua pe to'atolu foi, ma ia fa'atino i so latou lava mafaufauga pe fa'apeai le taimi e toe feiloa'i ai Filemoni ma Onosemo, pe a fua i le tusi a Paulo. Ia fa'atino fa'atala, ia atagia i le fa'atinoga le loto alofa, ma le alofa fa'amagalo. Fa'atalanoaina foi, o a ni taimi na sesē ai se tasi ia te oe? O a ni ou lagona sa i ai i le taimi lena? Pe mata ua e lagonaina le alofa fa'amagalo o lo o ta'u e Paulo? O atagia i lou alof atu le alofa tunoa o le Atua mo i tatou?

AOTELEGA:

Ia ia te i tatou pea le alofa tunoa ma le manuia o le Atua lo tatou Tama, atoa ma le Alii o Iesu Keriso. Auā o le alofa e tulaga ese mai i le alofa fa'atino fa'a-le-tagata.

Ia fai ma a'oa'oga, ma fa'ataitaiga ua maua mai i le tusi a Paulo ia Filemoni e uiga i le mana o Keriso, auala e fa'atino ai le mafutaga fa'a-Kerisiano. O a ni pa puipui ua i totonu o o tatou aiga, nuu ma ekalesia? O a ni mea ua vavae'eseina ai i tatou mai o tatou uso-a-Kerisiano? Tofiga? Tamaoaiga? Tulaga fa'alea'oa'oga? Amio? Ma isi lava vaaiga fa'a-lotoifale.

O pa puipui ia ua vaevaeina ai, ma fa'avasegaina ai mea o lenei olaga. E le o ni puipui e fausia mai ni laupapa po o ni maa, a o pa puipui e afua mai i le loto, ua va ai le fogavaa i le vā fesoota'i ma tagata, ua punitia ai le tasi mai le isi, ae maise foi o le tagata mai le Atua.

A e fa'apei ona faia mo Filemoni, ua fa'apea foi ona valaauina ai i tatou e le Atua, ina ia saili i le loto gatasi, ia sosofa ai pa

vaeloto uma o le ola, ma ia maua ai le fealofani ma le fealolofaa'i i uso-a-Kerisiano.

Fai mai le manatu aoao o Autalavou o le Ekalesia, ***Ia ola ia Keriso***. A e fa'aapefea ona fa'atino lenei olaga ia Keriso? Ia fa'atino i le alofa, le alofa tulaga ese fa'aleAtua e leai se muta'aga, e āuli ai ma fa'amafolafola ai mea uma faigata ma fa'afitauli e feagai ma i tatou, aemaise i totonu o tatou aiga, nuu, ma le Ekalesia.

Vaai ia 'aua ne'i o tatou tutū i le noa o le lalolagi ma fa'amamao ma le Atua. Ia tatou tu lalata i le Atua e ala i le auai i faigalotu ma mea fai o le Ekalesia. A ua e vaai foi i lou uso-a-Kerisiano ua tau lata mai lana tu i le noa, musumususu i ai e toe foi mai i le noa o le Atua ma lona alofa fa'avavau.

O le alofa tunoa lava lea o le Atua na ia auina mai ai Keriso, o Le na te aveeseina uma pa vaeloto ma pa puipui, aemaise o le agasala. O lona maliu ma lona toetu lea na fa'aavanoaina ai le ala i le ola e fa'avavau, ma fai ai i tatou ma sui o le aiga o le Atua.

.....

ASO SA: 07 SETEMA 2025

MATĀ'UPU: O LE POLOAIGA MO I TATOU

TUSI FAITAU: Mataio 28: 16-20

FESOASOANI MO LE TA'ITA'I:

O upu nei sa faitauina, o upu mulimuli ia a Iesu i ona so'o. A o le'i afio a'e o ia i le lagi. O upu ua fa'aigoaina, o le Poloaiga Sili (The Great Commission). Le Poloaiga Sili a Iesu i ona so'o. A o le poloaiga, e le'i fa'asino e Iesu na o ona so'o, a o le poloaiga mo tagata uma. Tagata uma ua fai ma so'o o le Alii. O le finagalo o le Alii, ia o'o lava lana fa'aolataga i le lalolagi uma. Ia sosolo i tua atu o 'aupa o Ierusalema, i tua atu o Iutaia ma le nu'u o le Atua. I tua atu o Palesitina, i Asia ma Europa, ma so'o se tafa o le lalolagi.

O upu nei a Iesu, sa tautala ai pe a ma le 2000 tausaga talu ai, o fetalaiga ua augatupulaga. Sa fa'alogi i ai le fia afe o tagata. Mai lea vaiata i lea vaiata. Mai lea atunuu i lea atunuu. Mai lea itu lagi, i itu e fia o le lalolagi. O le fetalaiga na fa'aTalaleleiina ai atunuu ma tagatanu'u e fia o le lalolagi. Tagata i so'o se gagana, so'o se lanu. Afuaga lea e t'ua ai le Poloaiga Sili, au'a o le poloaiga ua suia ai le lalolagi. Ua suia ai le tele o malō ma atunuu. Ua o'o mai lava i si o tatou lau'ele'ele.

O le poloaiga na suia ai Samoa. Fai mai le mau o le atunuu, na ao ai Samoa. Na tafi'esea ai le pogisa. Le taeao nai Mataniu feagai ma le ata. O le taeao na utu ai le toto masa'a. E maofa le mafaufau i nei upu a lo tatou Alii Faaola. Na fa'aosofia ai le toatele o tagata, ma suia ai le lalolagi. A e na ala ona mafua, ona o tagata e pei o i tatou. E fa'apefea ona o'o'o le Talalelei i le lalolagi? Na afua ona o tagata. Tagata na fa'alogi i le poloaiga, na tula'i ma o.

O le Poloaiga Sili, o lo tatou valaauina lea. O le poloaiga mo i tatou. Manino lava le fetalai a Iesu, "... ia outou o atu e fai nuu uma lava ma soo, ma papatiso atu ia te i latou i le suafa o le Tamā, ma le Atalii, ma le Agaga Paia; ia outou a'oa'o atu ia te i latou ia tausi i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi."

O tatou e fa'ataunuuina le poloaiga. O tatou e tala'iina le finagalo o le Atua, lana Talalelei. O tatou e liua ai nuu e fai ma so'o. O tatou e papatiso atu, o tatou e a'oa'o atu. O tagata ua papatisoina, o tagata ua salamō. Tagata ua liua mai le agasala. O lo tatou valaauina lea. Ia salamō ma liliu mai le agasala. A e fa'aapefa ona salamō ma liliua tagata? O le a'oa'o atu lea o a'oa'oga ua uma ona tuuina mai e Keriso.

O le vaega tāua lea o le poloaiga. A o se vaega foi e lē faigofie. O le talafa'asolopito o le Talalelei mai lava i lona amataga, e le'i faigofie. Ua loa foi le to'atele o Kerisiano na sauāina, ua o'o lava foi nisi i le oti fa'amaturo. Silafia lelei e Iesu, e lē faigofie. Le tiga e feagai ma e tala'iina lona finagalo. Ma o le ala lea o ana upu mulimuli, le fa'amalosi 'au a Iesu o lo'o fa'aapea, "... faauta foi, ou te ia te outou i aso uma lava, e oo lava i le gataaga o le lalolagi."

Ioe, pau lea o le malosiaga mo e faia lenei poloaiga. O le mautinoa, e 'auai Iesu ma i tatou se'ia o'o i le gata'aga. E lē tu'ulafoa'ia i tatou. O le 1830 na taunuu ai le Talelelei i Samoa. A e 1839, e le'i atoa se 10 tausaga, a e ofo le to'a 12 o tamalii Samoa e o ma Ioane Viliamu e tala'i le Talalelei i motu e fia o le Pasefika. Fai mai le talafa'asolopito o le Lotu i le Pasefika, o Samoa e pito sili ona to'atele e na o i le galuega fa'amisionare,

e silia ma le 700 ulugalii, o Faifeau ma o latou Faletua. Sa galulue i motu o Vanuatu, Niu Kaletonia, Tuvalu, Kiribati, To'elau, Motu o Torise, ma Papua Niu Kini.

E to'atele na maliliu. Fai mai se tasi o tusitala, "Ua filogia eleele o atumotu a le Pasefika, i efuefu o Faifeau Samoa ma o latou Faletua." Pine fa'amau lea o le fa'atuatua o o tou tua'ā ma tatou matua, o e ua lagomau mai i ti'asā. O e na asa le gasu o le taeao, lo latou loto tetele ma lo latou usita'i e fa'atino le poloaiga a lo tatou Alii, e o atu e fai nuu uma lava ma soo.

O le lu'i lea o le tatou mataupu i le aso lenei, le Aso Sa o le Talalelei. E fa'apefea ona iloa le finagalo o le Atua? E iloa ia i tatou, i lo tatou talia ma le usita'ia o lo tatou valaauina – usita'ia o le Poloaiga Sili. Lea ua so'o le Pasefika i le Talalelei, ua so'o le lalolagi.

GALUEGA FA'ATINO: Talanoa

Ia fa'atalanoa tupulaga po o a ni faigata ma ni fa'afitauli o lo o a'afia ai lo latou soifua tautua i le Atua, o aiga ma nuu. O a ni auala o le ekalesia e mafai ona fesoasoani atu ai, i le feagai o tupulaga ma nei fa'afitauli? O a foi ni isi auala (e ese mai le 'auai i le Lotu, Autalavou, Aufaipese, ma le Aoga Aso Sa) e ona fa'amalosia lo tatou ola finau e tala'i le Talalelei? (O lo o fa'atatau le fesili mulimuli, i ni polokalame fa'apitoa e mafai ona a'oa'oina fanau i ni a'afiaga o lu'itau o lo'o feagai ma i latou. Fa'ata'ita'iga, o ni seminar ma le mata'ese'ese o le Malo po o fa'alapotopotoga.)

AOTELEGA:

O le vaitau lenei, tatou te lē tau toe o e tala’i i nisi motu, po o nisi atunuu. O aso nei ua toe mana’omia le tala’iina o le Talalelei i o tatou lava lotoifale, i tatou lava tagata. Leaga ua folia mai, pei se atunuu e le’i o’o i ai le Talalelei. Mata’utia le fasioti tagata, gaoi ma fuala’au fa’asāina, fa’apea le mulilua. Ua mata’utia le mea ua o’o i ai le soifuaga i le laolagi. Aemaise le ta’aviliga o suiga fou, ua ofi mai i si o tatou atunuu. O ata mata’utia ma upu masoa i luga o Upegatafa’ilagi ma le Social Media. Talofa, o le lu’i tele lea o o tatou vaitaimi.

O le feau foi lea mo i tatou. Ia o tatou mataala. Tatou aga’i e tapu’e o tatou aiga, nuu aemaise nai o tatou fanau. Matua, ia o tatou lototetele. Tutumamau ia tatou fanau. ‘Aua ne’i mapu le tala’i i ai o le Talalelei. ‘Aua tatou te fefefe. ‘Aua le tu’ufau fanau, a ia a’oa’o i le upu a le Atua, i aso uma, i afiafi o faigalotu.

Tupulaga talavou, ia outou lototetele, ia outou ola tauivi. Fa’alogo i le Poloaiga Sili, ia avea outou ma ave feau o le Talalelei. 2000 tausaga talu ai, na fetalai ai Iesu i le Poloaiga Sili. Lea ua o’o mai i o tatou vaitau, o le a la tatou tali? Tatou tali e pei ona tali o tou tua’ā ma nai o tatou matua. Tatou tula’i ma tatou o, e tala’i le tala o le fa’aolataga.

.....

ASO SA: 14 SETEMA 2025

MATĀ’UPU: E AOFIA OE I FUAFUAGA A LE ATUA

TUSI FAITAU: Salamo 24: 1 – 10

FESOASOANI MO LE TA'ITA'I:

O le Salamo o le pese a Tavita ma o lo o manino i ana upu lona lagona, e aofia ia i fuafuaga a le Atua. A o le soifuaga o Tavita e lē se olaga faigofie. Ma e tele foi taimi na fa'atepa ai o ia i faiga a le Atua. E ui lava ina matautia tala o lona valaauina. Le ui'i na le amanaiaina a e na afea i tofiga a le Atua ina ia fa'au'u e fai ma tupu. A e na fetaia'i lava ma peau lagavale o le ola nei. Auā o le olaga lenei o le soifuaga o fa'afitauli, e leai lava se tasi e olaola lelei e aunoa ma faigata.

Taga'i la i tiga na o o ia Tavita. O le taulamalama o Saulo e fa'ao'o le leaga ia te ia. Fa'apea isi faigamalo ma nuu tuaoi na taumafai e fa'atoilalo lona tulai mai. Tele fa'afitauli i totonu o lona aiga, i le va o lana fanau. O sauaga matagā i le va o tuagane ma tuafafine. Femisaa'i ma o'o lava i le fasiotia e le uso le uso. Foua foi lana nofoaiga e Apisaloma lana ulumatua. Fa'a-aunu'ua solo ai Tavita, e fa'apei o se tupu ua le aofia i fuafuaga mamana a le Atua.

O nei luitau e le faigofie. E fa'aosofia ai le fiu ma le musuā. E fesiligia ai ma fuafuaga a le Atua. Po'o le mea ea ua le amanaiaina i le finagalo o le Alii? A o le Atua e le tu'ulafoa'i i le tagata. Ma e aofia i tatou uma i ana fuafuaga mamana. Leitioa la pese Tavita. Auā e ui lava na fetaia'i ma fa'afitauli, a e ua manino lana vaai i le Atua ma lona finagalo. Auā lea ua lagona le aofia o ia i fuafuaga a le Atua. Auā o a lu'itau o le ola nei e tauau ina fano ai, a e na fa'aeaina lava e le Alii.

Lea e manino i upu o lo o amataina ai le Salamo, *"O le lalolagi ma mea ua tumu ai o a le Alii ia; o le atulaulau ma e o nonofo ai."*

Ua fa'amanatu mai e nei upu le foafoaga mamana a le Atua i le amataga. Ua uma ona tu'u matāmaga ai le lalolagi na soona nunumi, faia manu ma tagata e aumau ai. O mea uma, o a le Atua Ia, o ana fuafuaga mamana. Ma e le'i faia fua, na faia mea uma lava ma le fa'amoemoe o le Alii ina ia galulue fa'atasi. O le lalolagi mo meaola ma tagata, o meaola ma tagata foi mo le lalolagi. Ma o loo manino ai i le finagalo o le Atua mo le tagata. O le tagata o le vaega tāua o fuafuaga a le Alii. O le fa'amoemoe lava e tausi i ana mea na fai.

Fuafuaga ia a le Atua mo le tagata, e ao ina lagonaina. Ia manatua pea, o i tatou uma e aofia i fuafuaga a le Alii. Auā a tatou lagonaina lea mea. E leai se toe fa'avaivai. Aemaise ona ua mautinoa e i ai le fa'amoemoe o le Alii mo oe ma au. Ma o le mafua'aga tonu lea o le fa'aaogaina o lenei Salamo i solo, e fa'amanatuina ai le tausaga Fou a le au Eperu.

O le solo e amo fa'ata'amilo ai le atolaau a le Atua i Ierusalem. E amata mai le malumalu toe fa'aiu i le malumalu. Se'i fafagu le lagona i le auEperu, e aofia i latou i fuafuaga a le Atua. O le naunauta'iga lava se'i toe fafagu le loto nuu ma le loto tapuaiga i tagata nei meaane solomuli i mea tutupu o le ola nei.

E savavali ma laulau le paia ma le mamalu o le Alii. E savavali ma laulau le matautia ma le silisiliese o le Atua le Tupu. O le tautinoga lava lea, e leai se isi atua ua nao le Alii lava. O le Atua lava lea e ona manuia, e fai mo i latou e lagonaina pea lo latou aofia i fuafuaga a le Atua ma ola e tusa ma lona finagalo paia. A lagonaina, le aofia i fuafuaga a le Atua. E ola ma soifua foi i ala o le Alii. O a la fa'afitauli e lu'i ai le ola, e lē fiu lava le tagata i le fa'amoemoe o le Alii.

GALUEGA FA'ATINO: Talanoa

O se fesili fa'atupu manatu e fai ma ta'iala mo le fa'asoa ma tupulava talavou, "O a ni auala o e silafia e mafai ona fō'ia ai faigata ma fa'afitauli o lo o feagai ma oe i lenei vaitau?" Po o le fa'asoa ma ou matua ma aiga, po o le fa'asoa ma le Faifeau po o le Faletua, o a foi ni polokalame o le ekalesia o faia e fesoasoani mo oe?

AOTELEGA:

O le mea mautinoa lava o le olaga lenei e lē sololelei i taimi uma. E lugā, lālō i nisi taimi. Taia mai luma, taia mai tua i le mau fa'afitauli, ma e ono fa'avaivaia ai lo tatou ola fa'alefa'atuatua ma le soifua galulue mo le Atua ma lona finagalo.

A o lea ua a'oa'o mai le Talalelei. 'Aua le fa'avaivai ai. A e ia fa'amalolosi, ina ua lagonaina, e aofia i tatou uma i fuafuaga a le Atua. O le lagona lea, e fau ai o tatou tagata ina ia maa'a ma fua tele mai, auā le Atua ma lona finagalo. E lē taumate le afea o i tatou i le mau fa'afitauli o le olaga nei. Tofu le tagata ma ana avega. E fa'apei o luitau i totonu o aiga, falefaigaluega, le fanau i a'oa'oga, ia fa'apea foi le tatou Ekalesia nei.

O le ala faigofie lava ua manatu ai nisi, o le solomuli ma 'alo'alo ese mai i mea e tiga ai. Le au uso e, e uma lava le olaga lenei o e solomuli ai. E lē lelei sau mea e fai auā e tigā loa, fa'atafa. A o le fa'amalosi'au la o le tatou matupu i lenei aso Sa, 'aua le sola, auā e fa'atuputeleina ai lou mafai ma lou malosi, e gafataulimaina ai nisi fa'afitauli tetele atu e ono tutupu mai.

Mo le fanau i a'oa'oga. 'Aua le faigata loa le mataupu togi le solo. E atili ai lava ona e lē iloa se mea ma iloga ai lava lou atamai i le mea lea o le fa'avaivai. A e finafinau ma onosai i ai ma le mautinoa o fuafuaga a le Atua, o lona taunuuga o le fa'amanuiaina i le lumanai.

O Iesu foi i le lalolagi nei. O le fa'aliga manino o le tagata na lagonaina e aofia o ia i fuafuaga a le Atua le Tama. Na ofoina atoatoa mai lona soifua. Tali puapuaga, fetai ai ma faigata o le ola nei. Na o o lava i le ala i le Satauro e le'i solomuli ai lava ina ia taunuu le fa'amoemoe o le Atua mo le lalolagi uma. Na tali le matuitui ma le tiga. Onosai le oti mataga aua ua mautinoa le taunuuga fa'aeaina i le fa'amoemoe o le Atua le Tama.

.....

ASO SA: 21 SETEMA 2025

MATĀ'UPU: O LALO LAVA O LE TULAFONO

TUSI FAITAU: Kalatia 3: 10-14

FESOASOANI MO LE TA'ITA'I:

E le masino se vaipanoa o le soifuaga ma le olaga e lē i o o i ai le malosi o le tulafono. O tulafono e tapasāina ai le olaga i aso uma, o tulafono e fa'atatau i tapuaiga, o tulafono e fa'atatau i aiga, o tulafono e fa'atatau i meaai atoa ai ma nisi o tulafono ese'ese, ua ta'ai fa'afala ai le olaga atoa o le tagata. A o le upu

moni, e lē faigofie le tausisi i tulafono. Auā o lo o i ai lava le sa'olotoga o le tagata, pe tausi, pe leai. Peita'i, o le tāua lea o le tulafono, o le ta'iala lea ua fa'ataoto auā le nofo lelei o tagata, ua le gata i le vā ma le isi tagata, ae ua fa'apea foi ma le si'osi'omaga (i manu ma le lau'ele'ele). Aemaise lava, lo tatou vā tapuia ma le Atua.

O le fa'afitauli la o lo o fa'atatau ai le a'oa'oga o le Aposetolo o Paulo, o le fa'aogaina sesē lea o le tulafono e Kerisiano Iutaia i totonu o le ulua'i ekalesia. O le ulua'i ekalesia, o lo o aofia ai tagata Iutaia, fa'apea ma tagata o nuu ese ua liliuina e le Talalelei ia Iesu. Peita'i, ua ua faigata lava i le au Kerisiano Iutaia ona tu'ua o a latou tu ma aga, aemaise lava i le tausiiina o tulafono. Ua latou fa'apea o le auala tonu lea o le fa'aolataga na finagalo ai le Atua.

O le fete'ena'iga lea na saeluaia ai le ulua'i ekalesia. O nisi o Kerisiano Iutaia sa o latou a'oa'o fa'apea e tatau muamua i tagata o nuu ese ona gaua'i i le tulafono ma le aganuu o Iutaia, ona fa'ato'a agava'a lea e fa'atuatua ia Keriso. A o se fesili fa'atupu manatu, a fa'apea ua fanaufouina le tagata Iutaia po o le tagata nuu ese i le Talalelei ia Iesu, aisea la e tatau ona ola pea i lalo o le malosi o le tulafono?

O le fa'amoemoe lea na tusia ai le tusi o Kalatia, ina ia tete'e ai i le manatu lea o nisi o le au Kerisiano Iutaia, ma toe valaauina ai tagata fa'atuatua i le Talalelei moni ma le fa'amaoni. O le Talalelei e mo tagata uma – o tagata Iutaia fa'atasi ma tagata o nuu ese. Tatou te maua le fa'aolataga ona o le alofa tunoa o le Atua, e ala i le fa'atuatua ia Keriso Iesu e toatasi, e leai se isi mea. O le fa'atuatua ia Keriso, o le sa'olotoga moni lea.

I le manatu o Paulo, o le fa'aolaina lava, o le meaalofa foi fua lea a le Atua e ala ia Iesu Keriso ma le taulaga na ia saunia. E lē i maua le fa'aolataga ona o se amio ua tonu po o le aga ua sa'o a le tagata, e lē i o o mai foi le fa'aolaina ona o le malosi e tausii le tulafono po o le lelei ona tauloto, e leai. E lē i maua foi e le tagata le fa'asa'olotoina ona o le usita'ia o le tulafono ma ana fa'asinoga. A e ona o le alofa lē fa'atuā'oa o le Atua lea ua mafai ai ona maua le leleiga ma Ia talu le galuega fa'atino a Keriso. Pau le mea e fai e le tagata, o le fa'atuatua lea i le Keriso manumalo. E lē o le tulafono, e lē o se isi lava mea e maua ai le fa'aolaina, a o le fa'atuatua.

O le taumafai atu la a le aposetolo e fa'amalamalama lona manatu, ua ia fa'atepa ai le tagata i le soifuaga ma le valaauina o Aperaaamo. I le manatu o Paulo, e lē o le tulafono na manuia ai Aperaaamo. E lē o le fa'atinoga o fa'atonuga na ta'u amiotonuina ai o ia, a e ona o le usitai ma le fa'atuatua ua tele nauā, na ala ai ona fa'amanuia i ai le Atua.

A lea e molimau ai le tusi o Kenese. "ua faatuatua foi o ia i le Alii, ona ta'uamiotonuina mai ai lea ia te ia." O lona uiga, e matua leai lava se mea a le tulafono na faia ia Aperaaamo, ae ona o le alofa lava o le Atua, atoa ai ma le fa'atuatua a le tagata. Auā foi, e muliai o o mai le tulafono, ae ua leva ona feoi le Atua ma Aperaaamo. Ua uma foi ona Ia faamanuia ia te ia. A lea e molimau lava le Tusi Paia, "...ou te faamanuia foi ia te oe,..e manuia foi ia te oe o aiga uma o le lalolagi." O gafea la o le tulafono e maua ai le tautinoga lea.

O le upu moni a, tatou te fiu e sue i mataitusi o le tulafono se mea e maua ai le ta'uamiotonuina, e le maua, aua foi, o le tulafono lava ia e mo le tino, a o le faatuatua e fa'a-le agaga

lea. A lea e fesili ai Paulo i tagata Kalatia, “pe na maua ea e outou le agaga i galuega o le tulafono, po o le tauleogologo atu i le faatuatua?” Ioe, o le faatuatua o Aperamo, lea ua faapena ona manuia ai le lalolagi atoa. A le faatuatua o Aperamo lea ua taua ai i tatou o suli, ua le gata ina taua o suli o Aperamo a o lea foi ua taua o suli faatasi ma Keriso. Aisea? O le faatuatua ma le talitonu i le faaolataga na saunia e Keriso.

GALUEGA FA’ATINO: Talanoa

Vaelua le tou autalavou ma fai se finauga (debate) i le fesili lenei: Afai ua fa’aolaina i tatou ona o le galuega na faia e Iesu (e ala i lona maliu ma lona toetu) po o le a ea le mea e ta’uamitonuina i tatou? Po o le tausisi pea i tulafono e pei o tulafono e sefulu, po o le na o le fa’atuatua lava?

O le isi itu, o le a finau e fa’atāua pea le tulafono ma lona tausiiina e maua ai le fa’aolataga. A o le isi itu, o le a finau e fa’atāua le fa’atuatua e maua ai le fa’aolataga.

AOTELEGA:

O le upu moni, e lē o fa’apea o lo o fa’alēaogaina ma fa’aleagaina e le Aposetolo o Paulo le tulafono. O lo o silafia lelei e Paulo lona tāua, auā foi, sa ia tausisi malosi foi i le tulafono ma aga fa’alutaia. O Paulo foi le isi Iutaia ua liliu e avea ma Kerisiano. A o le uiga tonu o le a’oa’oga ma le tima’iga o le Aposetolo, o le fa’aaogaina sesē o le tulafono e fa’apea, e pau lea o le auala e maua ai le fa’aolataga. A fa’apea e pau lea o le auala, ona lē aoga atoa lea o le mea na faia e Iesu. O le a le aoga o le maliu tiga ma le toetu manumalo a lo tatou

Alii Faaola, pe a fa'apea e mafai a na maua le ola fa'avavau pe a tausī tulafono?

O le fa'aaogaina foi e Kerisiano Iutaia o le tulafono ma aga fa'alutaia e fa'apea e maua ai le fa'aolaina. E foliga mai o le a tau 'ese ai la o tulaga fa'aolaina o le Kerisiano Iutaia ma Kerisiano nuu ese. A e o lo o manino lava i le apo'apoa'iga a Paulo, o le fa'aolataga e maua i le fa'atuatua ia Iesu e mo tagata uma. E leai se fa'ailoga tagata, e le ta'ueseā le tagata ona o lona fa'asinomaga. A e tasi lava le auāla mo tagata uma o le lalolagi e maua ai le fa'aolaina.

O le aoga moni o le tulafono, o lo o mafai ai ona maua le soifua solo lelei ma le ola to'afilemu, e lē gata i totonu o malo ma atunuu, a e fa'apena foi i totonu o nuu ma aiga fa'apea le galuega a le Atua. O le tulafono e leoleoina ai le ola o le tagata i lona itu i le tino, peitai, o le vaivaiga foi lea e ala ai ona lē mafai ona fa'aolaina le tagata i le tulafono, auā o le taimi lava e soli ai le tulafono, o le taimi lava e sesē ese ai ma le tulafono, fa'asala loa.

A e o le faatuatua, e mafai ai e le tagata ona maua le fesoasoani ma le fa'amafanafanaga, e maua ai le loto tele ma le onosai, e ola agamalū ma ola fa'apalepale ai, ae le gata i lea, e iloa ai ona ola alofa e pei ona alofa mai o le Atua.

.....

ASO SA: 28 SETEMA 2025

MATĀ'UPU: O LE OLA FIA TAUI MA SUI

TUSI FAITAU: 1 Nofoaiga o Tupu 19: 1 – 15

FESOASOANI MO LE TA'ITA'I

Fai mai le aoaoga o nisi o tusi a Mose, e suia le mata i le mata, e suia le nifo i le nifo, e tauia foi le toto i le toto. O lona uiga, afai e leaga mai, leaga atu i ai, afai e inoino mai, inoino atu i ai. A o amioga ia, o amioga o le fia tau ma sui, o lagona o le lē fia toilalo, a e silisili ai, o uiga e fa'ailoa ai le leai o se loto fa'amagalalo.

O uiga ia ma amioga, ua mamafi ai le lalolagi, auā foi, o lo tatou lava lea masani. Po o le a le lelei o se mea, a o le a foi le matagofie o se mafutaga. E sasi loa le isi i le tasi, pau a le tulaga e oo i ai, o le tau atu lea o le leaga i se isi foi leaga e sili atu.

Peitai, ua aoao mai foi lo tatou Alii Fa'aola o Keriso, ma ua ia vaoia ia ituaiga amioga ma ia faiga fa'afetauia'i. Ua Ia aoao mai foi, ua fa'apea mai, "ia alofa atu i e o fai outou ma o latou fili; ia agalelei atu i e ita mai ia te outou, ia outou fa'amanuia atu i e fetuu mai ia te outou, ia outou tatalo foi mo e tuua'i fua mai ia te outou. O lē pō ia te oe i le tasi alafau, ina liliu atu i ai le tasi; o lē aveese lou ofu tele, 'aua e te vaoia atu foi lou ofutino."

Atonu o lo o atagia lea aoaiga, i le tali atu o Tavita i le na fa'asagatau ia te ia. E pei ona i ai i le tusi faitau.

O le nuu o Amoni, sa i tala atu o le tuaoi i sasa'e o Isaraelu. O SaAmoni na tupuga mai ia Pename, le tama a le usuga a Lota ma lona lava afafine o lo o i le tusi o Kenese. Sa avea Amoni

ma fili tumau o Isaraelu. Sa oo foi le nuu i le tumutumuga o lona malosiaga i ona po o Fa'amasino.

O Tavita la, o le taitai muamua lava sa mafai ona fa'aumatia atoatoa le nuu lea, sa le mafai ai lava ona latou toe fa'alavelave ia Isaraelu mo tausaga e tele.

Peitai, ua le malamalama Anuni i fa'amoemoega a Tavita ma ua ia fa'alogu fua i alii o le nuu sa taumafai e fa'aseseina ia. Ma tupu ai le masalosalo vale, o lona masalosalovale lea sa iuvale ai lava. Ua ia tali atu ai i le agalelei o Tavita, i le fa'alumaina o nai auauna sa auina atu.

Sa fai uma 'ava a alii Isaraealu auā o le tu masani lea. O se luma pe afai e tafi fa'amalosia le 'ava a se isi. Fai o lona, ae sa toetoe a fa'atelenoa e Anuni auauna a Tavita. Mafua mai ona o le loto ua tupu ai le masalosalo i le fa'alogologotala.

O le mea moni, e masani ona o tatou masalosalo i isi tagata ona o ni mea sa tutupu muamua, ma tatou fesiligia, ma fa'auigaina ai mea uma latou te faia. Peitai, E tāua le mataala i o tatou sootaga ma nisi o tagata. Ma e lē tataua ona tatou manatu, o mea uma lava e fai e na tagata, e fa'avae i le leaga i taimi uma, ae maise ona o ni sese na latou faia i taimi ua sola.

Ae faimai le tala, ua le gata la ina ua fa'alumaina le faigamalo o Tavita, a ua ia faifai foi i le nuu o Isaraelu. O se faiga matuiā tele i le vaaiga o tagata Isaraelu. A o le a le tali atu o Tavita? Sa tali lava i le alofa Tavita i ana auauna, i lona fai i ai e nonofo i Ieriko se'i toe tutupu o a latou 'ava ona toe foi atu lea. Ae ina ua iloa foi e Anuni le mea lea ua fai e Tavita, ua ia toe fia tau ma sui, i le tali atu i le ita, ma le loto pogisa.

O lona uiga, ua sili atu ia Anuni le fa'aalu o tupe e tele e taumafai ai e ufiufi le leaga nai lo le tautino o lona sese, po o le

fa'atoese ma saili se fa'aleleiga. Sa oo ina matua afaina ai. E sili atu le aafia o le tagata e taumafai e ufiufi le sese, nai lo le tagata e tautino ma le fa'amaoni le sesē. 'Aua ne'i fa'atuputele le leaga e ala i lo tatou taumafai e puipui o tatou sesē, a e saili le fa'amagaloga ma le fa'aleleiga, i le taimi lava tatou te iloaina ai so tatou sesē. E le gata e laveaiina ai tatou mai tiga ma faigata, ae laveaiina ai foi isi tagata mai lea fa'afitauli.

Aea le tali atu o le au tau a Tavita ia Ioapo ma Apisai, lea o lo o i le fuaiupu e 13, *"Ia e fa'amalosi, ma ia fa'amalolosi i tatou ona o lo tatou nuu, ma aai a lo tatou Atua; a ia faia e le ALII le mea e finagalo i ai o ia."*

Ioe, manino i le fai mai o Ioapo, e le o i ai se agaga ia i latou a mea ua fia oo le oti ia i latou ua fa'asagatau mai. Pau le agaga o Ioapo ma Apisai, ina ia latou fa'amalolosi, ae tuu uma o latou fa'atuatuaga i le Atua e na te fa'ataunuuina le amiotonu ma le sa'o.

Ia, e ui lava ina taumafai le tupu o Tavita ina ia le oo le mea o loo manao ai Anuni ma lana au tau. Peitai, ua le mafai lava le finau o le fanauga o Amoni, ua oo ai lava ina fa'atoilalo e Tavita i latou. Pe a oo ina fa'auma le faitau i le mataupu.

A o le mea taua o loo atagia ia Tavita, o loo i ai lava le Atua. Ona manatua ai lea o upu a Paulo i le ekalesia i Roma, "Afai ua 'au ma i tatou le Atua, o ai se fa'asaga tau mai?"

GALUEGA FA'ATINO: Talanoa

Fa'atalanoaina ma le autalavou, po o a ni auala o latou iloa e mafai ai ona fofō ai se fa'afitauli i le va ma le isi tagata? O le tu ma le aganuu o Samoa, a matuiā ma ogaoga se agasala o se tasi

i le isi (e pei o le fasioti tagata), ona fa'atino lea o le ifoga. A e ua matauina i nei ona po, ua foliga mai o le fa'atinoga lava o le ifoga ina ia fa'aititiitia se sala e tuuina atu a e ua le fa'atino i lona tulaga moni. E manaia a e fa'amatala muamua i le fanau, le uiga moni ma le autu o le ifoga, ona fa'atalanoaina la'ia o lona fa'aaogaina i nei ona po.

AOTELEGA:

O la o le Aposetolo o Paulo, "Afai ua 'au ma i tatou le Atua, o ai se fa'asaga tau mai?" A ua aoaoina i tatou e Tavita i lenei taeao, o le ituaiga tali e tataua ona tatou tali atu ai i e o fa'asaga tau mai. O le a le tali? Tali i le alofa, tali i le loto fa'amagalo, tali i le amiotonu ua aoaoina ai i tatou mai le Atua.

Fai mai le fetalaiga a Iesu, "ai se na te po mai i lou alafau taumatau, ia e liliu atu ia te ia le isi." O a ni leaga, o a ni aleu, o a foi ni mea ua le lelei, o fa'aletonu foi i le va o le tasi i le isi, fai mai Iesu, fa'amagalo. Peitai, o le fa'amagalo lea e finagalo ai Iesu, o le fa'amagalo ma fa'agalo, ae le o le fa'amagalo, ae le galo. Auā foi, ua silafia lelei e Iesu, a le mafai ona tatou maua le loto fa'amagalo, o le a fa'apena foi ona le mafai ona agai i luma lo tatou ola.

O le a saisaitia ai o tatou loto ma agaga i ia lagona vaivai, o le a fa'apena foi ona le moni ai lo tatou ola mafuta ma le ola ofoina atu i le Atua, ae le gata i lea, ae o le a avea foi lea ma fa'atupu ma'i, auā o le avega mamafa e tauave i aso uma, le mafaufau ma mafaufau pea i le leaga ua fai mai.

A o le tagata ola fa'amagalo, o le tagata lea ua na mafai ona ia fa'asaolotoina o ia mai le pule ma le mailei a le tiapolo, a o le

tagata foi lea ua matuā manino ma malamalama lana pupula ma lana vaai i le alofa ma le fa'aolataga na saunia ma fa'atinoina e Iesu.

Na fiu le au faresaio ma le au tusiupu e fa'asagatau ia Iesu ma oo ai ina o latou fasiotia lo tatou Alii Fa'aola. A o lona toetu manumalo mai le oti ma le tuugamau, ua maua uma i tatou le fa'amagologa sili e ala i le ola fa'avavau.

.....

ASO SA: 26 OKETOPA 2025

MATĀ'UPU: MANUMALO ONA O E FAUFAUTUA

TUSI FAITAU: Faataoto 11: 7 – 14

FESOASOANI MO LE TA'ITA'I

O le manumalo, o le taunuuga manuia lea o se tauiviga po o se tausinioga sa feagai ai. O se fa'atinoga foi e lē itiiti se taimi fa'aalu, a o se taumafaiga e lē fai tau ina fai, pe na o ona tau fai ina ia fa'ataunuu. Peitai, o le manulauti ma le auga lea o se tapenaga e matuā tuu atoa i ai le loto, o le mafaufau, ma le agaga; o le sini foi lea ma le faamoemoe. O le manumalo, o le fa'aeaina, ma le fa'amanuiaina.

A o le faufautua, o le aga masani o le tu'ualalo, o le tagata e loloto le tofā, o le tofā e fetuutuuna'i, e malu ai le sousou o ni fa'aletonu e alia'e mai, a o se tiute e faamoemoe i ai le lelei o se taumafaiga.

E masani aiga Samoa a sauni malaga fanau e saili manuia i atunuu mamao, e matuā fai le alalafaga taumavae. O le taimi lea e avatu ai fautuaga a Faifeau, po o matua ma aiga auā le fa'amoemoe o le a malaga atu ai. Ina ia 'aua lava ona alu ese ma le ta'iala ua uma ona fa'ataoto e matua na ola ma savavali ai, a o laitiiti se'ia o o ina avea ma tagata matua. O fautuaga lava ina ia tini lau o le fa'amoemoe, ma ia i'u manuia le taumafai.

E foliga faapea le ata o lo o taoto i totonu o le fuaitau i lenei aso Sa.

O le fa'amanuia, e o fa'atasi ma fautuaga. O fautuaga e mautinoa e taunuu ai i le manuia se fa'amoemoe. O le ala lea o le faapea mai o le poto o Solomona i le fuaiupu e 11, *"o le fa'amanuia e manuia ai le aai..."* O lona uiga, peiseai ua faapea mai Solomona, o ni fautuaga ma se tuualalo, e manuia ai se nuu, se malo ma se ekalesia. O fautuaga e mautinoa lona sa'o ma lona atoatoa. A lelei le faufautua a taitai o se nuu, o lona malupuipua foi lena ma taunuu manuia ana fuafuaga uma. A e a fa'aletonu foi le fautua, ona o tatou vaaia foi lea o se nuu ta'ape'ape, ma feaina'i.

Peiseai, o le uiga lea o le taumafai atu o le poto. O upu e matua tomatauina ai le ola tuputupua'e o le tama ma le teine Eperu. O upu a o o ina uluulumatāfolau i le loto, ona atagia lea o se olaga manuia ma se soifuaga ua mautinoa le sa'o ma tonu i luma o le Atua. O le vaai mamao, ma le tofā manino, o tiute ma faiva e ao ona faatino i totonu o le olaga fa'a-Israelu. O le olaga e fa'amanuiaina, e manuia lava i soo se mea e manatu i ai, pe a i ai le fa'atuatua.

O lona uiga, o le soālaupule, o le fa’asoa, fetufaa’i, o le avatu ma aumai, o le iloilo lelei po o ua talafeagai ma le fa’atatau, ona manino lava lea e lē o se to’ilalo, a o le manuia. O le nuu foi o Isaraelu ua matuā toatele nauā, ua leai se faamasino, peitai, o le nofoaiga a Solomona, e leai se na muamua, e leai foi se e mulimuli mai ia te ia e tusa ma lona potu, ona o lona faamoemoe i le Atua. Peiseai, o le ala lea na ‘ole atu ai Solomona i le Atua, ua leai se fautua e faufautua, ua mavae lona Tama o Tavita.

O lona uiga, e moomia se faufautua malosi, e lē malosi na o ona fautua i le upu, a e ia galue foi le fautua, e fa’aalia i lana galuega fa’atino o lo o gafa taulimaina e le fautua itu uma e ao ona fa’atino mo le sologa manuia o mea uma. A o le manulauti lava lea o lo o taoto i totonu o le Tusi o Faataoto, o ala fa’afautuaga e faufautua ma tuualalo, ia mamao le vaai ma le suamalie o mea faatosina ae ia savali i luma. Aga’i pea i luma, saili pea i luma lo tatou faamoemoe e maua ai le manumalo.

GALUEGA FA’ATINO: Talanoa (1-on-1 chats)

Ia fa’ata’ape le autalavou i paga ta’ito’alua. Fai ma fesuia’i, muamua ona fa’asoa le isi i le isi, i fautuaga o lo o ia fia fa’asoa ia te ia. A uma ona fa’asoa foi le isi ma ona fautuaga. A mae’a ona faufautua le isi i le isi. Ona fesili le isi, po o e seki? (Are you ok?). O le avanoa lena ina ia fa’asoa atu foi latou i ni mea o lo o mamafa i o latou mafaufau (e tāua tele ona faia fa’alelei le vaega lea ina ia *comfortable* le fanau e fa’asoa i ni o latou fa’afitauli o lo o feagai ma latou).

AOTELEGA:

O se fa'amanatu tāua foi lea mo i tatou. O le manumalo ma le fa'aeaina, e fa'ama'ite mai le loto mauualalo e taliaina ai fautuaga lelei, ma se tuualalo o lo o a'oa'o mai ai le Atua ia i tatou. O le upu moni, e lē tasi se auala e fa'aalia mai ai le Atua e aumai ai fautuaga mo lo tatou aga'i i luma. E fa'aalia mai le Atua i le loto, o le loto e gaua'i gofie ma usita'i, e faalogo ma le loto mauualalo, e agamalū ma tusa'afia, e alofa ma loto fa'amagalo. E le taumate foi, e a'e ma le manumalo o tatou faiva, e fa'aeaina foi le tagata e taliaina fautuaga.

O se fa'amoemoe lelei foi ma atoatoa lona fa'atinoga, pe a tu'u fa'atasi ma fautuaga a e faufautua. O lona uiga, a leaga le faufautua, ua le atoa foi lā se faamoemoe, ma le maua le sini oloo tuumata'i. A e a lelei le fautua, e ta'uleleia ai se aiga, o se nuu, ma se Ekalesia, ma taunuu i le manumalo ma faeaina. O lona uiga, ia faia le fautua i ala e ao ona tatou iloa e manuia ai. Auā e lē puaoa lau silasila i le tele o fa'afitauli e fetai'a'i pea ma tatou, a o tatou i ai i lenei olaga.

O le soifuaga lava lenei, e tatou te fa'alologo i fautuaga ma le faamalosiā mai o nai o tou tua'ā ma o tatou mātua. O fautauaga lava e mo le sologa lelei o lo tatou aumau ai i lenei lalolagi ma saosaoa o ona suiga. E le itiiti foi le taua o le faasoā mai o nai o tatou matua fa'aleagaga, e tapu'e ma fa'afaiileleina le soifua tautua ma le ola auauna i le Atua, ina ia taumasuasua i le tamāoaiga fa'aleagaga.

A lelei la ona o tatou fa'aogaina fautauaga uma nei e le taumate o le a taunuu manuia o o ta faamoemoe ma fuafuaga

uma. Pe siva pe ta'alo, pe galue foi ma soo se tiute e fai, talia lava fautuaga i le loto maualalo ma le onosai.

Ia avea foi i tatou o ni faufautua lelei, fautua mo le manuia o lou uso-a-tagata, fautua mo le manuia o nuu aemaise o le ekalesia. O lo tatou manumalo foi lena ina ua laveaiina se uso ua moomia so ta fesoasoani, e ala i lau faufautua ma lau tuualalo.

Ua tele lava nai o tatou tupulaga talavou ua maumau o latou soifua ona ua leai se isi e fautua lelei ia i latou. Aemaise i le feagai ai ma ma'i fa'alemafaufau i lenei vaitau, fa'apei o le *depression*. O le fautuaga mo tatou, 'aua ne'i muta le faufautua, 'aua ne'i tu'ua le ola mafuta. Ia 'aua ne'i tu'ulafoa'ia lou uso.

Tusa lava pe te vaai atu i lou uso po o lou tuafafine/tuagane o lo o fiafia, fesili pea i ai po o i ai se mea o mamafa i lo latou mafaufau. Tatou lē mailoa le mafatiaga o lo o feagai ma le isi tagata. A e a fa'apea foi o i ai se fa'afitauli o lo o fa'apologaina ai lou mafaufau, 'aua ne'i e nofo ma oe. A e sa'ili se isi e mafai ona e fa'asoa i ai.

O le manumalo o Iesu mai le oti ma le tuugamau i lona toetu manumalo, na afua ona o lona uia o ala uma na faufautua i ai le Atua lona Tama, o le talia o le valaau e ala i le faaolataga mo le lalolagi, e le'i 'alo ai le Alii o Iesu, ae sa savali ma le fa'alologo, sa talia ma le lotomaualalo, sa faia e aunoa ma se tali i se upu, lea ua tatou manumalo fa'atasi ai ma le au-Kerisiano uma i le ola faavavau,

.....

ASO SĀ: 02 NOVEMA 2025

MATAUPU: TAPENAGA A LE ATUA

TUSI FAITAU: Salamo 56: 9-13

FESOASOANI MO LE TA'ITA'I

Manino i le vaega o le Salamo na faitauina – o le tapenaga a le Atua, e afua ai ona maua e le tagata le manuia. Ae o le ata foi lea, o le alofa tausī o le Atua e le mavae mo i latou.

O le talitonuga a tagata Iutaia, o le tausī faapelepele a le Atua i lana foafoaga, o le faailoga lea o lana tausiga alofa ma lana faasoa mo i latou.

O le afuaga lea o le loto faafetai ma le soifua vivii o le Isaraelu i le Atua, ona o faaamanuiaga e tele a le Atua ua selesele ai ona tagata i manuia. O le seleselega ua lava ma totoe ona o faaamanuiaga a le Atua i le laueleele.

O le feso'ota'iga vavalalata ma le faatusaina o le Atua i le vai e faasūsūina ai le laueleele, faatasi ma le vaitafe e saunia ai saito.

O le faailoga lea – o le Atua o le OLA.

O le Atua o le pogai ma le afuaga o mea uma lava. Ae o le ata manino foi lea, o le alofa foi fua mai o le Atua. E tusa ai ma le faatāuaina o le fua mai o le elelee, aemaise o le matagofie o le si'osi'omaga faa-le-natura.

Ae o le foi fua lea o le tapenaga a le Atua, e lē tupu fua. O le uiga lea o le "lololo" o lo'o ta'ua i le fuaiupu e 11. O le foi a le Atua e ala i mea uma o le foafoaga ua na Ia tapenaina, e le na',

ina ia manuia se tasi. Ae ia manuia ai tagata uma, ma mea uma foi o i le foafoaga.

O le molimau ola lea o le faafetai o le fai Salamo i le Atua. Ona o le tapenaga a le Atua, o le alofa ma faamanuiaga ua selesele ai le tagata i manuia e tele, ina ia taufai vivii i le Atua ma le agaga faafetai.

Lona uiga, o mea uma foi o le si'osi'omaga faalenatura, o mea uma o le foafoaga paia a le Atua, e ao lava ona faafoi atu le viiga ma le faafetai i le Atua.

O le uiga atoa foi lea o le Salamo lenei, o le loto e ao ona vivii a'e i le Atua, ona o mea ua na ia tapenaina. E alalaga fiafia, ma pepese lava, i le alofa foai o le Atua ua ola ai le tagata ma le lalolagi atoa.

AOTELEGA

Tupulaga talavou, o se faamanatu lea o le Talalelei mo i tatou uma. Ae o le aotelega foi lea o le manatu autu o lenei mataupu. O le tapenaga a le Atua, e mae'ae'a ma atoatoa, ua Ia saunia ai mea uma e soifua ma ola ai le tagata i tafa uma o le olaga, ina ia manuia. Ua le gata i le tino ma le mafaufau, ae ua faapena foi ma le agaga.

A vaavaai toto'a i le tapenaga a le Atua, e ala i le foafoaga, e le tagatasi pe manofonofo. Leai, e gaoioi, e tupu ma olaola pea. E pei o le pa'u a le popouli, e toe ola mai ai lava le niu. O le galuega tele lena ua feagai ma lo tatou ekalesia.

Ina ia tupu pea ma ola pea le soifua faaleagaga o le ekalesia, e le gata ina ia ola ai i tatou tupulaga, a ia ola foi ma lou uso-a-tagata.

O le uiga lea o se manatu, o lo outou soifua tautua ma ola auauna i le galuega nei, e le na ona ia manuia ai na’o oe ma lou aiga. Ae ia manuia ai le lalolagi atoa.

A o tapenaga uma ia tatou te fa’aaoga, o meauma ua foaiina mai e le Atua Poto, le si’osi’omaga na faavae e le Atua Foafoa, ae a faamanuiaga e tele ua sasa’a mai e le Atua Alofa ma le Faamaoni. Mea ia e tuuina mai e le Alii, tatou te faaaoga e faitaulaga faafetai ma saga viia ai lona suafa e fa’avavau.

GALUEGA FAATINO

Tuu le avanoa i Tupulaga, sei fefaasoa’i ai i le taua o tapenaga sa faia e le Atua i le soifua ma le ola, faatusatusa i tapenaga a nai matua, ma soo se isi lava tagata sa fesoasoani malosi i lona soifua atoa i le tapenaina o lona ola valaauina.

Tofu a le talavou ma lana faataitaiga e faasoa ai.

.....

ASO SĀ: 09 NOVEMA 2025

MATAUPU: O LE TALALELEI MO E SAUAINA

TUSI FAITAU: Isaia 61:1-10

FESOASOANI MO LE TA’ITA’I:

O le *Talalelei* e pei ona faauigaina e le Tusi Paia, o tala e faasino i se mea ua tupu e faatupuina ai le fiafia, olioli, faamoemoe ma le loto tele.

Isaia, o le tusi pito telē o tusitusiga a le 'au Perofeta, aemaise foi i le Tusi Paia atoa. E iloga lona telē ona o le telē foi o le vaitaimi o le tala faasolopito o Isaraelu o loo aofia ai. Ma e tolu vaega e mafai ona vaevaeina ai le tusi, vaega muamua – mataupu 1-39, vaega lona lua – mataupu 40-55, ma le vaega lona tolu – mataupu 56-66.

O le vaega la o le tusi sa tatou faitauina o loo taoto i le vaega lona tolu, o le vaitaimi ua toe fo'i atu le fanauga a Isaraelu mai le tafaega i Papelonía. Peitai, ua le alofia lava fita ma faigata na feagai ai ma le nuu o le Atua i le taimi o le tafeaga. Ua le tuuina ai foi le sauaina o tagata Eperu e le malo o Papelonía. Ua telē le suiga o le olaga o le Isaraelu mai le mea sa i ai.

Faimai o le taimi sa faaunuua ai Isaraelu, na momoo lava o latou loto ina ia toe foi i Ierusalem; a o lenei ua toe foi mai le tafeaga o le mea lava e tasi. A o le tala lelei ua tuuina atu i le perofeta e talai atu i Lona nuu, o foliga vaaia lea o le tumau o le alofa tunoa o le Atua mo i latou.

Le alofa lea na te faamafanafana ma faamalosi i le tagata ua palaai ma le ua vaivai; na te aumaia le fiafia ma le olioli i le tagata ua faanoanoa; e faatupuina foi le faamoemoe ola i le tagata ua mate le faatuatua. O le tala fiafia e faatupuina ai le agaga o le olioli ma le faasaolotoina.

Ua auina atu le auauna a le Atua ua fauuina e le Agaga, ina ia tuuina atu le "tala lelei i e ua tigaina." A o le tigaina, o loo faasino i latou uma o puapuagatia, mafatia ma matitiva. O lona uiga, o le tala mai le Atua ua tauala mai i lana auauna ua

faauuina, ua iloa ma mautinoa ai, o se tala e lelei. O le tala o le lavea'iina ma le sa'olotoga o ona tagata ua pule sauā e nuu ese. Le tala fiafia mo Isaraelu ua mafatia o latou loto ona o le feagai ai ma puapuaga o le ola faatafeaina. A lea ua tafa ata o taulelei, e ui a ina o loo ola puapuagatia pea le tagata ona o le malo o Papelonia, ae ua folafolaina le tausaga e talileleia mai ai le Alii, le aso e tau ma sui ai le Atua, e faamatalaloto ia i latou uma o e ua faanoanoa.

Ua faamalosia'au ma faamafanafana atili le talalelei i suiga e tele ua tolaulau e le perofeta. Fai mai, "e avatu le fiafia i e faanoanoa i Siona." Ua iloa foi, o Siona, o le ogatotonugalemu lea o le soifua faalefaatuatua o le Iutaia i Ierusalemā. E faapea o le vaega o le aai o lo'o faatasi ai le Atua ma ona tagata. O lona uiga, avatu o le fiafia i e faanoanoa, o le faatasi lava lea o le Atua ma le Isaraelu aemaise lava i le feagai ai ma mafatiaga. O le toefuata'iina o i latou mai le faanoanoa ma le vaivai, o lo latou faamalosia lea i le alofa tunoa o le Atua ua lavea'iina ai i latou. O le faafouina lea o le Isaraelu e avea ai i latou ma "laau o le amiotonu." Tagata ua matua maua'a o latou faatuatua i le Atua. Ua faafiafiaina e le Atua i latou, e na te toe faafoi le viiga ia te Ia.

O se tala lelei ma se tala malie tele lea i le faalogo a le Isaraelu sa faatafeaina, auā foi, o le to'asa o le Atua na faatafeaina ai o i latou. A o lona alofa tunoa lea ua toe faaolaina ai foi latou. O le alofa lea e sui a'i le lefulefu, e sui a'i le faanoanoa, e sui a'i le loto faavaivai. Le alofa ua na faalauleleia le ala tanu e foi mai ai le tagata ua tigaina ma ua mafatia, i le filemu ma le malologa tumau e maua ia te ia e faavavau.

AOTELEGA

I le aotelega o le tatou mataupu i lenei Aso Sa. O le talalelei, o le tala i le alofa tunoa ma le alofa faapalepale o le Atua. O le tala o le lavea'iina ma le faaolaina e le Atua o le lalolagi, aemaise o e ua sauaina i soo se pule soo na fai.

O le talalelei e na te faamalolo ma faasa'oloto tagata uma

O le upu moni, ua le mafaitaulia le tele o faafitauli ua feagai ma i tatou tupulaga i lenei vaitau. Peitai, o le tagata lava ma lana. Ao lea ua faaoololomaau mai Isaia, ia aua nei avea ia tiga ma mea e faavaivai ai lou faatuatua.

Aua e suia uma e le alofa tunoa o le Atua tulaga pagatia o feagai ma ona tagata, mai le faanoanoa i le fiafia, mai le faavaivai i le malosi, mai le loto nutimomoia i le olioli ma le vivii.

O le ala lea e faatupuina ai pea lou malosi i le tala lelei o le alofa tunoa, ma le alofa laveai o le Atua. O le malosi faatupu malosi lea, e mafai ona faatinoina ai lo tatou ola valaauina i soo se ala.

E le gata ina ia faaolaina ai oe ma a'u, a ia ola uma ai foi ma lou uso a tagata ua fia maua se fesoasoani.

O le mea moni, o le tala'iina pea o le talalelei o le alofa tunoa o le Atua, e le mafai ona taofiofia e se tagata, auā o ave malolosi o lea talalelei, e faamalolo ma faasaoloto ai soo se agaga o saisaitia ma sauaina i taaviliga o faigata o le ola nei.

GALUEGA FAATINO

Tali fesili nei e faalautele ai le taua o le mataupu.

1. O le a le sauaina?
2. Pe faape'i ona iloa foliga o le ola sauaina, faataitaiga, o tupulaga?
3. Ae o lea le Talalelei?
4. O lea la se manatu o tupulaga i lenei manatu autu, o sa'o pe leai, fua i lo latou malamalama'aga?

.....

ASO SĀ: **16 NOVEMA 2025**

MATAUPU: **E TUPU LE FAATUATUA I LE
TAULOGOLOGO**

TUSI FAITAU: **2 Peteru 1:12-21**

FESOASOANI MO LE TA'ITA'I

E iai le talitonuga faapea, o le tusi lenei na tusia e le aposetolo o Peteru ao ia i i totonu o le malo o Roma. O le tusi o loo faaagaga mo le au kerisiano i totonu o Asia Itiiti. Ioe, e le o se tusi mo se tagata e toatasi, pe mo se aulotu e tasi, ae o le tusi o lo'o auina atu i ekalesia uma ma tagata kerisiano uma i totonu o lea itumalo.

Afai tatou te vaavaai i le faafanua o Asia Itiiti, ona tatou iloa lea, e fitu lava aulotu poo ekalesia o loo iai, o le ekalesia i

Perekamo, le ekalesia i Tuatira, o Semurana ma Sarataisa, o Efeso ma Filatalefaia faapea le ekalesia i Laotikaia. O ekalesia uma nei, lea o loo aofia i le tusi lenei a Peteru. Peitai, o le mea ia manatua, o ekalesia lava nei e fitu, lea foi na tusi iai le toeaina o Ioane ao faaaunuua i le motu o Patamo, e pei ona faamauina i le tusi o Faaaliga.

O le tusi atu la a Peteru, o nai ana timaiga ma apoapoaiga, o nai ana fautuaga ma lapataiga atoa ai ma lana faalototele ina ia mau pea le to'ovae, ia mausali le faatuatua i le Atua, ma ia tumau pea i le upu moni. E le o se mea e taufesiligiaina le lagonaina pea e le aposetolo o le loto fiala ma le agaga faamanu ona o le soifua ofoina atu o le au kerisiano e ala i le faatuatua i le Atua, peitai, e le mafai lava ona malolo le tiapolo i lona fo'i taumafai e faaleaga ma faamataga le tagata i lona va feagai ai ma le Atua. Ioe, e le o po se lilo ia Peteru le tele ma le anoanoai o aoaoga sesē ma aoaoga taufa'ase'e e mafai ona faasalaveiina ma faasolomuliina le ola faamaoni, le ola talitonu ma le ola tumau o le tagata i le talalelei ia Iesu Keriso.

“O le mea lea ou te le faatamala ai, e ui lava ina ua iloa e outou, ma ua faataumauina i lenei lava upu moni, ae saga faamanatu atu ia te outou i na mea. Ou te matua taumafai foi ina ia mafaia e outou ona manatu soo I ia mea. Ioe, e tupu le faatuatua I le taulogologo.

O le taimi lava e mapu ai le fautua a matua, o le taimi foi lena e amata sisipa ma sasapa ai amioga a le fanau. E tali foliga faapena le manatu o Peteru, ia aua lava nei fiu i le fautua ma le timai. Ia faamanatu i le tagata le tala i le alofa tunoa o le Atua e pei ona latou molimauina. Aisea? Aua foi, e ui lava ina ua nofo fale i finagalo ma faamoemoe o le au uso kerisiano le tala ile

alofa tunoa o le Atua, peitai, e pei o le emo o le mata ona galo, pe a oo ina matalasi, matagofie ma suamalie le faiga ma aga a le tiapolo.

O le tusi atu la a le aposetolo ua ia toe faatepa ai tagata kerisiano o Asia Itiiti i le amataga o le talaiga a le au aposetolo. O le upu moni lava, e lei talaiina atu ia tei latou ni tala tuu poo ni tala o le vavau, latou te lei faalogo foi o faamatala e le au aposetolo ni tala faa-fagogo poo ni tala fatu, e leai, ae o le tala i le mea moni lava na tupu.

AOTELEGA

O le molimau ua vaai tino. O le tupu ma le olaola ole talitonuga faa-kerisiano, na afua ona o le filiga ma le maelega o le ausoo i lo latou taumafai e faasalalau ma faailoa lea tala e lelei i le alofa tunoa o le Atua e pei ona latou molimauina.

Le talalelei lea ua soo ai itu e fia o le lalolagi ma ua faapena ona faatalaleleina ai uiga ma amioga, o tu ma aga I fanua, ae faapea foi le olaga o le tagata. ina ua ia taliaina ma talitonuina le tala I le faaolataga a le Atua na saunia ma faatinoina e Iesu.

O lona uiga, Tupulaga Talavou, o lou soifua ofoina atu ma lo tatou ola tautua i le Atua e ala i lana feau ma lana galuega, o fua faaaliali ia o le paia ma le mamalu o le Atua lea na vaaia e le au aposetolo ao mafuta ma le Alii. Ae o le musumusuga foi lea a le Agaga Paia ina ia tatou faalautele ma faasusulu atu lea mamalu ma lea paia i e o loo leiloa pea.

Tupulaga Talavou, e le o mapu lava le taugologolo a le au aposetolo, o loo latou faailoa mai pea mea mamana ma mea ofoofogia na latou molimauina e ala i le Tusi Paia.

O lo tatou faitau pea la ma lo tatou faalogologo pea, o iina e tupu malosi ai le faatuatua, e olaola ai le faamoemoe, ma mausali ai le talitonu o le tagata i le Atua ma lona alofa tunoa.

GALUEGA FAATINO

Faatalanoa le mataupu, se i tatala ai manatu ma lagona o fanau Tupulaga Talavou, i le taua o lenei mataupu i le taimi nei, aemaise o le avanoa ua o latou maua, ua valaauina ai i latou o Tupulaga Talavou a le Ekalesia.

.....

ASO SĀ: 23 NOVEMA 2025

MATAUPU: LEAI SE TOE FOI I TUA

TUSI FAITAU: Kenese 19:15-29

FESOASOANI MO LE TA'ITA'I

E le aoga le tago i le suotosina ma tepa i tua. O le tasi lea o aoaoga taua a le Alii o loo tautala tuusao ai i le maimau o le taimi o le tagata e taumafai ai e agai i luma le soifuaga ma le olaga, pe afai o loo taotaomia ona manatu ma ona lagona i mea ua tuanai. O le uiga o le faamatalaga, poo le a lo tatou naunau, ao le a foi lo tatou filiga e tuli so tatou ai i luma, o le upu moni lava, e le mafai ona maua, pe afai o loo tatou faatauaina pea mea sa tutupu i le taimi ua taunai.

Atonu, o le mafuaaga foi lea o le fautuaga a le aposetolo o Paulo i le ekalesia i Filipi, Le au uso e, ou te le manatu ua ou maua, ao le mea e tasi ou te faia, ou te faagalogalo i mea ua tuanai, ou te momoe punou ai foi i mea o lumanai. i le manatu o le aposetolo, e le mafai, le mafai ona taunuu lona faamoemoe e pei ona valaauina ai o ia e le Atua, pe afai e taofiofi mamau pea i le olaga sa ola ai. O le salalau foi ma le tupu talaulau o le talalelei i le Keriso toetu, e afua lea i lona le toe foi i tua i le olaga tuai sa masani ai, ae agai i luma i le olaga fou ua foaiina mai e Keriso mo ia.

E tali foliga faapena le agaga o loo aumaia e le tala lea na tatou faitauina ia Lota ma lona aiga, le inaina ma le faanatinati atu o agelu ia Lota ina ia o ese vave ma lona aiga mai le nuu o Sotoma manu lava e lei oo mai puapuaga. Ao le fesili, Aisea lava ua faauliulito ai le finagalo o le Atua ina ia faaoo le malaia i le nuu? O le tali, aua ua taumasuasua le ipu o le agasala o loo faia e Sotoma. Ua lei foi se vaipanoa o Komoro o toe iai se amiotonu, ua na o le agasala lava. O lona uiga, ua matua taai faafala e le tiapolo ma ana faiga olaga o tagata Sotoma ma Komoro. O le ala lea o le malaia o le nuu.

AOTELEGA O LE MATAUPU

A suesue pea le afuaga o le mataupu, ona maua ai lea o le feau taua mo i tatou Tupulaga, ia tatou faamalolosi, tatou tauivi pea, tatou taufetuli ma le punouai, tuli i luma so tatou ai.

O le upu moni lava, e le masino le toatele o e ua faavaivai ma ua liu tupua masima i le fanua laugatasi. O le fesili, Aisea? Ua toilalo i faaososoga ma mailei a le tiapolo ma ua toe tepa i tua

i le mea o loo i ai Sotoma ma Komoro a ua le tepa taulai ile Atua ma lona manumalo.

Tupulaga Talavou, e le o se mea lelei le alu alu i luma toe foi i tua. Ae o se mea matagofie ma le manaia, le alu i luma ma alu alu ai pea i luma.

FAATINOGA O LE MATAUPU

Vaevae le Au-talavou i ni vaega se lua, tofu le vaega ma ni mau taitasi mai le tusipaia, tusa poo le Feagaiga Tuai, poo le Feagaiga Fou, e lagolago pe tetee ai i le manatu autu o le mataupu ua folasia.

Tofi e oe le vaega tetee, ma le vaega e lagolagoina lenei mau, ona tuu lea i ai o le avanoa e faailoa ai o latou lagona i le mataupu.

.....

ASO SĀ: **30 NOVEMA 2025**

MATAUPU: **VALAAUINA E AUAUNA**

TUSI FAITAU: Mataio 21:1-11

FESOASOANI MO LE TA'ITA'I:

O lea ua maea le galuega folafola a le Alii ma ua faasaga nei ona fofoga agai i Ierusalema, ua taulai le vaai a le Alii i le tauluga o le galuega faa-auauna, le galuega e puapuagatia ai,

o le tiute e fai ai o ia ma pologa. Ioe, ua silafia lelei e Iesu le tulaga e oo iai pea tu vae i Ierusalem, peitai, e lei avea lea ma ala e taofia lana malaga faa-tupu. A lea ua faatutu le malaga i le mea e lamatia ai le soifua ma le ola, ua agai i le nofoaga e faatino ai le faaolataga.

Talofa, e ui ina faigata ae ua alu lava. Aisea? Le faatinoga o le galuega faa-uauna. Ioe, le Keriso ua afio mai i lona tulaga faa-tupu, peitai, o ia foi lava o le uauna, o ia o le pologa, o ia o le tagata faigaluega a le Atua.

AOTELEGA

O lo tatou iai iinei o i tatou lava o uauna, ua valaauina ma filifilia i tatou ina ia fai ma faaaoao i le lalolagi, tatou te faailoa atu lona alofa tunoa i le lalolagi agasala.

Tupulaga Talavou, lau pito laau nei e manatu faatauavaa i ai, lo'u tiute ma lo'u tofi nei ou faatamala i ai, la tatou uauna ma le tautua nei faatumutumu lima ona faataunuu, ona faamasinoina ai lea oi taua, a ia faia ma le filiga, faia ma le faamaoni, faia ma le loto lelei, ona faapena foi lea ona faamanuia mai le Atua i so'o se feau tatou te galulue ai.

FAATINOGA O LE MATAUPU:

Tatala le avanoa mo Tupulaga e faalautele ai le taua o lenei mataupu, ina ia iloa ma malamalama ai o lo'o silafia e Tupulaga Talavou le taua o lenei mataupu mo lo latou ola tautua ai i totonu o le Ekalesia o se Tupulaga Talavou ua ola ia Keriso.

.....

ASO SA: 07 TESEMA 2025

MATĀ'UPU: O LE LOTOIFALE O LE AIGA

TUSI FAITAU: Efeso 5:21 – 6:4

FESOASOANI MO LE TA'ITA'I:

O le tusi lenei a Paulo i le Ekalesia i Efeso, o le tusi o lo o avatu ai lapata'iga ma tima'iga a le toeaina. O le tusi o lo o faufautua ai le aposetolo i mea e tusa ma tatau ma le olaga o le tagata Kerisiano. O le matagofie o le tusi lenei, ona ua leai lava se vaipanoa o le olaga o le tagata e lei o o i ai fautuaga a Paulo. A o le vaega la o le tusi lea na tatou faitauina, o le ifo tonu lea o le tautalaga a le toeaina i le lotoifale o le aiga, i le va o le tamā i le tinā, le va o le tane ma le fafine, a e faapea foi i le va o mātua ma fanau.

E tele ina fa'auiga sesē e tagata le upu lea o le 'usiusitai'. E lē o le uiga o le usiusitai o le avea ma pologa, po o le avea ma tagata e na ona fai atu a o le mea e fai, alu loa fai. Ua poloai le Atua *'ina ia tootuli o tulivae uma lava i le suafa o Iesu, o e o i le lagi, ma e o i le lalolagi, ma e o i lalo o le lalolagi'*. A o Iesu Keriso lava ia sa usiusitai i le finagalo o lona Tama. Ua tatou ava foi ia Keriso e ala i lo tatou mulimuli i lana taitaiga. A tatou usitai i le Atua, o le a faigofie foi ona tatou faia lona finagalo, ina ia tatou usitai foi i isi tagata. A o'o ina fa'aipoipo le tane ma le avā, e tau fai usitai uma la'ua, o le tasi i le isi. E mulimuli le

avā i le taitaiga a lana tane ona o Keriso. O le tane foi e tatau ona taatia ese ona lava manaoga, ina ia tausi i lana avā.

E ui ua fa'aaoga sese e nisi sosaiete le a'oa'oga a Paulo fa'atatau i le usitai, e ala i le tuu atu o le pule atoatoa i alii, peitai o se aoaoga e le mafai lava ona tatou alofia: ia usiusitai avā i o latou tane. E tele sosaiete ua le talileleia pe logo malie ai lea a'oa'oga, a e le se mafuaaga tatau lea e ala ai ona fa'aleagaina pe tia'i ese. E mafai ona tatou fa'aliliueseina le agaga tetee o le sosaiete i lea vaega o le mafutaga fa'aleulugalii, pe afai tatou te manatua le itu lenei: e a le avā e usitai, a o le tane e 'oti'. E tusa ma le fa'asinoga o le Tusi Paia, o le tane o le ulu fa'aleagaga lea o le aiga, ma e tatau i lana avā ona amanaia lana taitaiga. O le taitaiga fa'aleagaga moni lava ia, e aofia ai le auaunaga e fa'avae i le alofa (o le isi ituaiga 'oti' lea). Fa'apei ona auauna atu Iesu i ona soo, e o'o lava i lona mulumuluina o o latou vae, e tatau foi ona fa'apea le auaunaga a le tane i lana avā. O se tane e atamai ma ava i le Atua, e na te le fa'apalapala pe fa'aaoga sese lana tiute fa'atitai. O se avā e atamai ma mata'u i le Atua, na te amanaia le taitaiga a lana tane. A le uia ala ia, ona tupu lea o le fevaevae'i ma le vevesi i totonu o le mafutaga fa'aleulugalii.

Aisea na fa'apea ai Paulo e tatau i avā ona usiusitai a o tane e alolofa? E talitonu, ona o le saolotoga na maua e fafine Kerisiano ina ua fanaufouina latou ia Keriso, sa faigata ai ia i latou ona fa'atino le usitai. A le o lena, e le o se masani o alii Kerisiano i ia ona po, o le ava ma alolofa i o latou ava, auā o le aganuu fa'aRoma sa i ai, o le ave o le pule le fa'atuaioia i tamaloloa, latou te taitaiina ai o latou aiga. A ua valaauina tane

ma avā ina ia tau fai ususitai uma, o le tasi i le isi (5.21), ma alofa le tasi i le isi.

E fa'aluaina le tele o fautuaga a Paulo ua ave i avā ina ia alolofa i o latou tane, ona fa'atoa maua lea o le tele o fautuaga na ave i tane ina ia alolofa i o latou avā. Fa'apefea ona fa'atino e le tane le alofa i lana avā? 1) Ia loto e ofo atu mea uma mo ia; 2) Ia fai ma tumutumuga o lona manatu le manuia ma le saogalemu o lana avā; 3) Ia alofa i lana avā fa'apei o ia lava ia te ia. E leai se avā e fefe pe inoino fua i se tane e fa'aali fa'apea sona alofa.

A tuufa'atasia le tane ma le avā, ona avea lea o la'ua ma tino e tasi. Ua fa'avaeina foi se so'otaga malosi nauā, e le mafai ai ona aafia le tasi i se mea e aunoa ma le aafia o le isi. E le avea le lotogatasi i le mafutaga fa'aleulugalii ma mea e fa'aleaogaina ai uiga ma natura e patino i le avā, po o le tane foi. A ua tausii ma taunapa le tasi i lana pa'aga, fa'apei o ia lava ia te ia. Ua manatunatu i manaoga o lana pa'aga, ua una'i ma fa'amalosiaiu foi ia te ia. Ua tatou iloa mai le tala o le foafoaga, sa finagalo le Atua e avea le tane ma le avā ma tino e tasi (Kenese 2.24), o le fa'amoemoe lava lea e tasi na ta'ua e Iesu (Mataio 19.4-6).

E i ai le eseesega o le usitai ma le ava. O le 'usitai' o le fai o le mea ua fa'atonuina se tasi e fai. O le 'ava', o le fa'aaloalo po o le alofa. E le fa'apea o taimi uma a usitai fanau i o latou matua, ona latou usitai ai foi lea i le Atua (e i ai taimi e le o gatusa ai fa'atonuga a matua i le fanau, ma le finagalo o le Atua). E le o le agaga foi ina ia usitai pea fanau ua matutua i o latou matua, ae maise o matua ua ova le fa'asauā ma le fia pule. E ao i fanau ona usitai i matua a o i lalo o lo latou tausiga. A o le tiute o le

fanau o le ava i matua, o se tiute lea e tumau pea seia o’o i le oti, e le te’a ese.

GALUEGA FA’ATINO: Talanoa

Vaevae le autalavou i o latou lava aiga, ia ta’itasi ma fa’amatala mai uiga lelei o lo o a’oa’i i totonu o o latou lava lotoifale fa’aleaiga. O a ni tu lelei o le tamā, o a foi ni galuega o le tinā, a o so latou foi sao i le atiina’eina o lo latou aiga. Ia fa’atusatusa foi ma a’oa’oga o le Aposetolo o Paulo o lo o fai mai le tusi faitau.

AOTELEGA:

O le pine o le moni o lo tatou fa’atuatua ia Keriso, o le lelei o lo tatou sootaga ma o tatou aiga, o e ua pito sili ona lata ma malamalama ia tatou. E i ai le tiute a matua i o latou fanau, a o le tiute foi a fanau i o latou matua. E tatau i fanau ona ava i matua, e tusa lava pe fa’asauā, pe le tonu lo latou taitaiga i nisi taimi. E tatau i matua ona tausī ma fa’apelepele i fanau, e tusa lava pe le usitai ma fa’aletonu le fanau. O le tulaga sa’o lava e pei ona finagalo ai Iesu, o le fealofani ma le fetaunapaa’i o itu uma e lua, o le isi i le isi. E ausia lea pe afai e fa’amuumua e matua manaoga a o latou fanau, e fa’amuumua foi e fanau manaoga a o latou matua.

O loo ava pea tagata i tina ma tama matutua, i le tele o sosaiete. Ua fa’alagolago i lo latou atamai ma lo latou pule, ua taunapa foi i lo latou fiafia ma lo latou saogalemu. O le ituaiga amio lea e moomia ona faia e tagata Kerisiano. O fea lava aai

ma nofoaga ua fa'aaloogia ai tagata matutua, ua avea le umi o lo latou soifua ma fa'amanuiaga mo latou, ae le se avega mamafa.

O le fa'amoemoe o le aoaiga, ina ia atinae ai ola o le fanau, ae le ina ia fa'atupu ai lo latou ita, ma fa'avaivai loto ai ia latou (silasila i le Kolose 3.21). E le faigofie le avea ma matua – e moomia le onosai e fa'afaileleina ai le fanau ina ia iloa ma masani ma Keriso. E le tatau ona fa'avae le aoaiga a matua i luga o le ita po o le uma o le onosai. A ia faia le a'oa'iga ona o le alofa, ma ia mafutaina le fanau e pei ona mafutaina e Iesu ona tagata. O se fa'avae autu lea o le atinaeina o se tamaitiiti, ina ia latou malamalama ai i le natura o Keriso. Ia ola ia Keriso.

.....

ASO SA: 14 TESEMA 2025

MATĀ'UPU: FA'AILOGA O LE PEPE

TUSI FAITAU: Isaia 7: 10 – 14

FESOASOANI MO LE TA'ITA'I:

A tatou te talanoa loa i mea nei o pepe, ua tatou talanoa i se fiafiaga tele e o o mai i se aiga po o se ulugalii foi. Auā o pepe po o fanau, o fa'amoemoega o se aiga mo le lumanai. E fa'aauauina gafa, e fa'atumauina manuia o se aiga. Afai o se aiga o lo o tū lelei, o lona uiga, o le pepe e fa'amoemoe na te fa'aauauina lea tulaga manuia o se aiga. Afai o se aiga o lo o

tau atia'e, o lenei pepe o se fa'amoemoega na te fa'aeaina le aiga i le lumanai. O le ala lea e fa'apelepele ma tausia lelei ai e so o se matua se pepe ona e tele fa'amoemoega lelei o lo o naunau e fa'atinoaina e lenei alualutoto pe a avea ma tagata matua. (E i ai lava nai sala ese, e pei o pepe tuulafoaiina, ao le lautele lava e i ai fa'amoemoe.)

E i ai se itu fa'apea o le pepe o lo o talanoa ai Isaia. Ua fetalai le Atua, o le pepe o le a fanau mai, o le fa'ailoga o le Atua o lo o auai ma ona tagata. Auā o le uiga lea o le igoa Emanuelu pe a fa'amatalaina, o le Atua ua auai mai.

O le mea lea e tupu i le vaega o le tala na faitauina, o le vaitau o le fa'atuputupula'ia o le malosi o le atunuu lea o Asuria. O lo o taumafai la atunuu nei o Suria ma Isaraelu (malo pito i luga) e fa'afetaui Asuria. Ua mananao tupu o malo nei e fesoasoani atu Aasa ma Iuta e fa'asagatau ia Asuria. A e le'i taliaina e Aasa (e pei ona fautuaina e Isaia), ma avea loa ma ala na liliu mai loa Suria ma Isaraelu fai le taua ma Aasa ma Iuta. Lea la na toe fautuaina ai e Isaia Aasa, e 'aua le popole i ai, auā ua tau fa'afefefefe Aasa. Ma ua fa'atusaina ai e le Atua le feita o Resina (Tupu o Suria) ma Peka le atalii o Remalia (Tupu o Isaraelu) o ni i'u aulama ua pupusa.

O lona uiga, e leai ma se malosi o i ai. A o le fa'afitauli o Aasa, ua usitai i le feau a Isaia, a e lē o talitonu i le auai mai o le Atua. Auā foi, na ia fa'atagisia Asuria e omai e fesoasoani ia i latou i le taua ma Suria ma Isaraelu. O le agasala lea a Aasa, lea na fa'apea mai ai le perofeta (f. 13), O se mea itiiti ea ia te outou ona fa'atigaina o tagata, tou te fa'atigaina ea lo'u Atua? O lo o fa'asinotonu lea fesili i augatupu o Iuta mai le gafa o Tavita, e aofia ai ma Aasa lenei. O lona uiga, o se vaivaiga

tuufa'asolo lea o augatupu e tau mai ia Aasa. O le lē lava o le fa'atuatua.

Lea la ua manao le Atua e tuuina atu se fa'ailoga ia Aasa ma Iuta. O le a fanau mai se pepe i le taupou. O se vavega e fa'afeagai ma le natura o le olaga, auā e le mafai ona fanau mai se pepe i se taupou. A e ua na o le Atua lava na te mafai ona faia. O lona igoa foi, o Emanuelu. O lona uiga pe a fa'amatalaina, O le Atua ua auai mai. O le pepe la o le a fanau mai, e le gata o le fa'aaliga o le silisili ese o le Atua, a e o le fa'ailoga o le Atua na te le tuulafoaiina ona tagata.

A o le fa'afitauli o Aasa, e le'i talitonu lava i ai. A e ua atili ona tautua ia Asuria. Ua oo lava i oloa o le malumalu o le Atua, ua ia avea e fai ma ana taulaga ia Asuria. O le maualalo lea o le ola talitonu o Aasa. O le iuga o Suria ma Isaraelu, na fa'atoilaloina e Asuria ma fa'atafea ona tagata. A o Aasa, e le'i i'u manuia, ina ua maliu e le'i tanumia i nofoaga o tupu e pei ona masani ai ona o le inosia e tagata.

GALUEGA FA'ATINO: Talanoa

Vaevae le autalavou i ni vaega se lua ma fai ai se finauga i le mataupu lenei:

Po o tumau pea le tāua o le Kerisimasi ma le fa'amanatuina o le afio mai o le pepe o le fa'aolataga i nei ona po?

O le itu auai, fa'amatala mai le lagolagoina o lenei mataupu ma ni mafuaaga o lo o fa'amausali ai ou finauga. Po o ola pea le fa'amanatuina o le Kerisimasi, aemaise lea i le fa'amanatuina i ona tagata Kerisiano uma i le lalolagi.

O le itu tetee, fa'amatala mai pe aisea ua e fa'apea ua le toe t̄aua le Kerisimasi, a e ua fa'aaogaina e tagata e fai ai p̄ati ma na o le fa'at̄auaina o le fai o meaalofa.

AOTELEGA:

Ia a o le pepe lenesi na fai ma fa'ailoga mo Aasa ma Iuta, lea ua fa'auigaina e Kerisiano, o le pepe o le Kerisimasi. O le Atua ua liutino tagata, o le fa'aolataga ma le malo o le Atua ua oo mai i le lalolagi. Lea ua ala mai ia Iesu Keriso. O Iesu, o le taunuuga o valoaga a le perofeta o Isaia. A e maeu le tuufa'afeagai o le usitai ma fa'atinoga a Iosefa ma Aasa. Auā o Iosefa na ona iloa lava o le finagalo o le Atua, usitai ma fa'atino loa.

O le fa'ailoga o le pepe e pei ona ave ia Aasa, o loo momoli mai foi mo tatou. O le fa'ailoga o le Atua e auai mai. O le lu'i mo tatou, 'aia le pei o Aasa, e togi le moa ae uu le afa. E ola fa'afoliga le usitai i le Atua, auā ua le o tutusa le ioe i le Atua ma ana fa'atinoga. Auā ua saili fesoasoani ia Asuria a e fa'agalo le Atua ua folafola lona auai mai. A o tatou aga atu i le Kerisiamasi, ia tatou manatua pea o le Atua auai e ala i lona Alo o Iesu Keriso.

O le alofa tulituliloa lea o le Atua. Lea na fa'aalia i le pepe o le Kerisimasi. O Iesu na ala mai ai le fa'aolataga o le lalolagi. I lona maliu ma lona toe soifua manumalo mai le oti ma le tuugamau. Tatou fiafia lea ma olioli, auā ua ia i tatou le Atua, nei ma aso uma e fa'avavau, fa'avavau lava.

Ia manuia tele le Kerisimasi ma le Tausaga Fou